

ASO LULU, 29 IUNI 2022

Na toe faaauau Taulumaga a le Fono Aoao Faitulafono i le itula e 1:58 i le afiafi.

Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.2) 2021/2022 & Tulafono Tau Faaofi o le Faatatauina o Tupe 2022/2023.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Faamalo foi le onosai i le tatou Maota. E faataatiaese ia le tatou galuega mo le malologa ua maea le saunoaga talifuaitau a le afioga i le Minisita o Galuega, Felauaiga ma Atinae Eseeese.

Ma o lea ua oo mai ia le faasologa i le saunoaga a le afioga i le Minisita o Faatoaga ma Faigafaiva. Ma le faaaloalo ou te tapa lau afioga mo lau saunoaga.

Susuga Hon LAULI LEUATEA POLATAIVAO FOSI: E momoli le agaga faafetai, faamalo i lau afioga i lau afioga i le Fofoga Fetalai i lenei foi itula o le aso, o lea ua oo mai ia le moligafua, o le tali atu a le Kapeneta i lenei foi Matagaluega.

E i ai upu e fai i tulaga o faaagatama a le atunuu, sui le sema, ae a oo i poula a Samoa, ona faapea lea, ua alu atu le afi. Ia e le o se afi la e faatamaia ai, ae ou te faatusaina o le afi faaniutu na savavali ai ia le aiga o le Atua i Isaraelu i le 40 tausaga.

Ia malie ia te oe upu o lou gutu ma mafaufauga o lou loto le Atua, o oe o lou papa ma lou olo, o le na na togiolaina au. O upu tomua na lau afioga i le Fofoga Fetalai, e tomua ai ia le lauga a lenei Matagaluega na valoia.

O Samoa o le atunuu ma lona Malo na valoia. O Samoa foi, o le atunuu ua uma ona tofi. O lea lava ua seese malie le vaatele o le Palemene o Samoa, na folau i Maota tulutuluimoana, tulutuluaitao, o le fale o po ma ao ina ua soo le faalautai o Samoa, o lea ua faasolo mai ia le tali a le Kapeneta. O lea foi ua manava ia le autaialo, tuleiga ma saunoaga o malelega, tofa faali a le paia ma le mamalu o le Maota, ua ele ai le matagi ma toa le savili i Tiafau nei.

Ua to ai nei le falemapu a tautai ina ua logo i Pulotu le mapu a le aufaitofa ma le aufaiuta a Samoa, o lo o tapuai si o tatou atunuu pele, ao liuliu, fulifuli, faalaaui mamafa le tofa ma le faautautaga oo o le Maota Fono ma o le Fono sili lenei a lo tatou atunuu aua le lauliliuina o lona tamaoia ma le Tala o le Tupe i lenei foi tausaga. E manatu lea ia o lea ua to le fale o tautai, ae tatou agai loa ma tatou talanoa e tau na o le pua e ula aua le faamoemoe o le lauliliuina o le Tala o le Tupe o le tatou atunuu.

A tomanatu lau afioga i le Fofoga Fetalai, o lenei faatoa le 10 masina, 29 aso, 12 itula, 20 sekone talu ona tulai le faigamalo filifilia. O upu ia na ou manao e faamamafa muamua i lau tautalaga. O lea faatoa taunuu le faigamalaga a le Faatuatua i le Atua Samoa ua Tasi i le taimi lea, ma le tatalo sa tuu i le Atua mo se laolao lelei faapenei se i avatu sau folasaga i le Matagaluega na tofia ai au e le afioga i le Tamaitai Palemia ma le Kapeneta e tautua ai Samoa.

O lea ua outou faafofoga i saunoaga ma tuleiga a le Kapeneta, o le a toe fevailiai, fesootai, fetausiai, fealolofaai, tutu faatasi e tautua le atunuu. Ma e leai, leai, leai se Matagaluega e tasi e le fesootai ma militino i le Matagaluega o Faatoaga ma Faigafaiva. Aisea? Leaga o le tatou talitonuga, o le fatu lea o Samoa.

O le matua silasila mamao ma matua vaai le Atua i le amataga e le i iai lava se isi mea na muamua fau. Na muamua lava fai ia le faatoaga i Etena. E leai lava se isi mea i luma atu, po o tua mai i le foafoaga a le Atua. Na muamua lava fau le faatoaga mulimulitai loa i ai fau tatou. Na vaai atu le Atua e le fiafia Atamu e na o ia, liliu ae loa le tofa, fausia le tamaitai e tauave le galuega aua le faatoaga lea.

E manatu e faapena foi ia le tatou folauga lau afioga i le Fofoga Fetalai ua leva ona o tatou folau, 60 tausaga, sau le tatou folauga na ati ai, savali ai ma faatu ai e o tatou matua, tuua ua fai i lagi le folauga, ua atu tia ma taatia i tuugamau lo latou sao ia manuvao. Silasila le Maota mai i uluai Ao o le Malo, uluai Fofoga Fetalai, uluai Palemia, uluai Palemene e tau mai i le taeao lenei.

O le galuega lenei na fai lau afioga i le Fofoga Fetalai. Ae e le mafai, e le mafai ona ua alu le upu ae e le i manatu i itu ia. Ae ana leai ananafi, e leai le aso. O le latou galuega na fauao faupo. O le latou galuega na faufau le tia, na omai ai i Tiafau se i fau, se i fau le Malo na aumai uma ai tia a Samoa, fafau i Tiafau na mafua ai Tiafau, o le malae o le Faautugatagi a Samoa. Na velo uma i ai aso, na velo uma i ai tia ma fatufatu maa pe faafefea ona fau ia si o ta Malo?

Lau afioga i le Fofoga Fetalai, o le Malo lenei na valoia. O le Malo lenei na valoia mai i le amataga e tau mai i le taimi lenei. O ai na valoia? O ai na valoia le Malo? O tatou tuua ma matua, tau ai taua e fia o le taeao o le malamalama, taeao o le fefulitua ai, taeao o le pogisa, taeao o le vatavao ma le taavao o Samoa, ia saili ia tofi le atunuu, o Samoa o le atunuu tofi, ina ia

a? Ia maua Aiga, ia maua Tama, ia maua faleupolu o tofiga. E i ai le taeao lenei. Ia ona faaula loa lea ma faatiti, ina ua valoia e Nafanua, Malietoa talofa e, ua uma Ao ma Iu o Malo, sau e ave le mutia lea e toto, ma faatali i lagi se Ao o lou Malo.

Lau afioga i le Fofoga Fetalai, a lena ua e seei, a lafalafa Tuna o oe o le Malietoa na e talia le Talalelei, Mataniu Feagaimaleata. O le taeao lena o lea e i ai le taeao lenei. O le Malo na valoia, e i ai ula ma aute o le taeao ma le aso lenei. O a tatou fuafuaga faaletagata, o a foi ia o tatou manatunatuga faaletagata, ae tatou te le i fananau mai, ua iloa e le Atua le tagata ma lana galuega e fai mo Samoa. O lea ua outou silasila i lenei taeao, o ai tatou? O ai le paia ma le mamalu lea ua faalepa i le Maota?

Lau afioga i le Taitai o le Malo lau afioga i le Tamaitai Palemia, lafalafa Tuna ae tau ou gafa i le Nafanua. E le tau fai atu, tau lava tau i le lagi Tupu Tafaifa e fia o le atunuu. O la e taoto i ai Fusi ma Tamaleu le uluai Tafaifa ia Salamasina, pine lena.

Lau afioga i le saoolii, e le tau fai atu, tofiga a le Tupu, Mulinuu ma Sepolataemo, tofi ai mea uma aua aiga e fia, aiga e tau i mamalu aiga e tau i paia, aiga e tausii le fetalaiga ma le tofa a Samoa. E faapena foi i le paia maualuga a faleupolu o tofiga, Fogaa o na e silafia. E tofia ai tofiga na taape au manusina e le soaina aua Samoa ae tasi lava le agaga. Faafetai i o tatou matua o Samoa ua uma ona tofi. Ua iloa aiga ua iloa tama. Ua iloa faleupolu o tofiga. E 6 Pule, fetalaiga Leulumoega, Susuga Tuisamau, Susuga Lufilufi. Aiga i le Tai ma le Vaa o Fonoti, ona atoa loa lea o mamalu, e tau ai le mamalu ma le paia o Samoa aua lona vatapuia.

Ua ou manatu lau afioga i le Fofoga Fetalai, o lagona ma manatu ia o lou sui usufono o lea ua savali ia lou 20 tausaga i le Maota. A ou tulai ma ou savali i le finagalo o lou itumalo ou te sau fai le sao ia Manuvao. Ae faafetai i le Atua, o lo o i ai pea le faatuatuga e mafai ona ou tulai atu ai nei, e tauave le galuega e tautua le atunuu. Ao moomooga fai ae o le agaga, o lo o maua pea le avanoa e feiloai ai ma nisi. O sui usufono filifilia foi aemaise o le faatuatuaina o latou itumalo e omai ai e opogi ma fai le galuega ina ia manuia le atunuu.

O le Maota i Tiafau e i ai ona sa lau afioga, ae e te le i ulufale ia e tu ma vaai, tu ma vaai lou tu, tu ma vaai lau tautala, tu ma vaai lau aga, tu ma vaai leaga e leai se isi e tatou te tuvae i le Maota lenei. O le Maota o le filiga a Samoa, e atoa i ai ona paia ma ona mamalu sauoo.

O le ala lea lau afioga i le Fofoga Fetalai, ua ou manatu e oo atu faapena se leo o lenei itumalo ma lenei Matagaluega. E le mafai ona ou laa loa, ae e le mafai ona ou faapoi vagana, i le paia ma le mamalu o lau afioga i le Fofoga Fetalai, lau afioga i le Taitai o le Malo lau afioga i le Sui Palemia ma le Kapeneta, ia ma sui usufono mamalu uma o le tatou Palemene lau afioga i le Sui Taitai o lena Itu, aemaise le paia ma le mamalu maualuga o sui usufono mamalu uma o le Maota Fono o Samoa.

Ou te faatalofa foi i le mauuluga o tupu ma ee, tamalii ma failauga o faletua ma tausii, saoa ma tamaitai o e o lo o faaao i ai Matagaluega a le Malo, aemaise o Faauluuluga o Matagaluega o outou o vae ma lima o le tatou faigamalo. Faatalofa atu i tulaga aloaia. Faatalofa atu foi i lau afioga i le Failautusi o le Fono ma le Sui Failautusi ma le tatou Maota Fono aufaigaluega.

Samoa o le atunuu pele i lenei itula o le aso ua maligi timuga, to uaga ma agi le savili, silafia e le Atua o le a fai le upu a le Minisita o Faatoaga ma Faigafaiva, ina ia faasusu le eleele. Ia ola lausiusi meatoto, ia feinu fiafia meafafaga ma ia faafilemu ina ia aua ne i toe i ai se pefu. Aua foi ne i toe i ai se isi e faalavelave i le lauga a le Matagaluega.

Lau afioga e faapai atu i le agaga faaloalo i le tapuaiga a Samoa, mamalu faale-Talalelei aua Faafeagaiga Taulagi, ia ma le mamalu i lo outou talafaauto o lo o taitaia le galuega auauna a le Atua i so o se fatafaitaulaga, Taitai o Ekalesia, ae tainane Faafeagaiga uma i lo outou faafalelemalu ma lo outou faafaletulua aua le Atua ma Lona finagalo i tafa e fia o Samoa. Faafetai le tapuai, faafetai le tatalo.

E momoli le agaga faafetai i le tapuaiga a Samoa, Samoa e le tau faia se upu po o se tala, leaga o oe o le ua e faalanumaaveave e toa i ai pulu i le vasa, aua Aiga ma o latou Tama o Tama ma o latou Aiga, le Usoga a Tumua ma Pule, Ituau ma Alataua Aiga i le Tai ma le Vaa o Fonoti.

O tatou uso i le motu i Sasae, Tuimanua, Tutuila, le faigamalo i lau afioga i le Kovana Sili ma le Lutena Kovana, mamalu o le faigamalo tainane lau afioga i le Fofoga Fetalai Peresetene o le Maota, matou faatalofa atu i le agaga faaloalo.

O le tapuaiga a Samoa i tafa e fia o le lalolagi, e le mafai ona galo, la outou tautua Malo ma la outou tautua apaapa, o lo o outou susue pea le faamalama ma outou silasila mai i le taumafaiga o le tatou Malo filifilia fou o tulai i le Nofoaiga lenei e tauave le atunuu.

Ao tulaga tau Faatoaga, Faigafaiva ma lafumanu, Suesuega Faasaienisi ma le STEC na filifili ai au e lo tatou Malo ou te auauna ai. O le a taumafai atu e faamalalamalama nisi o mataupu sa outou saunoa i ai. Ua suia fuafuaga a lo tatou faigamalo fou, ina ia faasolo ia faaaliga a le aufaifaatoaga i itumalo uma lava o Samoa atoa. Ua o tatou see ese ma le mea sa o tatou i ai, e tasi ia le faaaliga e fai i le taulaga i Apia, tasi le faaaliga e fai i Salelologa. Aisea? Ua manatu le faigamalo, ua tataua ona oo atu le fesoasoani i lima o i latou e sili ona manaomia le fesoasoani. Ia matua oooo i tuluiga o le tagata o la e palapala lima i le taeao e po lava o palapala. Ia oo i aao o latou o susu mai i le taeao e po lava o susu. Ma ia matua oo tonu lava i aao o latou e sili ona manaomia le fesoasoani.

O le ala lea o le fai o le tatou suiga lea. Na toe fetuunai uma ai ia le tatou tupe o le Tala o le Tupe lea na uma nei \$500,000 na faatulaga, uma le taimi e le i mafai ona faatinoina se faaaliga a faatoaga, ona vavaeese ai lea o le

\$200,000 e taumafai ai le fale e teu ai oloa mo oloa auina atu i fafo i Salelologa. O le taimi lenei o la e i lalo o pulu ma niu, fetosoai solo palaka i lalo o mea e le sefe, a ua ave le \$200,000 masalo o le vaiaso lea amata le galuega lena. E fau faalelei ai le fale, e pack ai ia tatou container e ave i fafo.

Ave le \$120,000 e faamautu ai ia le tatou falemeaai a manu, e maua ai taumafa mo povi, o moa, o puua, o ia ma meafafaga uma a le atunuu. Ae aumai loa le \$180,000 lea la sa faasoasoa atu nei, i a tatou faaaliga laiti ia na faasolo mai i le tatou Tala o le Tupe lea na alu nei. O lea sa i ai uma lava ia tatou itumalo na lautogia. O ai lava itumalo na talosaga mai, o itumalo na sa tali atu e le Matagaluega. Ma e na sa outou silasila i le mea sa fai, tapena lava e le pitonuu ia lava Talomua ia sa faaigoa o le Talomua po o le Faaaliga Pitonuu. E tapena e outou ia fua o faaeleelega fualaauiaina fua o fualaaui taumafa mata, ae o atu le Malo e avatu ia le fesoasoani. E avatu meafaigaluega, o si sapelu ma se faila, o se suotipi o se loukoko, o suo o so o se ituaiga, o uilipaelo, fanavao, iliafi, o niu o koko, avoka so o se ituaiga fatulaaui eseese, momoli atu i aao o paia ma le mamalu o itumalo na fai, ma si tino i tupe itiiti, e avatu e fai ai tulaga o le a le mea e faapaleni ai.

Lau afioga i le Fofoga Fetalai ma le mamalu o le Maota, ina ia oooo ia le fesoasoani i lima o i latou e sili ona manaomia. Ia e i ai foi nisi ua faaaliga lo latou finagalo po o le a le mea ua fai ai faapea ai le amataga. O lau faamalamalama, o le a ta ane lava ia le taimi e uma ai ia le tatou Paketi lea e uma taeao e le i faaaogaina le tupe. Aisea?

Ua le mafai ona fai ni faaaliga ona o le mea lea sa poloka ai tatou. Uma le faamai, sau le isi faamai, poloka solo i tatou finauga polokiki na fai. Ae tu ai ma toa ai le atinae e tataua ona fai... e ui o lea, na faaii uma i le vaiaso lea na tea nei a tatou Talomua laiti uma ia na fai. O le a foi sa outou matau ma sa outou silasila i itumalo na faamanuiaina ma nuu na faamanuiaina, ma Asosi Faifaatoaga na faamanuiaina, o le tali lena mo lenei taimi.

Ao le fuafuaga lea ua faataatia e le tatou Matagaluega a pasi loa ia le tatou Tala o le Tupe lea, o le a alu nei, ia ona maua loa lea o le avanoa e faasolo ia tatou faaaliga nei i itumalo uma o le tatou atunuu. E tofua lava ia le itumalo ma le latou faaaliga ua faaigoaina o le Uluai Seleselega o Faaaliga a le Aufaifaatoaga, Faigafaiva ma Lafumanu. E alu ai lava ia le itumalo ia e tapena ia lana faaaliga. E le tau faalagolago mai i le matou Matagaluega e tau o atu e fai tulaga uma, ae e o atu ia le Matagaluega e fai ia le fautuaga ma le fesoasoani, ia ma le tupe e faatino ai lava fuafuaga a le itumalo ia.

E lilifa tonu foi i le faatulagana lea e avatu e le afioga i le Minisita o le tatou \$1 miliona, e tulai ai lava ia le Taitaifono, Sui Taitaifono ma lana Komiti e fai e outou ia le faamoemoe lea. E tasi foi lena o au poloketi o le a faasolo ai Taualumaga i le tupe lea e avatu i le Matagaluega o Faatoaga ma Faiga Faiva, o na i ina le tofa e faaleleia atili ai ia lo outou faamoemoe.

O le Uluai Seleselega la lea ua muamua mai i le lisi, o le afioga i le Minisita o Tupe. E 3 aso e fai ai ia lana ia fuafuaga e aafia ai uma ia ana faaaliga

siapo ma ana faaaliga toga ae alu atu ai ma le faaaliga faatoaga. O se mea sa le tupu muamua sa na o le taulaga e tupu ai, ao le avanoa lea ua fai lava i totonu o itumalo, ma o ifo uma ai le itumalo. O tagata e le i maua sona avanoa e sau ai i se faaaliga faatoaga talu mai na ola, i totonu o Samoa, ae alu ifo lava ia, ave ifo uma po o a ana mea na toto. O a ana mea na fai? o a ana mea na tausi? Alu ifo e vaai, ma tilotilo.

Lau afioga i le Fofoga Fetalai o le fatu le mea lea, o le faamaite ma le faatupu. O le agaga galulue o si o tatou atunuu. O ai e faamaitea? O ai e faamaitea lau afioga i le Fofoga Fetalai? A le aapa atu ia le tatou faigamalo ma le tatou Malo ma le tatou Maota e fai, e leai lava se mea e tupu. O lea ua lafo atu i le paia ma le mamalu, o a outou afioga uma i alii ma tamaitai sui usufono i itumalo uma, e tofu lava le tagata ma lona aso. Ae logo mai au ma le Matagaluega, ia ona tusi loa lea o le tou aso, 12 masina o le tausaga, 51 itumalo. O lona uiga e tele ia le tatou galuega e faasolo. E tasi lava le auga, ia lava taumafa, lava meaaano, lava mealelei, lava ia o le sami e tali ai le sua.

O lea ua outou vaai ua sau le feau a le Secretariat General a le Malo Afaatasi, ua i ai lona popolega i sioki meaai o le lalolagi. O le a la le tatou tali atu? O le a le tali a Samoa i le mea lea? O le 90% o tatou eleele tumaoti pule ai tatou. E leai se Samoa e leai sona tuamaota. E leai se Samoa e leai sona faasinomaga. E leai se Samoa e leai sona aiga ma sona fanua. Ae o le a le mea lea ua fai e le tatou faigamalo? E taimua le Malo, avatu le malosiaga.

O le ala lea lau afioga i le Fofoga Fetalai, e ogatusa ma le \$1 miliona lea. O le \$1 miliona lea o le a avatu, i aao o Alii ma Faipule, ma itumalo uma e 51 o Samoa. Ia e le toe ta i tua le tili, leaga o le Poloketi sa amusia, tele i ai tala, tele i ai upu ma faamatalaga ae fenumiai ai ia le faalogo a le atunuu, ma sese ai le faauigaina o upu ma tala, o lea e taumolimoli atu. A foi ua aafia tatou uma i le lalolagi i le mea lea.

E faatoa uma nei lava ona lauga ia le afioga i le Minisita o Vaa, Minisita o Fefaatauaiga ua alu i luga tau o oloa. Ua felelei uma i luga ia oloa ia e tatou te faamoemoe i ai. Silasila lau afioga i le Fofoga Fetalai, o moa, o povi, o puua, o suka, o falaoamata, o mea uma mai i fafo lea e tatou te agai ma faatuatua i ai. Ia ona o loa lea i luga, o le a la le tatou mea o le a fai? Alua tu ai ma le suauu, alu atu ai i luga ma le tau o e e pule i vaa. Ia ona faapea mai loa laia ua taugata le soifuaga. Ae o le a le tatou tali atu? O le a le tali atu a le tatou faigamalo i le mea lea? E tatau ona taulamua ia le faigamalo e amata mea e ave le fesoasoani i aao i nuu ma itumalo e foia ai le mataupu lea.

O le ala lea, o a tatou upu ma tatou finau na fai i le \$1 miliona, ia Viia le Atua. E tetele lava i Pesega ae matua i le oo o lea ua.. toeitiiti lava maea uma ona saina ia tatou itumalo. Faafetai atu ona o lea faatoa outou talitonu, i le tatou faamoemoe na faatavalevale atu. Na matou savavali ai ia Samoa atoa, Samoa afai e aumai ia la outou faatuatuga, o le mea lea e fai.

Ia e le o ni folafolaga la e pei ona tau saunoa mai nisi o sui usufono, ua na o se galu e faafua ae le fati. Ia wanti laia. Ioe, o le agaga lena...

Afioga Leaana Ronnie Posini: Lau afioga i le Fofoga Fetalai...

Susuga Hon LAAULI LEUATEA POLATAIVAO FOSI: Ae e pei ona ou fai atu... e le soona faia lava, e le faigamalo filifilia se tulaga e na ona fai, ae le taunuu.

FOFOGA FETALAI: Ia malie ia lau afioga i le Minisita, se i tuu atu le avanoa i le sui usufono o Safata 1.

Afioga Leaana Ronnie Posini: Faafetai tele i lau afioga i le Fofoga Fetalai, e faafetai tele i lau afioga i le Minisita o Faatoaga e leai foi se manatu e faalavelave i le saunoaga lau afioga manino le folasaga i lenei taeao.

Faafetai tele lava sa laga foi e lenei itumalo le tulaga o le Talomua. Ia faafetai o lea ua manino, ia se Faiga Faavae sa tau amata e lau afioga, lea na ala ai ona fai ia Talomua ia e Sosaiete ma nuu e fia fai ni a latou Talomua. Ae o lea la ua matau o lea o le a agai faaitumalo le Uluai Seleselega, o lea e i ai le tupe tele lea pe afa \$1 miliona ea lea e tapena ai ia le faamoemoe lea.

Leai o le agaga lelei ma se faamaite foi a lau afioga aua ia le tele o meataumafa aua lenei vaitau i le faamai. Na pau lava lau tau matau i Talomua ia na uma atu, e pei e uma foi lele ia Talomua, ia e i ai le agaga foi ia o le aufaifaatoaga na avatu ia fua o latou faatoaga, pei e uma lava ma taulia foi lea. Ia ae o lau matau i nai isi faifaatoaga, na uma lava lea ona toe ave i a latou aiga ia fua o faatoaga, ia ona o la e tele meataumafa pei e i ai le agaga a omai e fai faaaliga ia, e uma ifo ma taulia uma ai lava ma fua o faatoaga ia.

E pei o le ala foi lea e tau tuu atu pea i lau afioga, ia pe fai lava i itumalo, ia pe fai i se nofoaga foi lea e tele ia tagata faatau e o atu foi i ai. E uma ifo ia le Uluai Seleselega ma faaaliga ia, ua taulia uma lava oloa o lea foi na e saunoa ai i tulaga o ietoga, falaninii ma tulaga faapena, ia o tatou i tua e tele ai mea ia. Ia e seasea taulia, ae a aumai i totonu o le talafatai o Apia e toatele ai ia le aufaatau, ia e faigofie ai foi ona taulia. Ia ma le agaga faaaloalo.

FOFOGA FETALAI: Ia malo, faafetai, ia lau afioga i le Minisita.

Susuga Hon LAAULI LEUATEA POLATAIVAO FOSI: Ia faafetai, leaga o lea ua e vave tu mai, e le i oo atu lau upu ia oe, sa faasolosolo atu lava.

Na e teea loa le talomua lea a le asosi a lou itumalo, na ou le faataumatatao lava lava. Na omai sao lava le asosi ia te au matou talanoa. Sa ou fesili...

Afioga Leaana Ronnie Posini: Lau Afioga i le Fofoga Fetalai...

Susuga Hon LAAULI LEUATEA POLATAIVAO FOSI: Se faatali o lea se i faauma atu lau tala. Na e teea loa, na ou fesili i tama, na ou fesili, o la e faafofoga mai le asosi, fai latou ma molimau. E musu le sui usufono, na manao le sui usufono e avatu e control uma e ia le faamoemoe. Ou fai atu, vaai, o e talanoa lelei, e le o se isi le sui usufono, o le tama o le itumalo. O e talanoa lelei. Ae i ai le aso e fai ai le mea lea, o le a ou faasilasila i le Palemene. E fai ai le mea lea o le a faasolo, e agatonu lava i ai le fingingalo o le sui usufono.

A o le mataupu lea e te saunoa i ai, ioe, o le faamoemoe lea e fai i tatou talomua ia pe a faasolo nei, e o atu ai ma le au exporters, e faatau mea ia.

FOFOGA FETALAI: Ia malie ia lau Afioga i le Minisita, se i toe tuu atu, o lea ua taua le suafa o le sui usufono.

Afioga Leaana Ronnie Posini: Lau Afioga i le Fofoga Fetalai, o lea ua ou faalogo atu i le saunoaga a le Minisita, e ogaoga lava ia tuuaiga. O lea lava sa tuualalo atu lava, a o lea na e fai mai e faamuta le... ae afai o lea ua e toe lagalaga maia. Lau Afioga i le Fofoga Fetalai, tapa ia faamaoniga o saunoaga a le Minisita. E leaga e le lelei ia tuuaiga lea e aumai ia te au. O le pule mamalu a alii ma faipule, o lene ua e silafia.

Susuga Hon LAAULI LEUATEA POLATAIVAO FOSI: Ia sau laia, uso, sau laia, sau loa si ou tei, sau loa, malie ia lou loto.

Afioga Leaana Ronnie Posini: A tasi loa le tofa ma le faautaga, o fea e fai i ai lou sui usufono ae...o le mea o le tofa ma le faautaga mamalu a alii ma faipule. Lau Afioga i le Fofoga Fetalai, o le agaga lea.

Susuga Hon LAAULI LEUATEA POLATAIVAO FOSI: Ina ne i toso le Fono ia ta finauga, ae tapena lau talomua....

Afioga Leaana Ronnie Posini: Ia o lene foi o le a e toe....

Susuga Hon LAAULI LEUATEA POLATAIVAO FOSI: E tapena lau uluai seleselega. Sau loa, sau oe si ou tei, ua uma lene taimi. O la e faafofoga mai le tatou asosi, ua uma ona ou fautua i ai. E sauni lelei le uluai seleselega a le tatou itumalo, ma o oe e faia le tonu. A lea ua ou fai atu o lou ai lene i le taeao lenei. Aua e te toe...tea lene misa mo le nuu. Ia faasaga lelei mai ou fofoga o lea ou te tilotilo atu. Ina ia fai lelei a ta mea uma aua e le manuia o le tatou itumalo. Ua e manao e tala lo ta gafa i totonu o le Maota?

Afioga Leana Ronnie Posini: Lau Afioga i le Fofoga Fetalai,

Susuga Hon LAAULI LEUATEA POLATAIVAO FOSI: O le ala lea, aua ia e te atugalu, ua uma na taimi. O le tulaga lena.

FOFOGA FETALAI: Ia malie ia oe le sui usufono, o la ua oulua talanoa, i le lua faa...

Afioga Leana Ronnie Posini: E leai, o la e saunoa mai ou te pupula sao atu. Ae ou te pupula sao atu ae o lena e te pupula i luga.

Susuga Hon LAAULI LEUATEA POLATAIVAO FOSI: E na o le Atua lava e maua ai le moni o au tala na e fai. Ae ui i lea, lau Afioga i le sui usufono, a e silasila loa i le aso ua fetau ma lo ta itumalo, ou alu atu loa ta te talanoa. Ia tapena lelei lau uluai seleselega, ou te matuai ou alu atu ma le Matagaluega o Faiga Faiva, Faatoaga ma lafu manu ma fai lelei le tulaga e tatau ona i ai, ma avatu le fesoasoani. E \$500,000 lea sa faaagaga mo talomua lenei e vaevae lelei i le limasefulu tasi itumalo. E lata i le \$10,000 a le itumalo. O le tupe lena, sa alu uma lava i le tapenaga o mea ia sa fai i le taulaga. Sa alu i meaai, sa alu i semina, sa alu i femalagaaiga, sa alu i mea... e le i oo i lima o le aufaifaatoaga a Safata. O lea la faatoa avatu, o lea faatoa avatu sao lava ia pai le faila ma le sapelu, o le loukoko ma le oso, i lima o le aufaifaatoaga. O le faiga la lena, ioe, o le agaga lena lau afioga i le sui usufono.

A o le faamoemoe lena, e o atu uma ai ma tagata nei e feoai e faatau a tatou oloa e ave i fafo. A lea tou te vaai i le galuega lea e fai. Ou te faafetai ia i latou o tamalii ma failauga lea e taumafaia le mea lea, exporters. A lea tatou te pisa nei, o le a le pasene o le oloa e ave i fafo a Samoa. E le o taitai ona feauai le sau i totonu ma le alu i fafo. Aisea? E tatou te le o uunaia, e le o uunaia e le Malo. Aisea? Ua tatou faatuatuanai. E onosefulu, fitusefulu container moa, fasefulu futu i le masina, lea tatou te aai ai. E tolusefulu fa futu, alaisa, falaoamata, o lea tatou te aai ai. Se i outou silasila la i ai i le substitution e tatau ona fai. O le mea lena e tatau ona tatou liliu i le taimi lenei. Ia fafaga lava moa a le itumalo ia, o lea ua avatu le poloketi, fai a outou pamoia, fai a outou papuaa, fai a outou papovi, fai uma mea, ia maua la le mea lea, ia maua le mea lea e tau fai atu. E \$100 miliona le tatou tupe o lea e alu i fafo, le foreign exchange e aumai ai oloa ia i le tausaga, \$100 miliona. O lea lava tatou te nofonofu, ua outou silasila i ai, o lea lava tatou te nofonofu ma le fofo. A o le fofo foi, e le o se mea fou.

O le tatou uluai paketi i le 1962, o ai na fund mai ai? O eleele ma faatoaga a le atunuu, sa numera tasi le tatou popo, sa numera tasi le tatou koko, sa numera tasi mea uma. O le talo, e fia sefulu container o le vaa, pusa fai, sa fia sefulu container o le vaa, sa alu uma i fafo, transmission ...growing

abroad this market in New Zealand. O mea uma, sa lau a tatou oloa, aepeitai, te i lava ua toa. Ia tatou liliu loa i isi atinae, ae tiai le fatu o le atunuu. O lea o le a taumafai atu nei. O le mea lea le sui usufono, onosai mai, e avatu uma lava exporters, e faamuamua i latou ia.

A o lea ua outou faafofoga, ua tulai le Malo, e faatu le Matagaluega fou, le Export Authority, o le mafuaaga tonu lava lea. Ia matua ave le malosi atoatoa, i le Malo e fesoasoani e saili uma maketi e ave uma i ai, ia mea ia o le a toto. Aua na o le fai fai lava, omai loa fusu le aufaifaatoaga i le maketi i Fugalei ma le maketi i Savalalo ma le maketi i Salelologa. Aisea? E le lava maketi. Ia tatou taunuu pea i le mea lea, e \$60, \$70, \$80 i le pusatalo. O ai le faifaatoaga o le a toe fiu? O ai le faifaatoaga o le a le toe fia faia sana faatoaga. E leaga foi o lea o le a taavili le tupe lea i totonu o le aiga. Ia tatou matauina, ia uu e le tama, tina le tinoitupe lea e le i lalo ifo o le \$300 i le vaiaso, every week. E mai i lana lava faatoaga, ma laga atinae. O lea o le a faataavale atu nei, i le poloketi lea e tasi miliona tala, ma o le tulaga aupitosili lena, ona mataitu.

O le tulaga i le atinae moa...

Afioga Leana Ronnie Posini: Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita, o se isi foi mea po o le mea lava e tasi.

Afioga Leana Ronnie Posini: E faafetai tele lava i lau Afioga i le Minisita. E leai o lea ua manino le folasaga a lau afioga, i le tulaga o faatoaga ma tulaga faapena. Ou te masalo o le tele o taimi e fai ai au tala i totonu o le Palemene lenei, i mea ia o le aufaifaatoaga. Se i silasila lava lau afioga i aufaifaatoaga lea e tele ai le talo ma mea faapena, o le popo o le koko. E oo foi i le nonu o lea ua faaletonu i le lua pisinisi ma Peseta.

O le nuu lenei sa matua tele lava le nonu, ae manatua lau Afioga, o le nuu lenei o Saanapu, e i ai lava aiga e fai lava a latou container talo e ave i fafo. E le fou la i le matou nuu, ua leva ona tautua le nuu lenei i lo tatou Malo. E tatalo atu ai i lau afioga, se i silasila totoa i ai. Ma le agaga faaaloalo.

FOFOGA FETALAI: Ua lelei faafetai. Lau Afioga i le Minisita.

Susuga Hon LAAULI LEUATEA POLATAIVAO FOSI: E talia lava ma le agaga faaaloalo ia fautuaga, se o mea lelei. E lelei le mea lena e te fautua mai ai. A mafai e oe ona ave au exporters, ave. Aua e te faalagolago mai i le Malo po o le Matagaluega e o atu e fai, o lou tiute lena. A fai o lena e te silafia e mafai ona ave uma e oe, ia fua o faaeleeleaga a lou itumalo, oka, o le faamama-avega lena mo le tatou Faigamalo. Ae pei o le uiga lena o le faamatalaga.

Lau Afioga i le Fofoga Fetalai, o tatou, o tatou lava o Taitaifono uma o Komiti faaitumalo, o lea e i ai ma le tatou poloketi, o tatou e taulamua. O tatou e taulamua e ave le fesoasoani i totonu o nuu ma itumalo, e faatupu lelei ai le faifaatoaga e alu e toto ana mea toto. E faatupulaia ai faifaatoaga e fai ana mea fafaga. E faatupulaia ai foi le tagata faifaiva, ina ia manuia ma mau lona faiva. Ae a fua mai la, o le tiute lena o le sui usufono e fai. O oe o le tama o le itumalo, e te sau e saili le mea e ave uma i ai mea ia a le itumalo. Pe a faapea e te naunau moni, ma e alofa moni i lou itumalo. O le mea lena e tatau ona fai, ma o lau mea lena o lea e fai.

Na ou talanoa foi i nisi... i le tulaga o sui usufono...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai.

FOFOGA FETALAI: Ia malie lau Afioga i le Minisita, se i tulai mai le sui usufono o Falelatai ma Samatau.

Afioga Lupematasila Galumalemana Tologata Togia Tile Leia: E faafetai i lau Afioga mo le avanoa. E leai foi se agaga e faalavelave i le saunoaga po o le fagogo matagofie a le Afioga i le Minisita. Ae sa ou tusi atu i lau Afioga i se avanoa e fai ai le talomua a lenei itumalo. Ua ala ona ou afea le itu lea, ona o lea ua e taua, o le galuega lea a le sui usufono e tatau ona fai. Ae paga lea, o lea ua maea atu lena tausaga faale-tupe, ia e le i oo mai lau faasoa i lenei itumalo.

Ae sa ou faamaualuga aua o lau Afioga o le ta itumalo faatasi ia tua. Atonu ai a manuia i le faagasologa o lenei tausaga fou o le a amatalia. O le isi vaega, e ese le faatupumanatu o lau saunoaga lea e faapea mai, tatou o e toe atinae a tatou faatoaga, e faaitiitia ai le aumai o alaisa ma meaai mai fafo. Ae pe sa fai se sailiiliga a le Matagaluega. Aua o le matau lava i le taimi lenei, e oo lava i toeaia ma loomatutua, ua le toe fia tausami i le talo ma le fai.

O le alaisa lava le mea lea, e pei ua fiafia le mamalu o le atunuu e tausasami ai i le taimi lenei. E pei o nai vaega na, o lea foi e tele le tupe lea sa faaalu i le tausaga na tea nei, e faatu ai le Export Authority lea e...taua tele, lea e saunoa i ai le Minisita. O lea foi ua toe faaopoopo le tupe i lenei tausaga. Ae e fia malamalama ai lenei itumalo, pe ua tau tino mai le Export Authority lea? Aua o lea lava ua amata ona o tagata e galulue i faatoaga, ae o le faafitauli lava lea. E pei ona malie i le saunoaga a le Minisita, e o mai fusu ai i le maketi aua e le iloa po o ai e faatau i ai. Ma le agaga faaaloalo.

FOFOGA FETALAI: Lau Afioga i le Minisita...

Susuga Hon LAAULI LEUATEA POLATAIVAO FOSI: O le tatou vaa nofoatolu, o Satunumafono ma le Tauaana ma le Tuilagi e tausiamia

Tuiaana. Ae aupitosili lava ia oulua le lua muga mai i lau Matagaluega. Ia toa mai, o lea ua ou fai atu ia oulua, e te lua toa mai. Ia tapena lelei le uluai seleselega a lo tatou itumalo o Falelatai ma Samatau. E ui lava ina e matuai e tetee lava i le \$1 miliona, ia leaga e faigata le tapuaiga a lo tatou nuu. E le avea lo oulua finagalo ma Leaana, e poloka ai le manuia e avatu i o tatou itumalo.

Afioga Leaana Ronnie Posini: Lau Afioga i le Fofoga Fetalai,

Susuga Hon LAAULI LEUATEA POLATAIVAO FOSI: O le ala lea, a o oulua e toalua, keep cool, o lea e le i uma atu le mataupu. Lau Afioga i le Fofoga Fetalai...

Afioga Lupematasila Galumalemana Tologata Togia Tile Leia: Lau Afioga i le Fofoga Fetalai...

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Ia faapuupu mai.

Afioga Leaana Ronnie Posini: O la ua saunoa mai e toa mai, a o lea e tau faasaosao atu mea tau faaletonu lea e aumai. Ma le agaga faaaloalo.

FOFOGA FETALAI: Falelatai ma Samatau.

Afioga Lupematasila Galumalemana Tologata Togia Tile Leia: E mo le faasaoina o le taimi o le Minisita.

Susuga Hon LAAULI LEUATEA POLATAIVAO FOSI: O la oulua lava lea matafaioi o le sailiili masei.

Afioga Lupematasila Galumalemana Tologata Togia Tile Leia: Lau Afioga i le Minisita, na ou tetee i le \$1 miliona. E leai o le mea e fia faasao. E le o tetee le itumalo lenai o Falelatai ma Samatau i le \$1 miliona.

Susuga Hon LAAULI LEUATEA POLATAIVAO FOSI: Ia vaai laia i le manaia, o lea ua sui lau tali. Vaai laia i le manaia o lau saunoaga i le taeao lenai. O lea e faalogologo mai lo tatou nuu, ua tea lena taimi. Lupematasila, ua tea lena taimi. Tapena fiafia laia, valaau lelei Pau la e sau taeao, fai la oulua komiti, faatulaga aiaiga lea e fai mai ai le Minisita. Ia tapena lelei laia. Ia fai fiafia ma tapena fiafia lau uluai seleselega, o lea ua ou fai atu. Ia logo atu le aso. Ou te le i maua sau tusi, e masalo o lau failautusi lea e agai i lau

tusi, ae ou te le i maua lava sau tusi e tasi. Ua pei foi oe o Tapunuu, lea e ave tusi i le failautusi a Olo.

O tulaga tau faiga faiva lau Afioga i le Fofoga Fetalai, o lea ua manatu ua tele le sao o lenei atinae. Ua fia sefulu tausaga o lo o taotaomia pea ia faiga faiva, i lalo o faatoaga. O le faataamiloga lea ua i ai i le taimi lenei, ua tataua ona tilotilo le Faigamalo i se auale e tu faamatila ai le Matagaluega o Faiga Faiva lava ia. Ma o lo o tele fesoasoani a Malo mai fafo ma le faasologa o le taupulega. O le ia, o le isi mea e tataua ona matua tatou tilotilo lelei i ai i le taimi lenei. E ui i le laititi o le tatou EEZ po o le tatou nofoaga e tapue ai ia mo le sami o Samoa. Ae aumai pea e le Atua le faamanuiaga, o le omai o vaatetele a isi atunuu, e fagogota i le Pasefika atoa, ae ao mai iinei ia.

O le mea lena o lea e tupu i le taimi lenei. E lua kamupani ia, sa saina i lou taimi a o Minisita o Faatoaga, 2016. Ae omai kamupani ia tetele lava la e i tai o le Yuan ma le Deep Sea. O kamupani na, ua matuai le mafai ona gaoioi le uafu tele la e i Matautu ona ua faatupulaia foi ia galuega a le Kamupani o Uafu ma Taulaga. O lea sa outou faafofoga mai i saunoaga a le Afioga i le Minisita o Uafu ma Taulaga o lo o fuafua nei. Ua i aao o le afioga i le Palemia nisi o Talosaga ina ia fausia lava se uafu e faapitoa mo vaafagota. E omai uma i ai le selau ma ona tupu ia vaafagota la e tau faaofiofi i tai i le uafu la e i tai. E o i ai e fai ai tulaga o le loading, ma le off-loading ma saati ia... o le tatou mea lea e fai i le taimi lenei, e na ona aumai lava o ia, toe fafao i le container, ia ave. E leai se value added, e leai se tatou tupe tele o maua. Aisea? E le o process ina le ia iinei. Ae ua uma ona faatalanoa ma kamupani nei, ua uma ona fai feutagaiga, e aumai loa ia ia, ona fai loa lea o le tatou fale, e amata ai ona safu e ia. O lea ua uma ona fai feiloaiga ma le Afioga i le Minisita ma avatu pepa mo le faamaoniga a le Kapeneta. E faatuina ai nisi o tulaga na mo le lumanai.

O le tatou mataupu lea i Toloa. O Toloa o lo o i ai le lala a le tatou Ofisa o Faiga Faiva. Ma o Toloa foi lea sa i ai le lala o le tatou Marine Training Centre, lea ua i ai nei, lea ua sifi mai i i. Ma o lo o i ai le faamoemoe ma le talotaloga ina ia faamautu le tulaga lea, o mea lava tau faiga faiva. Ina ia matala mai ai fesoasoani e fia la e i totonu, o Faalapotopotoga uma a le lalolagi o lo o fia fesoasoani mai i faiga faiva, aepeitai o lo o taotaomia pea i lalo o le Matagaluega o Faatoaga.

O lo o faagasolo foi feutagaiga i le taimi lenei, ina ia fai, ina ia mautinoa o le taimi e fai ai fale ia, e maua ai foi galuega a tatou tagata. E pei o le mea lea tatou te auai ai, e ave o tatou tagata i o i Tutuila, i le Star-Kist ma le Van Camp. O le tatalo i le Atua ia alofagia le proposal lea. O lea ua i aao o le Matagaluega o le Matagaluega o le Va-i-Fafo o le tatou Malo, faatagisia ai loa i latou o la ua i ai le tupe. E pau lava le mea, e propose e tatou fai loa. O le tulaga lena o lea e tau avatu ai foi le talosaga a le Minisita o Aoga. O le tatou... o le vaa lena o le marine lea e koleniina a tatou tagata seila. E leaga ua mafuli a tatou seila e o e ave e faa-turisi, le faa-container ae tiai vaafagota.

E tatau ona i ai le curriculum lelei ina ia aoao o tatou tagata, ia iloa o e fai faiva i luga o vaafagota ma o e observe. E mafai ona matua mataitu lelei le tulaga lea i le faamoemoega lena. O le tulaga o le faatupulaia o galuega maua... o totonu o vaafagota ia i le taimi lenei, e tumu i tagata o isi atunuu. O vaa ia e i i, e latalata i le 100 lea e i ai i le taimi lenei, e leai ma se Samoa e i ai i luga. E tumu i Tuvalu, Vanuatu, Rarotoga ma isi tagata o isi atunuu, ae leai ma se Samoa. Aisea? E le i i ai se tomai, e o ai i luga o vaafagota nei e faigaluega, ae tetele totogi.

Afioga Hon Tapunuu Niko Lee Hang: Lau Afioga i le Fofoga Fetalai.

FOFOGA FETALAI: Ia malie lau Afioga i le Minisita se i avatu le avanoa ia Vaimauga 3.

Afioga Hon Tapunuu Niko Lee Hang: E leai e le fia faalavelavea le saunoaga matagofie a le Afioga i le Minisita. Ae o lea e tau e le Minisita, e fai si laititi o le uafu. Lau Afioga e pei sa faamamafa lau lauga i le Nofoaiga talu ai nei i le uafu. O lea sa faaali ai le tulaga lea ua fai si laititi o le uafu, ma isi aafiaga, i mea o galuaau. O lea la na fautuaina ai le uafu lea i Vaiusu, ona o le tele, toe malupuipua ona e leai se aau i ina, e na o le harbor foi lenei.

E toe faamanatu atu, pe le toe i ai se tou talanoaga... o la ua leva ona taatia fuafuaga i le uafu lea, e le gata la ona o lea e faalogologo atu pe i e tetele i ai le itumalo. A o le itumalo o lou uso lena ia Leatinuu. Pe le toe talatalanoa i le lelei o le tulaga o le uafu lea. E tele ai foi ni mea e mafai ona tuu ai i totonu. O le isi mea lau afioga, sa faatauaina foi i lau lauga le tulaga lea, e taula uma ai le tele o containers, e pei se hub e taulai mai ai containers, e faatalitali se avanoa, transhipment. O le tele foi o le tupe e maua mai i le tulaga lea. E pei o le faamaite atu lava lena. I lou talitonuga e tele faamanuiaga, e maua mai, pe a fai se tatou uafu. E le gata mo le itumalo, ae mo le atunuu. Ma lou faaloalo lava.

Afioga Leana Ronnie Posini: Lau Afioga i le Fofoga Fetalai...

FOFOGA FETALAI: E mo le faasaoina o lou taimi, lau Afioga i le Minisita. Toe tulai mai le sui usufono o Safata 1.

Afioga Leana Ronnie Posini: E faafetai tele lava i lau Afioga i le Fofoga Fetalai, e pei o lea o le a tau matau o le a me i ese le saunoaga a le Minisita. O mea ia o faiga faiva, faamolemole lau afioga, o tumau lava le faiga faavae lea o tulaga... O le matou itumalo, o le tele ia o mea ia o fugafuga, pei ona taua soo lava, ma maisu. O a ni faiga faavae a le tatou Malo o i ai i le taimi

lenei. Ae po o fea foi ua fai i ai ia container ia faapea o lea sa solitulafono le ave i fafo o maisu ma le fugafuga. Ma le agaga faaaloalo.

Susuga Hon LAAULI LEUATEA POLATAIVAO FOSI: Se e ava tele, ae leai ma se isi o le aualii ia na fesiligia mataupu ia e toe fesiligia i le taimi lenei. Ae ui i lea, o le a ou taumafai pea e tali atu, ona e faaaloalo tele atu. O le uafu lea e taua i Vaiusu, malie lau Afioga Papalii, o le a le faaiuga ua fai e le Faigamalo, o le faaiuga lena. Ma e le toe suia. O mea ia e tau faatulaga atu nei faa-Minisita o Faatoaga, o mea lava tau faiga faiva, ma e leai foi se tupe e tasi a lo tatou Malo e alu ai, o le meaalofa, o le mea sao lena. A o tulaga lava ia tau faiga faiva, o lea e tau faataavale atu nei, ina ia aveese mai le fleet la e i tai i le uafu, faagaogao le uafu na o tatou container, a tatou vaa meli ma mea faapena. A ua tumu tele tai, ia vaveese mai la... vavae mai le uafu lea e i tua o le maketi i tua o le Development Bank, o tatou vaa alia na. A o le uafu lea e tau fai, e o i ai a tatou commercial fishing vessels lea e taumafai atu nei. A o lea ua saunoa atu le Minisita o Uafu ma Taulaga, aemaise o le Minisita e a ia le faamoemoe, ia ou te iloa o le tulaga lena. Ae fua lava le poloketi i le manaomia, i le manaomia talafeagai. Ma ou te tautino atu, ua manaomia le aveese uma o kamupani ia, ia e lua ma luga o le uafu le la, ae ave i o, e faitalia ma pule latou, ma tele le avanoa e expand ai le poloketi o mea lava tau faiga i'a. O le a foi le mea lea sa e fesili ai Leana.

Afioga Leana Ronnie Posini: Lau Afioga o fugafuga ma maisu.

Susuga Hon LAAULI LEUATEA POLATAIVAO FOSI: Oi o maisu... O lo o faatalia nei le faamasinoga o i latou o lo o faia le solitulafono lea. Ua uma ona ave le pepa a le Kapeneta i le Nofoaiga lea na uma nei, ma le faamalosia e sa sa ona toe o e harvest ia mea nei, ona e solitulafono. O le maisu ma tulaga uma o lo o i ai, o sea cucumber, ma mea o le latou matafaioi o le vacuum lea o le gataifale. E lua gutu, e feula mai luma feula i fafo. Ona o lea i totonu ua mama uma le gataifale. A o le mea lea e tupu, tulou lava, e tatou te le taumamafa mea ia, seivagana, sea ma fugafuga ma mea masani. Aepeitai o lo o fai faasolitulafono, e nisi o alii mai fafo, lea e maua ai le container lea e taofi e Tuala i le taimi lenei. O la ua i luma o le faamasinoga. Ma le toe lauliliuina o le Tulafono, leaga e taaalo ai tagata i le mea lea. E faafaigofie e le Regulations, o la e toe tapui e le Regulation, ma o la e charge i le vaiaso lenei, le tagata e toatasi na maua foi. Na matou i ai uma ma le Minisita ia Olo, ma latou uma, o lo o faia pea le mea lea o le o ao faasolitulafono ia fugafuga. Ma e avatu ai foi i lenei itula i le faafofoga mai a le atunuu, o le solitulafono le mea lea o le ao o mea ia. E matua tele le aafiaga o le tatou siosiomaga. A o lea e taatia Faiga Faavae, ina ia taumafai ni auala, tatou te faafaileleina ai ma fai ni farming o mea ia. Pe a faapea e tele se maketi mo tatou i atunuu i fafo. Ona taumafai ai lea o se quota mo le

lumanai, pe tatala, ae tatala faa... fai ni taimi faatulagaina ona toe tapuni foi laia.

A o le fuafuaga lena o lea e i ai le tatou Matagaluega, o lo o faasolo le tulaga lena. I kamupani o le a outou aumaia le faamoemoega, ma latou te omai e fai le faafailelega fugafuga mo le atunuu, i mea lava ia tatou te le taumafaiina. O tatou lava mea masani o la e tatala le avanoa. O la tou te silasila atu ai, e mai lava i Lepea e tau i Satupuala, e laina uma atu a tatou fagu aliao, o tatou sea, o tatou fugafuga, o tatou loli, limu faisua, o tatou mea masani lena o lea e taumamafa ai le atunuu. O le tulaga i pole, o lea sa taua e nisi o sui, ioe, o lo o faasolo le tatou polokalame, vaafagota, leaga o i tonu le tatou local crowd lea. O tatou lea e le au i le zone 20 maila i fafo atu. O lea ua faapiipii atu, e 4 isi pole fou na e faapiipii, e 2 Savaii, 2 i inei, ina ia o le auvaa fagota i pole. Aua ne i toe o salalau, aua o le mea lena o lea e tupu ai le leiloloa ma le maumau o penisini. Ae o sao lava i le mea e i ai le taulaga ia, e mafai ai ona maua le latou tulaga...e maua ai ia na. Na lipoti mai ua amata ona maua le asiasi toe maua le apakoa i luga o pole nei. O se tulaga lelei ma o se tulaga pito i sili lena, ona atagia ai, le fua lelei o tulaga o lea ua tatou i ai, ona o tulaga o tatou alia.

O lo o ua faasolo le tulaga o tatou faafailelegalimu. O lena tou te silasila i ai, o le limufuafua, o le aliao, o le faisua o lo o faasolo faatasi atu lava ma tulaga ia e faasolo ai mea i le taimi lenei. Ma le faamoemoe o le tulaga lava lea mo le faatuputeleina o tatou taumafa. O le taimi lenei, o lo ua i ai exporter a tatou, o la ua amata ona ave le tatou ia a lalo i fafo. O nei i le aso, na lipoti mai o la e faaputu le lua tane o le tatou poge, o le paumalo, o le palumalau, ma tatou ia Samoa sa le mafai ona ave. O la ua mafai ona avatu mo le fofoga taumafa o le tatou atunuu i atunuu mamao. E oo foi ia tatou sea ma fugafuga, frozen tonododis packing. E avatu mo tatou atunuu i fafo, o lo o faasolo foi le tulaga lena, i le auala pitosili ona talafeagai i le fofoga taumafa o le tatou atunuu. O lo o faasolo pea a tatou, talo, fai, taamu, i tulaga faa-aisa o lo o ave i Ausetalia ma Niu Sila i le taimi lenei. Ona o le tulaga sei faatupulaia tulaga i maketi ma ia lava a tatou meaano, ona faigofie loa lea ona faatulaga mo isi atunuu i tua atu i le Malo tele o Amerika.

Na laga foi e nisi o sui usufono le tulaga o le pau o le paketi a le tatou fale suesue, le SROS. Ma e le faapea e tio, ona o lea e tau faasoa le tatou tupe. A o le tatou SROS, ou te le tau faamatalaina le galuega a lenei foi itutino o le tatou Malo. Na leva ona tatou faufau, na amata mai foi i lena Faigamalo ua uma atu nei. O se galuega lelei, le faamapue, faamaite, pe fau ai oloa i luga o isi oloa. O lea e i ai le tatou falaomata ulu, falaomata fai, falaomata talo, tatou avoka, tatou popo, tatou niu. O mea uma na, e leai lava se mea e tasi o taofia, o lea lava e agai i luma le faamapueina.

E ma e leai se agaga e faapea e tagisa foi, leaga o lea e tau faasoa. Ua uma ona toe faamatuu mai e le Malo le tulaga o le tatou Medcen Hospital lea sa i ai. Ua avatu i ina le lala a le SROS e faatulaga ai nisi o latou tiute e

faatuputeleina ai a tatou test ona o tulaga o faamai ma tulaga uma sa tatou i ai, e atoa ai foi ma nisi o test e faatuputeleina ai le puipuiga i fualaau faasaina po o drugs. O lea ua tatou vaai i le vaitaimi lenei, e tatau foi ona lelei le tulaga e see i ai le suesuega a le tatou Matagaluega. O le faamoemoe lava lea e tasi, afai e alu alu alu, ae matua mau le atunuu, o fea tatou te tua i ai? E tatou te tua i le storage faa-aisa. Aua foi o le storage faa-aiga e ono fitu masina, e store ai. Ua uma aso ia i le tatou mea lea sa fai, e tatou te tuli le taimi aua e vave ona pala pe a ave i fafo. O le taimi lenei, afai e mau le atunuu, o le tiute lena o le Malo. E faatau, store ae auauai i le taimi e talafeagai. E alu ai i luga ma alu i lalo le tau mai lea taimi i tatou maketi.

O tatou mailei puua o lea ua fai atu, o le fili numera tasi lea e taumafai mai nei e le tatou SROS, o lea e taumafai nei le auala lea. E tele faatoaga ua faaleaga, ona ua taalua uma manupapalagi, taalua ma puua ma mea eseese uma, e oo foi i moa. Ae pei e lilifa lava i le tatou poloketi lea. O lea ua ou fai atu, o au ia ua ou tapena, ua matuai ou tapena, e faamuamua lava faatoaga, o faiga faiva, ma lafumanu i le poloketi lenei. Ave uma uaea e pa uma mea, tuu i totonu mea fafaga, matua fafaga ia lava. Matua o e toto talo ma ufi, popo, o a uma mea, alu. O ai e fia agai i le sami? Agai i le sami. A o le agaga lena, ina ia matua faasopolia, aua ne i toe i ai se mea e tasi, e le toe maua i totonu o le tatou atunuu i meataumafa.

Ia, o le tulaga o lea ua taunuu mai foi nisi o fesoasoani e pei ona saunoa le Afioga i le Minisita o Vaa, o mafaufauga na o lea e i ai i tatou oloa e auina atu i fafo. Ua tilotilo nei i tatou export authority po o fea lea ua oo i ai, toetiiti lava uma, o la e faagasolo consultation, e le laiitii le tapenaga o le mea lena e aafia uma ma le trade, import and export, substitution ma mea uma, e tele le aafiaga. O lona uiga, e tatau ona faamautu lelei faalau a Matagaluega eseese uma e aafia, ae ua faamuamua le faatoaga ona o lea ua faamuamua fua o faaeleeleaga lea e ala ai ona lalamua au nei ma le Matagaluega e faaoga ai le tatou Esetete Tausi i le tatou fale lea i Niu Sila, e amata ai le polokalame lea ina ia maua maketi e ave i ai.

O lea foi na saunoa le Afioga i le Minisita o Vaa, o le a le mea e tuu ai le tatou trade ma Toga lea e latalata mai. O Fiti lea e faafiufiu ona o lea e manao lava Fiti na o latou. Ia, o Niue ma isi atunuu uma, a o lea e i ai tatou vaa, e pule tatou i tatou vaa, o lea e lava tatou cargo ship. Tatou te le faalagolago, ma e o se tulaga sili ona taua lea i lau matau. O lea e fai nei le tatou tonu ma Tutuila. A lea e tou te vaai i ai? O vaiaso uma, vaiaso uma, le pauna talo, le pauna ia, o a uma mea ia tatou te lau i Tutuila, lea e maua mai ai le faamanuiaga i le tatou tupe Amerika ma le tatou exchange o lea e maua mo le taimi lenei. A faapea o lea e mafai ona tatou faia mo le Malo o Tutuila, ia o le a le mea e tuu ai le tatou faasolo atu loa i isi atunuu ma le tatou tau aapa mamao fua, tatou aapa mamao fua i isi atunuu mamao. Ua outou silasila i le taimi lenei i le fuata ulu lea ua fotu, a o le fuata moli ua lanusamasama uma le atunuu. O fea la e fai i ai? O lona uiga e tatau ona tatou saili, fai le galuega

a le Matagaluega e saili maketi, fai le galuega a le aufaifaatoaga e faatuputeleina ma ia maua ai le tamaoaiga mo le tatou atunuu.

O le tatou STEC lea foi sa faailoa mai e nisi o sui usufono i tatou eleele, ioe, e avatu lava le agaga faafetai i le Alii Pule o lo o i ai nei ona o lana taumafaiga ua leva ona tauasa mai. E tele le faaletonu o la e taumafai ai nei lenei Faalapotopotoga a le Malo, ona ua ave uma fanua ave i isi Matagaluega ae tutu ai lava faapea le STEC ua matua leai lava ma se mea e tasi o fai i ai. O lea e taumafai atu nei le tatou faigamalo e tausaili mai kamupani e faipaaga ma le STEC. O kamupani i'a la ia e lua na faamatala atu e ave i o i Mulifanua, ia, ua ave i ai le tuualalo, o kamupani i'a la ia e tatau ona omai e paga lelei e faaoga fanua ma lisi fanua faatutu ai fale ma fai uma ai latou mea ia e fai. O lea foi ua faasalalau atu le tulaga o le biomass lea sa i ai, saili foi se isi kamupani e sau e run ae paaga ma le STEC, e faapena foi le vilimaa, o le mea lava lea e tasi. Faiga paaga ae maua le tupe ae omai tagata faipisinisi e run le mataupu.

O nei i le faaiuga o Aokuso pe a matala tatou alavaa, e taunuu mai ai se kamupani moa tele mai Ausetalia o le latou faamoemoe, e omai i inei e faatu mea uma mo le sapalaiga o le moa taumafa lava ia mo le tatou atunuu. Ma e le laitiiti le poloketi lea, ua uma ona faatulaga. Ou fai atu, omai, omai se i outou silasila i le mea o le a fai ma outou vaavaai. O le taimi lenei, o la e ua amata e Frankie, toetiiti lava uma le fale la e fai ai le fale fasimoa a Frankie amata ai another medium and scale, e faatulaga ai le mea lea o le slaughting house e ave uma i ai moa ia e uma loa ona tuufua ona leiloa loa lea po o fea e ave i ai ae ave la e tafasi i i.

A o le faamoemoega lenei lau Afioga i le Fofoga Fetalai. O le taimi lenei sa tatou faia le fuamoia mai fafo, o lea ua i ai tatou fale fuamoia. Ona tatou aumaia lea o le one day old le tamai moa foi lea ona aumai lea faatuputele i ina ona maua lea o le moa tino. A o fuafuaga lea e i ai, o fuamoia, fertilize eggs, e aumai i inei e faaoga incubators e faatupu ma maua ai le tamai moa ma faalautele atu loa i le atunuu. Sa ou faasilasilaina muamua foi i isi au faasilasilaga ia tou te le fiafia ai i luga o le Soalaupule e faamalamalama ai mataupu ia e tau faapulapula atu. Ona tufatufa loa lea i tatou nuu ma itumalo, e fai lava le falemoa a le itumalo, maua le meataumafa, maua le fuamoia e service ai manaoga nei e faamatalatala atu ina ia taofiofia le tulaga o le tele o tatou tupe e auina atu i fafo.

Saunoa nisi o sui usufono i le tulaga o galuega maua i totonu o le tatou atunuu. Lau Afioga i le Fofoga Fetalai, ou te fia afea le pito lea ona o le upu lea faapea o le unemployment. Lau Afioga i le Fofoga Fetalai a tuufaafegai le mea lenei o tagata o lo o galulue latou i a latou faatoaga, e le laitiiti le pasene o i latou o lo o self-employed latou mo latou. A o le faatulagaga foi lea o lea e avatu ai le tatou poloketi lea o le \$1 miliona, e le i lalo ifo o le \$300, \$400 galuega fou mo lou itumalo. E le gata i Komiti, e le gata i le

Ofisa, tagata faigaluega ae faapea i latou uma o le a galulue latou i totonu o latou galuega ma a latou faatoaga e taavili ai le tupe mo latou.

O nisi saunoaga sa saunoa ai, o mea nei e tau o auala i o faatoaga, farm roads, o lo o i lalo o le tatou Polokalame o le SAFPROM. Ua outou silafia o le polokalame lenesi o le SAFPROM o se polokalame ua faasolo mai le tatou Faletupe Tutotonu, faletupe i fafo o le World Bank a le Lalolagi, ma o lo o faasolo pea taualumaga o faamanuiaga nei mo le tatou atunuu. E 404 i latou ua faamanuiaina i le motu tele i Salafai, ae 921 i latou o le a faamanuiaina i Upolu nei. O le tauaofai o le faamanuiaga atoa o le a maua e le atunuu atoa pe a faapea e maea ona roll out le faamanuiaga lea, e \$12,419,999. O mea tau fua o faaeleeleaga e \$1,600,000. O tulaga tau faigafaiva e \$57,000. O tulaga tau mea fafaga, e \$2,500,000 i le motu tele i Salafai.

O le tatou motu tele nei i Upolu, o mea tau faatoaga e \$3 miliona, o mea tau faigafaiva e \$1 miliona, o mea tau mea fafaga, e \$3 miliona. Lau Afioga i le Fofoga Fetalai ma le faafofoga mai foi a le atunuu i le poloketi lenesi o le SAFPROM, ia outou lava onosai, leaga e le o faigofie le galuega a le Matagaluega i le tau faatulagaga o feagaiga faava o Malo o lo o feagai ai le Matagaluega ma le World Bank. E ese foi aiaiga e aumai e le World Bank, e le taitai fetai i isi taimi mo le tatou aufaifaatoaga. E faigata tele, ae o lo o taumafai pea le Matagaluega ina ia faaulufale i finagalo o le aufaifaatoaga, ina ia latou taliaina le faamoemoega. A o totonu la o le poloketi lenesi o le SAFPROM, o lo o i ai auala mo farm roads. E pei ona silafia o lea sa faasolo le galuega a le tatou faigamalo na uma nei. Lelei, e le faapea o se mea faaletonu, o la e i ai uma auala ta la e i ai e gata uma i le mea e nonofo ai tagata. A o le faamoemoe lea ua faatulaga i tatou farm roads, access farm road deeper down, e le faataina, leai nisi mea na o le scoria ia malo ma fai alavai, ma ia saofia le aufaifaatoaga e agai i uta i faatoaga. Lea foi sa ou faamamafaina lava i lau tautalaga faipea faipea, o le agaiga o le metotia fou ma le faamaite lea e alu i le taimi lenesi, o le tatou onosai lea e faaoga tatou masini mo le taimi lenesi, mechanization.

Ua tatou vaai nei i le suiga o le olaga ua le tutusa le malosai sa tatou i ai le tatou amoamo ma tupulaga fai mai i le taimi lenesi, ese le mafaufau ma le mindset o tamaiti. Ua matele i le feosofi i le vaalele ma o loa i fafo e tau le apu ma tau le moni lea ua sau i Ausetalia. Ia, ua tau le maua le agaga lea sa masani ona tatou ola ma tutupu mai ai. O le a la le tatou mea e fai? Tatou liliu i le isi pito, faaoga masini e avatu e faafaigofie ai le galuega, na o le pau lena o le auala mo le taimi lenesi.

Lau Afioga i le Fofoga Fetalai ma le mamalu o le Palemene, o lena foi ua i aao o le tatou Matagaluega o le Va i Fafo le talosaga i le Malo o Saina, o lo o i ai le latou polokalame la e faasolo i le taimi lenesi o le SACEP e aumai uma ai masini aua le tatou faamoemoe lea. A i ai se taimi ona outou afifio lea tou te asiasi i uta i Nuu ona outou silasila loa lea i le galuega la e fai, le galuega na faasolo mai lava i lena Nofoga o lea foi e faasolo lava i le taimi

lenei. O le itu taua o le mea lenei o le faamalosi. Fai uma ai Fale Suesue, o la e ua i ai ma le tatou fale meaai a manu lea na ou tau atua, we must have a feed mill, e tatau ona i ai le tatou fale meaai lea e maua ai meaai e tino lelei ai puaa, tino lelei ai moa, tino lelei ai i'a ma tino lelei ai ma povi. A o le tatou mea lea e i ai, seiloga lava o atiga faatoa aai nai mea. E leai ma se isi mea i luga atu, e sali sali le popo ua leai ni peepee ua uma ona fafaga puaa i popo.

O lea tatou te vaai ai i le taimi lenei ona tatou nonofo foi lea ma taofi le niu inu, le niu inu lea e ave i fafo. O le fuafuaga lea ua fai e le tatou Matagaluega, o le a toe tatala le niu inu e ave i fafo, ae ese lona category e fai ai, le tatou niu lea e faafeusuai e lapoa, ae tuu pea le tatou popo Samoa toto lea sa i ai e maua ai le peepee. Leaga o le niu inu lena, e tasi le niu ae \$6 i Niu Sila, a o le popo lea ua tatou taofia nei fai mai le toe ave se niu i fafo, e tasi le popo ae le au i se \$1 lona tau.

Ia fua ane la e outou le tamaoiga lea ua misi talu le mea lea. Ae tatau ona faatulaga le isi laasaga ia tatala pea le avanoa ia maua le tatou peepee i le tatou popo a ia maua foi le tamaoiga i le tulaga o tatou tupe maua i le tatou niu inu lea e masani foi ona ave e le tatou atunuu.

O le tulaga lena o lea ua i ai fuafuaga a le tatou Esetete Tausi lau Afioga i le Fofoga Fetalai, ua ou manatu e faaiu atu ai se tala a lenei Matagaluega i nisi foi o fesili ma mea uma sa lagalaga i finagalo. O le faamoemoe lava ia ina ia tatou toe taumafai e toe faamapue lenei foi Faalapotopotoga a le tatou Malo sa pito i sili ona tatou faatuatua i ai i futia ua sola ma aso ua alu aua le atiaaina o si o tatou atunuu.

E faaiu sau tala lau Afioga i le Fofoga Fetalai i le paia ma le mamalu o le tatou Palemene ma le tatou Fono lenei. Le paia e ma le mamalu o lena Itu o le Malu, i lau Afioga i le Sui Taitai aemaise foi le paia maualuga o tupu ma ee, tamalii ma failauga, aemaise a outou Afioga i sui usufono, o sui usufono foi ua filifilia e itumalo uma ua pale mai lenei Nofoaiga i lena Itu o le Malu. Ou te taofi ua mavae atuvasa o le tatou savaliga na fai nei, ae pei ona ou fai atu o le tatou savaliga, e le i faigofie, leaga sa tatou asaasa i tai fasia o le le femalamalamaai ma le le fetalitonuai. Ae o lou lava talitonuga na o au, o la outou saunoaga tatou te galulue faatasi, ou te iloa o le ute lea o faigamea i le tatou Tala o le Tupe lenei. Ona o le tatou Tala o le Tupe lenei, o le tatou uluai Tala o le Tupe lenei o le a atoa ai taimi e faatino ai tiute o le Malo i le Tala o le Tupe lenei leaga o isi tatou Tala o le Tupe muamua e fai ae tolofia, e fai ae amusia, e fai foi ae tulai i se tulaga o se autafeloa sa poloka ona o le tele o tatou finauga na fai.

A o lau tatalo ma lau faaoololomaau i lena Itu o le Malu, o a mea ua tutupu i fatia ua sola ma aso ua alu, tatou faatuatuanai ae tatou agai mo le lumanai. Ia outou talia ma le atoatoa le tulai atu o lenei faigamalo e tauave faigamalo mo le atunuu i lenei Nofoaiga. O lau lea faaoololomaau. Ua fai le finagalo o Samoa ma ua fai le finagalo o le Atua e ave a matou tagata faatauvaa e

tauave le atunuu. Ou te le toe fia manatua upu ma tala, ou te le toe fia savali foi i ala o amusia ma mea uma sa tatou i ai, ae fai lava le tagata ma ositaulaga ona o mea uma na tutupu. Ua tatou le mafuta ai ma le tou Taitai le Susuga ia Tuilaepa ma le Tofa ia Lealailepule, ona o le a? O a tatou finauga na fai, a o lea lava ua fai lava le taunuuga ua taunuu i ai mea uma. O a foi upu ma tala sa tatou feeseeseai ai, o lau tatalo ma le agaga faaaloalo, atonu ua tataua ona lava i i.

E faamalulu atu foi i nisi o taimi i le tou matau mai i lou le malolo i luga o le ea i lou taumafai e talitali atu, lou taumafai e faapulapula atu, faamalamalama atu ina ia toa le atunuu. A tatou filemu ma tatou toa, e filemu Samoa, filemu le aufaigaluega a le Malo lea e faafogafoga mai, leaga o le mea lea e tupu i le taimi lenei, o lo o fai pea le faiva o matematega ma le mautonu le aufaigaluega a le Malo po o fea e tutu ai, leaga o lea e taumafai atu le Malo, a o le a le upu lea e fai? E le sao, e le moni, e sese. Lafo foi upu i lo matou vaivai ma lo matou faatauva matou te le iloa fai se Malo.

Le paia ma le mamalu o lena Itu o le vai i lau Afioga i le Sui Taitai ma le mamalu o le paia maualuga o lena Itu o le tatou faigamalo, ou te manatu, o le taeao fou lenei pe a pasi le tatou Tala o le Tupe lenei. O a mea uma na tatou feeseeseai ai, tatou faagalo, ae lafo atu iina, e le aoaia e Laupua Tamafaiga, o lena e i ina le tofa ma le faautautaga. E le sopo foi le pule ao ma le pule po pe sopo le tai i le eleele, o lena e i ina le tofa ma le faautautaga e faatonutonufolau ai lena Itu o le malu, a ia outou talia. Ia outou talia le tulai o le uluai tausala o Samoa e avea ma Palemia o le atunuu i le Nofoaiga lenei. Ia outou talia ma le aloaia le faaiuga a Samoa na faaaloalo uma ai le itupa o alii ae ave le matou faaaloalo i le Sao Faapito e avea ma Taitai o le Malo.

O le tatalo lena. Ia outou talia le faaaloalo na tulai ai le Afioga i le uluai tausala aua le vaaiga o tupe a le tatou atunuu ma le uluai tausala i le vaaiga o faamasinoga a le atunuu. Se faaaloalo ina ova, se faaaloalo ina tele, sala ina ova, o le suiga fou lena mo le taeao fou lenei mo le tatou atunuu. E pei o lau upu tomua, o le Malo na valoia. O tatou i le Nofoaiga lenei, o le faaauuina o le Malo na valoia e o tatou matua mo Samoa ma lona lumanai.

O le tatalo lena le paia ma le mamalu o lena Itu o le Malu, ia faifaatasi ma fusi faatasi le fau o malo i le tatou galuega.

Ia, faaiu sau tala i le paia ma le mamalu maualuga o le aufaigaluega a le Malo, alo i o outou faiva manaia. E leai se agaga e tasi o le tatou faigamalo e ese i ina ese iinei, pe matou te omai loa faamalolo uma nisi. E leai se upu faapena ma se manatu. A o le tatalo, ia tatou tutufaatasi e tauave le atunuu, o le faigamalo ua uma ona filifili i ai Samoa e tauave Samoa mo le lumanai. O le matou foi lena tatalo, ina ia alofagia outou faiva alofilima e tautua ai le tatou atunuu.

Ia, le tapuaiga a Samoa o lo o faafogafoga mai i tafa e fia o le lalolagi, aemaise ai foi le tapuaiga a le aufaigaluega tofofi a le Atua, faafetai le tatalo, faafetai le tapuaia o faiva o le tatou atunuu.

Ia, lau Afioga i le Minisita Lagolago Maiava, malo le galue. E le fai mo au le Nofoa lenei, e i ai lou taeao, ae malo onosai i le ta galuega. O le fua e te lulu e te selesele. E le mafai foi ona faagalo le uso ia Vaele Paiaaua Iona, o lea ua momotu faafuasei e le Atua le mafutaga ma ona foi faiva alofilima sa feagai ai i le asaasaina o upufai o Malo.

Ia avea foi lenei avanoa ou te faafeiloai aloaia atu ai i le sui usufono o le itumalo o Gagaifomauga 2, faafetai ua tafa lau tofa e te sau e te fesoasoani mai. Gagaifomauga 1, 2, 3 o le aiga, e tasi le tatou matua i Finao ia Lavea. E ui lava ina faasapasapa le ta tuafafine, ia aua e te popole, e mafiafia lava le pau e tali tiga, ae fai lau galuega, fai lau galuega ia te oe le Tagaloasusu, lau fetalaiga Samauga i Lalokava e tua i ai Finao.

Ia, faaii sau tala lau Afioga i le Fofoga Fetalai, ia manuia tele lau faigamalaga. Matou te tatalo ma tapuai atu o la e ua valaau le paia ma le mamalu, le tatou au lagolago foi ma tulaga masani, ia matou tapuaia lou alofaiva, faafetai o lea ua tau mai le Afioga i le Tamaitai Palemia, o lo o tapena foi le vaa na faoafolau aua le faamoemoe.

Ia manuia tele le faafofogaaga a si ou itumalo pele, Aiga Sa Tupua ma Aiga Sa Malietoa, ia mu le ta taulaga mo le atunuu. Ia fai tatou ma ositaulaga mo Samoa, o ifo e fai faalelei le tatou ofisa lenei ua fai, tanu ia lava i tai le sami, tapena uma mea uma ou te alu atu i le Aso Faraile e fai pay o le aufaigaluega ma fai pay o le Komiti. E tatalo pea e le aunoa i le Atua. Lo tatou nuu i Aopo, faafetai, faafetai tele le lagolago, ua mavae taimi o fefulituaaiga, sunui ala o taua, omai e fusi le fau o malo e tautua ai le tatou Malo.

Ia, e faaii sau tala, ou te iloa o la e faalogologo mai si au pele, mom, thank you. Faafetai tele mo mea uma e tapena mo au, o au ia na o le ofu lava ae o oe e sui mea uma ma tapena. Thank you to my children and my grandchildren, papa is good, papa is okay. Ia, manuia Samoa, manuia le faafofoga mai a si o tatou atunuu. Manuia le Fonousu ona o Iesu. Amene.

FOFOGA FETALAI: Ua faamalo faafetai saunoa i lau Afioga i le Minisita o Faatoaga ma Faiga Faiva aemaise foi le STEC ma le tatou Vaega foi o Suesuega Faasaienitisi ia ma le tele o isi matata pei ona malele i ai lau Afioga i le Minisita. Ua faamalo lava le tofa malo foi le tanoa, ua faafofoga foi ma le totoa le paia o le Maota aemaise foi o le faafogafoga mai a le atunuu, leaga o lea lava ua taatia i malae le finagalo o lau Afioga i le Minisita aua lava le toe faafoisia o le atunuu i le tatou tofi o le tatou eleele i le mea sa amata mai ai tuua ma matua. O lea lava ua manino foi taiala, ma faamoemoega uma aua lava le tatou toe foi i o tatou eleele o i ina e foia ai le tulaga ua i ai le tau o le soifuaga i lenei vaitau. O le mea lea, malo faafetai, malo foi galue. Ou te talitonu foi o lea ua nofo tapena foi le tele o itumalo

aua le tatou fuafuaga i le uluai seleselega o lea ua tapena ma sauni mai i ai tatou itumalo, aemaise foi o le tatou \$1 miliona lea. A pasia nei le Tala o le Tupe, ou te iloa o lea ua faafofoga ma le totoa le atunuu. O le mea lea, faafetai le tofa, malo foi le galue.

Ia, o lea ua oo mai le tatou faasologa i lau Afioga i le Sui Palemia, ia, e faigata foi le Matagaluega o Tiute, aemaise foi o le Matagaluega o Lafoga ma tupe ao aua le tamaoaiga o le atunuu, ia o le avanoa leni o lau Afioga.

Afioga Hon TUALA TEVAGA IOSEFO PONIFASIO (Sui Palemia): Faafetai tele i lau Afioga i le Fofoga Fetalai mo lou avanoa. Ia o le a mamalu pea ia i le aitu i le aoa i le afio o lau Afioga i le Fofoga Fetalai, afio lau Afioga i Le Ao Mamalu o le Malo o Samoa lau Afioga Tuimalealiifano Vaaletoa Sualauvi II ma lau Masiofo, Afio lau Afioga i le Sui Tofia ma lou faletua. Faafetai foi ua taunuu mai i fanua le vaa na folau, a o lo o mamao pea lago o vaa na faoafolau i le afio o le Afioga i le Tamaitai Palemia. Faafetai i le Atua o lo o maualuga le aoina o le masina i lou soifua laulelei.

Eetai pea ma papaaao le mamalu i susuga i faafeagaiga taulagi i so o se fatafaitaulaga o lo o faafalelemalu ona o le Atua ma Lana talalelei. O i latou ia o lo o tauasuina le vai o le ola i totonu o nuu ma afioaga eseese aua se manuia mo a taeao o tagatanuu o si o tatou Malo.

Afifio le mamalu o Minisita o le Kapeneta, afifio Minisita Lagolago, afio le Sui Taitai o lona Itu faapea le mamalu o sui usufono uma o le Palemene o Samoa, afio le Afioga i le Faamasino Sili, susuga i alii ma tamaitai Faamasino o le Ofisa o Faamasinoga, le mamalu o le Ofisa o le Fono o e o lo o lima ma vae i ai galuega ma faamoemoega uma o le tatou Fono, le Fonousu lea a Samoa.

Susu le mamalu i Ofisa Sili o Pulega o Matagaluega uma a le Malo, le aufaipisinisi ma le mamalu o Pule Sili o Ofisa Tumaoti o le Malo o Samoa, talofa, talofa lava.

Ae o se faatalofa faapitoa i si ou itumalo o Gagaemauga 1, Saleaula ma Lealatele. Afifio Alii e Lua ma le Maopu, afio le Aiga Sa Peseta, susu le Usoalii, alaalatai le mamalu ia Saleaula ma lau faatufugaga ma lou faletufuga, o le tufuga pule, o le tufuga toatamai, o le tufuga alofa ma upu ia te oe le Pule.

Le paia i le afio o le Faalagilagi, Tuala ma lou falesefulu, le afio o Sala ma lou falevalu, usoalii ma tulaga o aiga, le mamalu i la oulua faautaga Tevaga ma Vaifale, le Aiga Salemuliaga, le Suemalo Lauano ma le Afio o le Aiga Sa Lauano ma le Faleaana.

Alofaaga mo le nofo tatalo a faafeagaiga o si ou itumalo, le galuega a le Atua o lo o outou faia, ao ma le po. Talofa e e le na o lea. Ua matou matauina tou te taimua ma taulamua i mea lelei, tou te faufautua ma faamaopoopo, e tautai outou o le filemu i taimi o vevesi, o galuega ia a Iesu na ia faia i le lalolagi nei, lea ua outou faia, faafetai, faafetai ma faamalo.

E momoli atu foi moomooga alofa i tama ma tina matutua o si ou itumalo, tina ma tamaitai, tama ma teine o le tupulaga lalovaoa, o outou o faamoemoea o outou aiga, Ekalesia ma nuu mo le lumanai. Faamalo. Ua maua foi tala faanoanoa ua valaau le Atua i se tasi o tina matua i si ou afioaga i Samalaeulu le tina ia Telesia Samilolo, 93 ona tausaga. O se tasi foi lea o Toe Ulutaia, o le toetagata o le matou nuu. Ia ua valaau le Atua ia te oe le tina, ia, o le valaau foi lea ia Tevaga ma Vaifale, aemaise le mamalu i le Aiga Salemuliaga o lo o i ai nei. Faafetai i le Atua mo lou soifua, ua e malaga, ae faafetai ua uma ona e faamanuia mai.

Ua faapopo a o ni aso ua a ua le tuua aso folau. E ui i le tetele o timuga ma lagilagia le tau, a o lo o lagomalua pea lou sa Samoa a o tatou folau i le tele o faafitauli ma famai eseese o lo o pipisi mai. O lea ua faataumuliai nei le tele o faafitauli ma faafatiatamai sa tatou faafeagai ai ma ua faataumuaava atu nei le tatou sa i le tau faamaeaina o nisi o galuega fai, aemaise le faamautuina ma le pasiaina o le Tala o le Tupe e pei ona tatou i ai nei. E momoli atu le faamalo i le Fono a Samoa, e oo mai lava i lenei itula o tatou folau mai pea i aso ua tea i lavasiga o tatou fonotaga ma tulaga uma sa i ai, ia o lo o matauina pea o lo o lavapapale pea ma mau le tofa. Faamalo. Ia tatou laga laia o le vaa o manu ae faafao le vaa o mala aua ua to i tua Apolima, ua tino lo outou soifua laulelei. Papae ia i paga tia o le tautiaga, aua Samoa o oe o le aomamala. O ou paia faa-Talalelei, o ou paia faalemalo ma ou paia faaleatunuu, o le a ou le toe oo i ai aua e taoto ao se alao. E leai la se tautai e toe fagota sagolegole i ai aua o Samoa o le atunuu tofi. O le laau foi ua maea ona tofi, tofa ae o le a faga tonu le malama ma vili tonu le ifi a Maina, e tusa ai o nisi saunoaga a le mamalu o nisi o sui usufono, e fia faalauteleina ma toe fia faapupula atili i se motugaafa a lou nei sui usufono.

Lau afioaga i le Fofoga Fetalai o le a ou amata atu i le faata mo pusa oloa o le tatou X-Ray, Container X-Ray Scanner e pei ona laga i nisi o saunoaga. Ia o le mataupu lea sa laga e le sui usufono mamalu o Sagaga 2, ia o se tali atu i le fesili na tuuina mai, e tusa ai ma le faafesili. O lea ua maea ona fai ia le faaiuga a le Kapeneta, e tusa ai ma le tulaga e tatau ona fuatino i ai le tulaga lea ina ua maea ia tauofoga.

O lea foi ua galulue ia le Matagaluega o Tiute ma Tupe Maua mo le faamautuina o le faamatuu mai o le masini e pei ona i ai le Lipoti a le Ofisa o le Suetusi a lo tatou Malo, e tauala lea i se atoatoa o le faaaogaina o nei masini, aemaise o le saogalemu o e o le a faafaigaluegaina i lenei masini aemaise foi ia le atunuu o le a agai i tulaga o le tuuina mai o oloa ia ma tulaga faapena e faaaogaina ai lenei masini.

Mo le silafia e le Palemene, ia o le mafuaaga ua ala ai ona tuai lenei faamoemoe ona sa... pei foi ona fofoga atu muamua sa fesiligia e le Kapeneta nisi o vaega patino o lenei masini po o specifications ina ia mautinoa lona saogalemu ona sa i ai feteenaiga o tulaga foi lea pe aumai i luga o se masini

e aumai faatu i lona tulaga, pe o se masini foi lea e aumai i luga o se loli ia ona mafai lea ona feaveai.

E pei o i ina lea sa i ai le toa lea, lea na tapa ai loa ia le Suetusi Sili, ina ia toe silasila tasi i ai i tulaga o le tauofoga po o sologa lelei mea uma. O lea la e avatu ai le tala ma le fiafia i lenei taeao ua uma ona tuuina mai ia lana suesuega, ia ua malilie foi ia le Matagaluega nei, aemaise foi le Sui o le Ofisa Sili o le Uafu faapea foi le Minisita, sa fai foi le fesootaiga ma le ADB o latou ia o lo o auina mai ai le masini, ia ua leai ia se latou teena, ma o lea ua tuuina atu ai loa ia le fautuaga i le Kapeneta ina ia pasia loa ia le tatou masini ae faavavevave mai, ua manaomia e lo tatou atunuu.

O le tulaga la na o lea ua i ai, ia ae manatu ia taatia mai ia tou fanoga, o le a galulue i se vave e tatau ai, aemaise o le saogalemu o lenei masini. O fuafuaga o le masini a taunuu mai, o lo o i ai foi ia tagata faapitoa e malaga mai e faapipii, ia ona faapena foi lea nisi e malaga mai ina ia faatino aoaoga ina ia mautiloa lona faagalueina ma lona faatinoga o e foi o le a galulue i le masini.

O lea foi o lo o i ai nisi fuafuaga a le Matagaluega o Tiute ma Tupe Maua aemaise lava ia le itu lea o le saogalemu. Ia o lea foi ua vaavaalua ia le Matagaluega nei ma le Matagaluega foi o Leoleo i le tulaga o le toe amatalia o aoaoga o le K9, ia pei o le tulaga lea i taifau se i tulou, ina ia amata nei aoaoga, ona ua manaomia lava ia le auaunaga lea a taifau.

Ia o isi fuafuaga o lo o i ai i le tatou Matagaluega, ia ua uma foi ona feutagai ia le uafu i le Minisita ma Ofisa Sili ia faapea foi ia le matou Matagaluega, ua i ai se manatu o le a taumafai ina ia faatu se pa, ina ia sio le tulaga o lo o i ai ia le auaunaga a le Tiute ma Tupe Maua ina ia talafeagai ma saogalemu ia oloa a le atunuu o lo o faapena ona auina mai, ona o lea foi ua i ai ia le fale o le a fauina, o lea ua amata nei le galuega, o i ina o le a faatu ai ia le tatou scanner ia po o le tatou faata lea, ia o le a tauala uma mai lava ia oloa e omai i totonu e agai mai i le faata, ona aumai lea i totonu o le pa lenei ia po o le Customs Control Area, ina ia saogalemu oloa nei, ia aemaise o le faatinoga o galuega a le Tiute, ia mo ni suesuega foi e fia faia. Ia o le tulaga lea i le tatou faata.

Ia e tusa ai foi ma nisi o saunoaga a nisi o sui usufono e uiga i le mataupu e tau tiute ma lafoga e faaee i luga o oloa o lo o faaulufaleina mai. Ia mo le silafia e le mamalu o le Palemene, o le fesuiaiga o le tau o tiute ma lafoga, e pei ona faaee ai i luga o oloa, o se faaiuga lea i se iloilogaga a le Matagaluega nei. E afua nei iloilogaga ona ua i ai le manaomiaga o le fesuiaiga ina i ai le fesoasoani i nisi o anavatau o le tatou Malo, e fesoasoani ai i le unaia o le Soifua Maloloina o tatou tagata. Ia ae faapea foi ona unaia pisinisi tau amatamata i totonu o le tatou atunuu.

O nei iloilogaga sa tuuina atu i le Komiti e pulea tapenapenaga ma le iloilogaga o le tupe faatatau i tiute ma oloa po o le Revenue Board. O latou ia e latou te iloiloaina ma tuuina mai se fautuaga i le Kapeneta ia aua tau talafeagai o ia

oloa. O le masina o Ianuari 2023, o lo o fuafua e faamamaluina ai tau ia o le suiga o tiute ma lafoga i oloa tau meataumafa e pei ona taua muamua e aofia ai faguina suamalie, aano o manifasi, ia e tele ai le gao.

O le mamoe ma le moa o lo o i ai nei se pau e tusa ma le 5% i le 10% e amata mai la ia Ianuari i le tausaga fou ona i ai le pau lea o le moa, e tusa ma le 5% i le 10%.

E tusa ai ma le fesili a le sui usufono o Anoamaa 2, o le maualuga o pasene e siitia ai le tau o tiute ma lafoga o le excise ma oloa tau meaai, e 14% ma e patino lea i faguinu suamalie o le a siitia mai i le \$0.53 i le \$0.60 i le lita. O lona uiga e le o se siitaga tele. O a tatou meaai suamalie, o lo o i ai se siitaga e 5 agai i le 7% i oloa e pei ona taua i se vaega o lenei lipoti. O lona uiga, sa tele se auiliiliga i lenei galuega ua fuafua tataua i ai se siitaga. Ia po o le pau foi e pei ona outou faafofoga mai ai.

E manatu e taua mo le silafia, o lo o i ai foi sina suiga e tuutiitia ai ia le tau o tiute mo fualaaui faisua e le o maua i Samoa nei e pei e i ai ia le celery, broccoli, ia ma nisi. E le gata la i meataumafa, ae o lo o aofia ai foi ma oloa faaeletoroni, e pei ona i ai telefoni ma masini komipiuta, computer ia feaveai po o laptops. Ia e le o toe po malae i le manaomia tele o oloa nei ina ia unai ai le faagasologa o pisinisi, aemaise foi o galuega ma auunaga faale-malo, i le taimi foi e pei ona tulai mai ia le Koviti, ia sa manaomia lava ia computer ia ma electronic faapenei, ia mo le faaauauina o le auunaga a le Malo. Ia e le gata i lea, ua vaai foi le manaomia e le fanau aoga ia aua foi le faaauauina o aoga ia pei o le mea ua oo i ai aoga i le taimi nei, ia ua le gata i le peni ma le api, ae ua manaomia ia le computer ia ma le access i luga o le internet e pei ona outou silafia.

Ia ona oo mai lea i le Sin Taxes, ia po o lafoga ia e faaopoopo i luga o oloa ma auunaga. Ia lau afioga i le Fofoga Fetalai o le a ou le taua ia le Faa-Samoa o le upu Sin ona ua uma ona faasa e lau afioga. Ae sa tele lava ia le felafolafoaiga a le Maota i le Lafoga lea. Ia ae silafia foi, o le upu lava ia Sin e le na o se upu faapalagi. O le Sin e i ai foi ia le Faa-Sipaniolo, ia e i ai lona uiga e faapena foi le Faa-Italia. O le upu foi lea e faaogaina e le World Health Organisation. Ia e pei o le upu lea ua faaogaina ona o le tele o uiga o le upu ma e tau talafeuga le upu ma le ituaiga lafoga lea.

Ia a faapea foi la ua faauiga e tatou o le agasala, ia atonu lava e sao le sui usufono mai Samatau, ae silafia foi e tatou o le natura faale-tagata, e i ai le manao. E ese le faigata e vaai loa i se mea ilotilo i se mea pe nanau i se mea ona i ai loa lea o le manao, ioe. E maua loa i le manao sosoo ai ma le mea foi lea ua i ai le lagona o le faaososoga. A maua loa e le faaososoga ua i ai le manao e faatino. O le faatinoga foi lea, o lea la e pei e i ai le popolega. E faatino loa faapea e tupu ai le agasala atonu o le isi lea vaega ua faaigoa ai taxes nei o Sin Taxes. But o le agaga lava lea o se upu faafaigofie, o le Sin Tax, o se lafoga faaopoopo ua aofia ai ma tiute ma le excise tax. Ua

faaee i oloa e tele lona aafiaga o le soifua maloloina. Ia atoa foi ma oloa e tele lona aafiaga i le siosiomaga.

Lau afioga i le Fofoga Fetalai, ia e pei lava ona ou taua i le taimi ua mavae, e le o mapu lava ia le Matagaluega i ana iloilogaga ma ana Faiga Faavae ina ia faamautuina ma mausali ia le tasi o ana matafaio le unaia lea o le saogalemu, le soifua maloloina aemaise o le soifua manuia o nai o tatou tagatanuu o Samoa.

O le galuega vaavaalua lea a lenei foi Matagaluega, ia ma le Matagaluega o le Soifua Maloloina. E mo le silafia e \$45 i le \$50 miliona o tatou tupe o lo o aoina e le Excise o taumafa. O le 40% o le tatou Excise o taumafa. O le isi 60%, ia o le ava malosi ia ma le tapaa. E feoloolo foi sina tupe la e maua i le avamalosi ma le tapaa.

O le fesili po o le a le mea e le taofi ai pea, o le isi lea fesili e pei ona fesili mai ai le sui usufono o Vaimauga 2, ia atonu ou te tau le tali i le tulaga lea. Ae e i ai le manatu, e le o meaai e leaga, e pei ona taua muamua, o le manao o le tagata soifua, faaopoopo loa i ai ma le faaosoosoga, manao loa e faatino. Ae ao foi ona silafia, o lo o i ai foi ia Tulafono Faava-o-Malo, po o International Trade Laws, ia e le mafai ona pule tatou. E tatau lava ona... o lea ua o tatou member, o le World Trade Organisation, ia o lo o i ai foi Feagaiga faapena Faava-o-Malo, ia e le mafai ona o tatou faapea atu, aua le toe aumaia ia mea na leaga o lo o i ai lava tagata o lo o fia taumamafa i le mulipipi e pei o se faataitaiga, ia ae e i ai tagata e pei o au e faatasi lava ona ai mulipipi ona o le mafuaaga, e pau lava ia oe lau taumafa fuafua tatau.

Ae o le agaga lava ua ala ai ona fesoasoani atu ia le Matagaluega o Tiute ma Tupe Maua faapea ma le Matagaluega o le Soifua Maloloina, ina ia faafaigata ma tuutuu i lalo faaosoosoga ia, pe a vaai atu ua taugata. O le mafuaaga lena ua fai ma faataugata.

Ia o le isi mea lau afioga i le Fofoga Fetalai, ia ua toe laga mai foi e nisi o sui usufono, ia aemaise le sui usufono mai Aleipata Itupa i Luga, le tulaga lea o lafoga a faifeau. Ia e faaeteete foi le tu atu ona o lea o lo o afio mai ia le afioga i le Taitaifono o le Komiti o le...

Susuga Maulolo Tavita Amosa: Lau afioga i le Fofoga Fetalai, pe maua se avanoa...

FOFOGA FETALAI: Malie lau afioga i le Sui Palemia, se i tuu atu le avanoa ia Sagaga 2.

Susuga Maulolo Tavita Amosa: Faafetai mo le avanoa, semeamanu o le a see ese ma le tulaga ia o tiute o meataumafa. Faafetai i lau afioga i le Sui Palemia, o lea ua matau atu ua i ai nai fetuunaiga i tiute o meataumafa.

E pau lava le mea lea ou te toe faamanatu atu sa ou taua i lau lauga, pei e patino i le tulaga tonu lava lea e faatoa e saunoa ai nei, e vaavaalua la outou

matafaioi ma le fatuaiga tausī ma le Matagaluega a le Soifua Maloloina. Ou te toe tuutuu atu lava i tafatafa o lau afioga ma le Matagaluega, ia le tulaga foi lea o se tiute faapitoa po o le 5% mo mea ia e manaomia mo le faafaileleina o le fanauiti. Ia mama, maua a latou paper napkins, a ua faaletonu ia le suasusu o tina tulou, o la e affordable le susu lelei e fafaga ai le fanau.

Ia e pei ona nai mea ia e tuutuu atu i ou autafa ia ae faafetai o lea ua amata ona vaai atu i tino o tulaga lelei o le 5% lea ua faapau mai i isi mea ia e pei o le moa ia mea faapena e na ona toe faamanatu atu i lau afioga, ae faafetai tele lava mo lea mataupu.

Afioga Sulamanaia Fetaiai Tauiliili Tuivasa: Lau afioga i le Fofoga Fetalai...

FOFOGA FETALAI: Ia mo le faasaoina o lou taimi lau afioga i le Sui Palemia, se i tulai mai ia le sui usufono o Vaimauga 1.

Afioga Sulamanaia Fetaiai Tauiliili Tuivasa: Masalo e lagolago tele ia lenei usugafono i le Matagaluega a le afioga i le Sui Palemia ona e tasi lenei o Matagaluega e sili ona pele i le sui usufono lenei ona sa tautua ma oo mai ai i totonu o le Palemene.

A silasila foi i le tulaga e pei ona faailoa mai e le Minisita o Tupe, ia o lea e le i ausia le... pe 1% lea e le i ausia ai ia le Tala Faatatau lea e le i uma ona i ai lea o le faanoanoaga. Ae e pei sa tele lava lou talanoa i le tulaga lea i le lafoga lea ua faaopopo po o tiute. O le agaga o le popolega o le sui usufono, o le agaga faafetai foi o le sui usufono, o lea ua sau le tou Tala o le Tupe e leai se tulaga o le siitia o le GST, ia po o lafoga foi o le PAYE. Ae o lea la ua toe mafatia i le tulaga tau siitia i tiute o oloa. O le popolega lena o lou sui usufono.

Po o le a le tulaga e taumafai ai lau afioga i le Minisita e alofaga i ai, o lea e toe pau lava ia le tulaga mafatia o tatou tagata, o le ala lea. Ae ona o le tulaga e tau faatele ai ia le tamaoiga... o le Matagaluega lenei pe o le 90% o le tupe lea e faagai ai ia le tatou atunuu e ao mai e lenei Matagaluega. E momoli ai le agaga faafetai.

Ae ua ala la ona tulai mai ia le tulaga lea, ia ona ua e afio atu fua taofi fua isi lafoga ia ua uma ona pasia e le Palemene lenei, na e i ai ia tulaga na i lafoga a e ua fai i ai le finagalo o le Palemene, pe la o lea ua e tau oo lau faasoa i le tulaga lea, ae o ai e mafatia? E mafatia lava o tatou tagata i meai.

Ou te le talanoa i le igoa o le lafoga po o le a le mea la e tupu i le Palemene. Ao lou popolega lena, o lea e tatou te taumafai e faamama avega i le atunuu, ae o lea foi ua toe avatu. E le mafai ona tuu, faapea e tuusaunoo ai le filifiliga a le tagata ia. Ia a outou silasila la i le tulaga lea o le a toe tuu ai i le atunuu, ia e pei o le popolega lena lau afioga i le Fofoga Fetalai.

O lea na ou fai atu ai, a faapea la o le a, o le a la le mea e taumafai ai e aumai? Ae le tuu loa aua e ala la ona o e totogi, ma o e fai leaga o la ua aumai. Ae e develop loa le mea lea na saunoa ai le afioga i le Minisita o Faatoaga, o loa e fai ia le moa Samoa, o e fai ia le mamoe Samoa, o e fai le... e faapena i le povi Samoa aua la ne i toe tepa, aua e ala la ona... ona ua aumai fua.

Ae o le agaga e avatu ai foi le tuualalo, e matuai tetee lava lenei sui usufono o lea ua leai se lafoga i luga o le mea lea sa popole ai... o le popolega o le sui usufono, ne i alu alu paulia ia totogi o le afaigaluega a le Malo, aua e vaai atu i le utiuti o le faaso. E muamua lava ave le faaso i le Ao o le Malo ma tatou o Taitai o le atunuu ae oo ifo i lalo i totogi o le afaigaluega, o le popolega lea. E avatu le tuualalo, e manaia le faasafua pea o lea tulaga, o lea lava e manaia le mea lea e i ai. Ia ma lou agaga faaaloalo lau afioga i le Fofoga Fetalai.

FOFOGA FETALAI: Ia o lea ua maua le finagalo o le sui usufono mamalu. Ia...

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai...

FOFOGA FETALAI: Ia se i tulai mai ia lau afioga i le Sui Taitai o le Itu Agai..

Tofa Hon Laufo Fonotoe Nuafesili Pierre Laufo: Pe maua se avanoa semeamanu o lea o lo o faia se malologa puupuu a le afioga i le Sui Palemia. O le tulaga lea pei sa afea foi i se manatu, ona o lea e aumai e pei o le Sini Autu o le faamoemoe lea, o le sii o lafoga ia po o tiute i oloa e faaulufale mai i le atunuu ina ia taumafai e fofu ai ia le faafitauli lea o le NCD. O lona uiga o le fesootaiga lea o lea e taua ai le siitaga lea. Ia taumafai e fofu ma tuutiitia ia faamai le pipisi lea e i ai le suka, toto maualuga o le kanesa ma isi mau gasegase faapena.

O le mea taua lea sa ou... sa agai i ai ia lau tautalaga i le taimi ua tea, ia lava la le seleni lea o le a aoina mai, e faatino ai polokalame ia o le Soifua Maloloina. Ia aua o seleni ia e pei ona silafia e aoina i o i le Matagaluega o Tupe Maua, mai i o i le Tiute, ia ona tuuina mai lea i i le Ofisa o le Tupe. O le Ofisa la o le Tupe e faia ia le faaso. O le mea la lena e ala ai ona ou talanoa i le tulaga lea, ia lava la le faaso ma lava le seleni e tuuina atu, i le Matagaluega o le Soifua Maloloina, aua la polokalame ia e tuutiitia ai ia gasegase faapea.

E pei ona ou talanoa atu e taua aua o polokalame ia e matauina o lo o faatino e le Matagaluega o le Soifua Maloloina, o polokalame foi ia e faalauiloa ia aafiaga tuga o taumafa faapea. Ia aemaise foi la tapaa ma le meainu

suamalie, ia ma isi taumafa o taumafa o lo o tele ai le gao ia o mea faapena, ia faatasi ai la ma polokalame foi ia e faatino ai le faamalositino mo exercise. Ia aua o mea ia, a tatou le agai e unai malosi mea ia, ia e tatou te fiu lava e sii ia lafoga nei, e alu lava i luga ia le fuainumera o latou e gasegase i ituaiga faamai ia.

Ae e pei o le fesootaiga la lea, i le Ofisa o Tupe ia lava la le seleni lea e ave i o, ia aua e le faapea e ao le tupe i o i le Tiute ave sao lea i le Matagaluega o le Soifua Maloloina. E auala mai i totonu o le Ofisa o Tupe, ona faatino ai lea o le faaso.

E pei o le fesoasoani atu lea o se manatu.

FOFOGA FETALAI: Ia malo, faafetai. Ia tulai mai lau afioga i le Minisita, le Sui Palemia...

Afioga Hon TUALA TEVAGA IOSEFO PONIFASIO: Ia se i ou tali muamua atu i le saunoaga a le Sui Taitai o lena Itu. E saolele lava ia le saunoaga. O le mea tonu lava lea o le naunautaiga ia lava le faaso. O se taimi ona ou talanoa atu i le agaga o le Matagaluega ina ia maua ni tupe fou. O lea foi ua tuu atu i totonu o le Paketi o le agaga o le Paketi ia faamaite ia ni tatou alagatupe fou, ia o se taimi ona oo atu ai lea o se faamatalaga, ae o le sootaga lea e pei ona e saunoa ai, o le sootaga lelei tele lea.

E sao lelei lau afioga, e agai uma lava ia fesootaiga agai i le Matagaluega o Tupe, ia ona faapena lea ona faaso mai i totonu o le Matagaluega o le Soifua Maloloina. O le vaavaalua lea ou te talanoa ai, ona o lea foi e vaavaai matou i le felagolagomai o Matagaluega ia e 2. E pei foi ona matou galulue ma Leoleo i le tulaga o le saogalemu ma le tautaofofiina o fualaa faasaina ma tulaga faapena, e mafai foi ona faapena lau tala i le matou galulue ai ma le Matagaluega o le Soifua Maloloina, ina ia o matou vaavaai foi i le manaomiaga o le tulaga o i ai le naunautaiga o le soifua maloloina.

O lo o i ai ia le latou Nutrition Profile, ia o lo o taumafai foi latou i le tulaga lea e faaitiitia. E pei o le mafuaaga lena. E le o faaso e matou ni tupe, ae o lo o maua ia le matou fesootaiga lelei ma o matou galulue faatasi. E pei o le agaga lena o lea na ou taua ai ia le Matagaluega lea o le Soifua Maloloina.

O le tulai mai o le sui usufono mai Vaimauga ma saunoa mai faapea o le agaga foi lea o le a le mea e le taofi ai loa. O lea faatoa uma ona faamalamalama atu le tulaga e le mafai ona taofi lena, ona o lo o i ai ia Tulafono International Trade Laws ma Treaties faapena e tatau ona o tatou amanaia. O lona lua, e le faapea o le a taofi loa taofi.

O lo o matou fesootai foi ma le Ofisa o Faatoaga. E fuafua foi le matou galulue ma fetuutuunaiga, o lea foi e vaavaai atu foi i le uso a Minisita o Faatoaga ma Faigafaiva, i lana ia atinae ina ia faatele ia fualaa aemaise foi o le tamaoiga o mea tau faatoaga i totonu o le tatou atunuu. Atonu o le taimi lea po o le isi 6 masina i le isi tausaga, ia ua amata ona fua mai ia lana

galuega lea e fai. O i ina la, e tatou te toe iloilo ai. O na e silafia lelei e lau afioga ona o oe foi le isi tagata e masani tele i totonu o le Matagaluega lea, o le galuega foi lea o le fetuutuunai.

O lea ua sii i luga ia fualaa, se i taumafai e faaaoga ia le tatou kapisi i inei, ae tuutuu i lalo ia le moa, ona o aiiaiga faale-tulafono a le tatou fefaatauaiga lea na ou talanoa atu i ai. Ae atonu e i ai se aso, e tuuloto pea lau fautuaga ma lau tuualalo, atonu e i ai se aso e tele mai moa a Frankie lea ua saunoa ai le Minisita, ia ona taofiofi loa lea o le tatou import.

Ia se i toe foi i tua lau tala i le tulaga lea i le lafoga a faifeau. O lea e matou te le i faalavelave lava i le taimi nei ona o lo o agai pea ia le Taitaifono i tulaga o Komiti o lo o faapena ona faatamilo. E pei ona silafia na aumai le Talosaga i le Palemene i le Fofoga Fetalai, mo se faaopoopoga i ni nai vaiaso, se i faamaea lelei le galuega. E ui lava ina tele ia faatalatalanoaga sa faapena ona faatino ina ua o matou omai, ae o le manatu lava ia o le Komiti, leai o le a tuu atu pea ia le Komiti e faatino ia le latou galuega o le faatalatalanoaina o e foi e tatau ona faatalanoa i le mataupu lenei, ia ona toe lipoti mai foi lea i le tatou Palemene i se taimi ua le toe mamao. Ia o le tala lea i le tulaga lea.

Afioga Fuaava Suluimalo Amataga: Lau afioga i le Fofoga Fetalai pe maua se avanoa faamolemole...

FOFOGA FETALAI: Ia malie lau afioga i le Sui Palemia se i tuu atu le avanoa i le sui usufono mai Aleipata Itupa i Luga...

Afioga Fuaava Suluimalo Amataga: Faafetai i lau afioga mo le avanoa. Ia ona o lea ua taua e le afioga i le Minisita o le Sui Palemia ia le sui usufono o lenei itumalo e faapea o ia lea sa laga ia le tulaga lea i tax a faifeau. Ia ou te le o mataua na agai i ai se faamatalaga a lenei itumalo.

O le isi tulaga, o au o le sui o le Komiti o lea e alala mai ia le sui usufono o Vaisigano 1 o le Taitaifono o le matou Komiti o matou lea e lauliliuina le Tulafono lea, ia ma e faamalulu atu ai ona e tatau ona faasao ia faamaumauga a le tatou Maota e le i oo i ai se faamatalaga a lenei itumalo i le tulaga lea ma le agaga faaloalo, faafetai.

FOFOGA FETALAI: Ia malo, faafetai...ia se i tulai mai

Afioga Niuava Eti L Malolo: Lau afioga i le Fofoga Fetalai...

FOFOGA FETALAI: Ia se i tulai mai lau afioga i le sui usufono o Vaisigano 1

Afioga Niuava Eti L Malolo: Ioe lau afioga i le Fofoga Fetalai, ona o lea ua oo le saunoaga foi a le afioga i le Sui Palemia i le tulaga o lo o taoto i ai le galuega a le Komiti. Ia ae e pei o le agaga lena o le Komiti e pei ona i ai, i le tulaga foi o le faaaogaina lipoti ma tulaga na faatino e nisi, e fai ai le faaiuga e pei e le o le agaga lea o le Komiti.

O le ala lea sa faamalulu ai i le tulaga lea ona e manaomia le agai pea o le Komiti, e faatalanoa ma tagata o le atunuu ina ia mafai ona aumai le lipoti o lo o aumai faafofoga foi ia sui o le Komiti, ao saunoa mai ia le atunuu e a i latou le tulaga lea. O le ala lea, ae masalo o le Fonotaga o lumanai, o le a faapea ona tuuina mai se lipoti a lenei Komiti. Ma lou faaaloalo tele lau afioga i le Fofoga Fetalai.

FOFOGA FETALAI: Ia se i tulai mai lau afioga i le Sui Palemia e faaauau lau saunoaga.

Afioga Hon TUALA TEVAGA IOSEFO PONIFASIO: Ia faafetai tele, faamalulu atu i le sui usufono lea, atonu ua sasi. Ae o le faasaoga o le sui usufono mai Sagaga 2 pe sao lea. Ia lelei, ou te fia talanoa lau afioga i le Fofoga Fetalai...

Susuga Maulolo Tavita Amosa: Lau afioga, ia ua ta masani i mea ia o le tuuaiga o ita i mea faapea e le Sui Palemia. Ia aumaia ma au lena mea e vave ai ia le tatou Fono, Faafetai.

FOFOGA FETALAI: Ia...

Afioga Hon TUALA TEVAGA IOSEFO PONIFASIO: Ia faafetai, o tupe fou lau afioga leaga o lea foi na fesiligia ia le tulaga o tupe fou fuafuaina e aoina. Ia atoa ai ma lafoga tuua ua le mafai ona aoina. E silasila ia le mamalu o le Palemene i tupe ua fuafua e aoina mai i le Matagaluega o Tupe Maua ma Tiute e tusa lona aofaiga ma le \$556 miliona. O se vaegatupe tele ma o se faasiliga mai i le tupe po o se target sa tuu e aoina i le tausaga nei.

O le lui foi lea i le Matagaluega ona o lo o i ai le toa, o lo o i ai foi le manatu o le Matagaluega i le matou fesootaiga, e mafai ona matou aoina le \$556 miliona i le tausaga faaletupe o le a sau nei.

I le itu i lafoga tuua o lo o fuafuaina e mafai ona aoina e le Matagaluega i le tausaga faaletupe fou, e tusa lea ma le \$20 miliona. O tupe ia o aitalafu o lafoga tuua o lo o fuafuaina e aoina e le Matagaluega. Masalo o lea foi na ou talanoa atu i le isi vaitaimi, ua i ai tulaga o aitalafu ua leva ona i ai, sa le mafai ona aoina i tausaga e tele. O lo o faataoto nei le workplan po o fuafuaga foi a lenei Matagaluega i se taumafaiga ina ia mafai ona toe aoina tupe nei. O a outou Afioga e le o ni tamai tupe. Tau ina ou faapea atu, i le va o le \$60 i le \$80 miliona tupe tuua e le i aoina. Lea la ua i ai le manatu o le

Matagaluega nei, o le a taumafai e ao i le \$20 miliona i le tausaga faaletupe lea o le a sau nei.

Ia, o lo o i ai pea le lototele i le Matagaluega nei. E i ai le manatu o le a galulue punouai lenei Matagaluega ona o lea ua lafo mai e le Tamaitai Minisita o Tupe aemaise foi le Ofisa Sili o Pulega ma le Matagaluega o Tupe lenei lui mo matou, ma ua matou talia ma le fiafia.

Lau Afioga i le Fofoga Fetalai...

FOFOGA FETALAI: Ou te faamalulu atu i lau Afioga i le Sui Palemia, aemaise foi o le folasaga aua foi mea na laga e sui usufono mamalu o le Maota, ia, talu ai ua tatou taunuu i le taimi e fai ai se tatou malologa mo le 15 minute, o le mea lea o le a faataatiaese Taulumaga o le Fono Aoao Faitulafono mo le 15 minute.

Na faataatiaese Taulumaga a le Fono Aoao Faitulafono mo lana malologa i le itula e 4:00 i le afiafi ma toe faaauau i le itula e 4:28 i le afiafi.

FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono.

Faamalo faafetai le lavapapale i le tatou Maota. E faataatiaese le tatou galuega mo le malologa o lo o saunoa le Afioga i le Sui Palemia, o le Minisita foi lea o Tiute ma Tupe Maua.

Ma le faaaloalo ou te tapa lau Afioga mo lau saunoaga.

Afioga Hon TUALA TEVAGA IOSEFO PONIFASIO: Faafetai i lau Afioga i le Fofoga Fetalai. Ae le i ta le malologa sa i ai se fesili taua sa tuuina mai e le sui usufono mo Sagaga 2 e fia avatu ai sina tala puupuu lau Afioga, e tusa ai ma le faafesili i le tulaga foi o lo o aumai ai le tuualalo, ia fai alofa foi le tulaga i le tau o nappy se i tulou, susu faapea oloa, e faatatau lea i nai tina o lo o taumafai e faafailele a latou fanau.

Lau Afioga i le sui usufono mo Sagaga 2, na ou lagona lava le taua o lau tuualalo i le taimi na e saunoa mai ai, sa saili foi po o le a le tulaga o i ai ina ia maua sou malamalama. Ia, ma ou te fia faailoa atu le tulaga o i ai le kalifa po o le tariff i le taimi nei. O nisi o oloa tau meaai e faapea o lo o fai ai taumafa i aso uma ia, o lo o aoina mai nei, e leai se kalifa o iai po o se tiute, o taumafa ia e i ai le eleni, o le tuna, o le araisa ma le falaoamata, ia atoa ai foi ma le apasusu. O le tulaga o nappy o lo o i ai le tiute e 5%, a o le tiute foi lea it's a concessionary rate, ia po o se rate foi lele ua pau.

Lau Afioga, e taua tele lau tuualalo, leaga e moni lava, ae o lo o i ai foi le naunautaiga e faataua le tuualalo i le tulaga lea o lo o i ai foi se fetuunaiga, ua uma foi ona fai se fesootaiga vavalalata lava ma le o lo o Sui Tamaitai

Pule i le taimi lenei, o lo o i ai foi le avanoa e mafai ai fetuutuunai le nappy. O le mafuaaga ua ala ai ona i ai pea le tamai tiute lea, ona o le tulaga foi lele o le waste, ia, o le toe aoina mai o le... pe a lafoai le nappy o tamaiti, o le mafuaaga lea lena e i ai le tiute. Ae mafai lava ona ou faailoa atu e mafai foi ona aveese le concessionary rate lea e 5% ae faa-duty free loa le nappy. O lou ai lea o le aso. Faafetai.

E fia faailoa foi le tulaga o oloa, leaga o lea foi na fesili le sui usufono mo Vaimauga 1 i tupe maua mai tatou sin taxes po o lafoga faaopoopo ia. I le tausaga faaletupe o le 2020/2021 i le 2020/2022, o meaai ma meainu suamalie, e \$13.5 miliona le tupe na aoina. O pia ma ava malosi e \$15 miliona. O tapaa, e \$28.1 miliona. Ia o lena, o le tele lava o vaega o tupe nei o tupe maua o lafoga faaopoopo nei o le tapaa.

Lau Afioga i le Fofoga Fetalai, e ao pea ona ou toe faaopoopo atu i le saunoaga a le Tamaitai Minisita o Tupe. I le aso ananafi, e 99% le tupe ua mafai ona aoina o le target lea a le Matagaluega lenei o Tiute ma Tupe Maua, a o lea lava e toe lua aso ia e totoe. E i ai se manatu, a fua atu i ai i le 10 masina talu mai tulaga na tulai mai ai le Malo lenei, e le o le tausaga atoa na aoina ai le tupe lenei. A fua foi i tulaga o le vavao o le Koviti-19 ma tulaga sa i ai le tatou atunuu, e lockdown loa e le mafai ona ao se tupe. O le mea lea e tau avatu mo le silafia, o le galulue punouai o lenei Matagaluega. Ua le gata i le tuliloa o tupe sa tataua ona aoina ma ia toe sau i luga le aofaiga o le tupe e aoina, a o lea lava ua matauina le tulaga o le atoatoa o le auaunaga.

O lea lau Afioga i le Fofoga Fetalai ma le tatou Palemene, ua i ai se manatu o le Minisita aemaise foi le taumafai atu o lenei Matagaluega, e pei lava o le Matagaluega lea sa tele ai foi le sai mai o le tatou Malo ma le tatou Palemene, e i ai le manatu e le toe manaomia e le Matagaluega lenei le tulaga o le tauvalea, e le toe manaomia foi e le Matagaluega lenei ni tuuaiga o le tulaga foi lele o oloa faasaina, o fana ua faaofi nana mai, o fualaa ma oloa e le togotia tiute. A outou Afioga, o i ina lea e ave i ai le faamuamua ona o le matou naunautaiga ina ia tulai mai le Matagaluega lea o se Matagaluega e mafai ona faatuatuaina, o se Matagaluega e mafai ona sulu i ai le atunuu ma maua le faamamaavega ma maua le auaunaga, o se Matagaluega foi ia tu matila le tulaga o le faamaoni pei ona fai o se tasi o latou tiute tauave. Ma e i ai lava lou taofi, ia aumai le tou faatuatuaga, masalo o le a taumafai atu pea i se taumafaiga e gata ai, e le gata i le aoina o tupe aua le tamaoaiga o le tatou atunuu, a o le tulaga foi o le auaunaga. Ia o le vaaiga taulai lena mo le agai i luma.

Ae faafetai ma faamalo i tuualalo ma fautuaga uma e pei ona tuuina mai.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, pe maua se avanoa?

FOFOGA FETALAI: Ia, malie lau Afioga i le Sui Palemia, se i tuu atu le avanoa i le sui usufono o Vaimauga 1.

Afioga Sulamanaia Fetaiai Tauiliili Tuivasa: Ona o le taua tele o lenei Matagaluega i lenei sui usufono, masalo lea sa ou lauga ai foi i le tulaga i avanoa po o faatumutumuga o Matagaluega. Ae matau foi i lenei Matagaluega, o lea e le i maua lava le e faauluulu i ai. E pei o le popolega lena. Ina ua saunoa le Afioga i le Tamaitai Minisita o Tupe ananafi po o talaatu ananafi e 99%, sa ota lagona lava lea o le faanoanoa, ona o le Matagaluega lenei o le tele o tausaga e le i pau lava le tupe maua. Ae sa ou tatalo lava i le Atua o lea e i ai nai aso ia e totoe pei o taeao e uma ai. E i ai lava le faatuatuaga e pa i fafo le seleni lea a le Matagaluega lea. E 1% e le... ae o le agaga lena sa naunau ai lenei sui usufono o le i ai o faatumutumuga o Matagaluega. Aua ana faapea o lea e i ai le Pule, ia ua pasae i fafo le paketi, tulou. Ia a o lea e oo mai lava i le taimi o lo o taumafai pea le Matagaluega. Pei o le agaga lava o le sui usufono ia i ai lava le Faauluuluga, ae o le isi Matagaluega lenei o lo o talia pea o lea o le a atoa le tausaga e... ae le gata i le Matagaluega ia le popolega ma le leai o se isi e faalogo i ai. E moni o la e i ai faatumutumuga i tamaitai ia o lo o faatumutumu i ai le tiute ma le lafoga, a o le faatumutumuga lava i le ulu, pei o le popolega lena o le sui usufono. Ae ina ua saunoa le Afioga i le Minisita o Tupe toe 1%, ia o le pasene lena masalo pe \$5 i le \$6 miliona, ae i lou ia faatuatuaga, o taeao po o nei lava e ausia ai le tupe lea, leaga o le Matagaluega lenei a e silasila i ai lau Afioga i le Minisita, o la e matatia ai le sui usufono lenei o le Vaimauga i le taimi lenei. E le naunau la e... ae naunau ia maua pea tupe maua aua le tautuaina o le Matagaluega ma le tautuaina o le tatou Malo, e tua tu i ou aao. E pei o le agaga lena i lau Afioga, ia aumai le faatuatuaga, toe o taeao, e oo atu ua faamalieina le tatou Malo e ala i le galuega o lo o fai, ma vave faatumu le faauluuluga o le Matagaluega. E le gata o lo o faatali le Matagaluega, ae o tagata foi la sa apalai po o ai, o lo o talia pea, o lo o popole pea po o le a le taimi. Na saunoa foi le Afioga i le Minisita o Faatoaga, ia e sao lava, ae pei o matou nei lea pipii i le public service, matua popole le public service, matua popole i le taimi lenei po o le a le taimi o le a tuli ai se isi, o le a tuli ai se isi. Ia pei o le agaga lena i lau Afioga...

FOFOGA FETALAI: Ia, o lea ua maua le finagalo o le sui usufono mamalu. E talitonu foi o lea ua uma ona saunoa i ai le Kapeneta i lea tulaga. Se i saunoa lau Afioga i le Sui Palemia.

Afioga Hon TUALA TEVAGA IOSEFO PONIFASIO: Sa ou matau pea le lagolago o le sui usufono lea i tulaga uma tau mataupu tau tiute ma tupe maua. Ia atonu o lau Afioga lea o le a avea ma Shadow Minister o le tatou Matagaluega lenei. Ia na e afio mai ta galulue, a e afio atu ona e nofo

lea i fafo e faatali atu i fafo o lou potu. Ae talia le fautuaga ma tulaga uma ua e aumaia, ae...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e le logomalie saunoaga ia leaga o se faipule e nofo i fafo. E talosaga atu ai i lau Afioga i le Minisita, a e vaai mai loa i le sui usufono o le Vaimauga, ua tataua ona e sau i fafo ae ou alu atu i totonu o le mea lena e te i ai.

FOFOGA FETALAI: Ia o suaga lava e faapena, ae faaauau le saunoaga a le Sui Palemia.

Afioga Hon TUALA TEVAGA IOSEFO PONIFASIO: Ia, e le aveesea ai ma faaitiitia le taua o fautuaga. O lea ua afio mai le Tamaitai Palemia o ia e fitoitonu i ai le Matagaluega lea ua e aumaia e uiga i CEOs ma tulaga faapena, masalo o le a le oo i ai sou leo. A o le tulaga foi o lo o i ai le faagasologa o galuega a le Matagaluega i le taimi lenei, o lo o gasolo lelei, i lalo foi o le atamai aemaise foi o le vaavaaiga a le o lo o tulai mai i le taimi lenei e tauave le tulaga o le Sui Ofisa Sili o Pulega. Ne i te i ua faaitiitia lana auaunaga ma lana tautua, ae ia au ia e matua selau pasene. Faafetai.

Ou te fia talanoa i le ava malosi leaga o lea na laga foi e lau Minisita Lagolago ma tuuina mai foi lana faafetai ia maua nei o lea foi sa aumai lana faaaloalo e tataua ona fai sau tala e faafetaia ai le Pulega o le Komiti o le ava malosi. Faafetai i lou uso a Minisita. Ia, o le tulaga ua i ai, e pei ona silafia e le atunuu, e le i faigofie le galuega sa i ai le taumafaiga ina ia saili le tulaga o le compliance po o le tulaga o le usitaia lea po o le mulimulitaia e fale gaosi ava malosi le Tulafono o lo o i ai. Sa uia uma lava tulaga o le Tulafono. E toeitiiti lava tausaga atoa o tau fai lava le tulaga lenei, talu mai ona maua le tulaga o le vailaau i totonu o ava malosi nei, lea sa i ai loa le taofiga, sa fetau lava foi le taofiga lea ma le taimi o le SOE, ia o lea na fesoasoani foi e maua ai se isi malupuipuiga o le tatou atunuu ina ua le tele le ava malosi e taumafaina. Ae o le galuega lava ia sa feagai ai ma le Komiti lenei, e le i faigofie, sa gasolo uma lava i tulaga sa tataua ona uia, na iu lava ina matou faafesagai foi ma feutagai ma kamupani gaosi ava taitoatasi ma fofola foi i ai le atugaluga o le Komiti. Sa faapena foi ona ave i ai le avanoa e saunoa mai ai ma tali mai foi i tulaga e pei ona avatu e le Komiti Faatonu e Pulea le Ava Malosi. Ma o le taimi nei la, masalo o lena ua manino faasalalauga, ae i ai le talitonuga, a i ai se taimi ua mafai ona comply ia po ua toe tapena mai foi kamupani nei i le tulaga foi lele ia usitaia uma aiaiga o le laisene. E leai se mea o taofia ai o lo o tatala pea le avanoa. Ae pei ona saunoa foi le Sui Taitai o lena Itu, ia o lona atugaluga foi lele i le tulaga o le pulu ne i te i foi ua toe aliali mai le toe gaosia o pulu. E i ai lava le talitonuga, ia ou te le iloa po o sana ia lea faamaite po o i ai se mea o ona silafia, ae ia au lava ia, a toe

tulai le tulaga lena, ia o lo o i ai foi le tatou Tulafono mo i latou o lo o faia lea gaoioiga faaletulafonoina.

O le tulaga i le siitia o totogi o le aufaigaluega a le Malo ma le isi mataupu na laga e Samoa Talks po o le talanoa lea i le va o Amerika Samoa ma Samoa nei, o lea ua afio mai le Tamaitai Palemia e agavaa i ai le mataupu lea. E faamalulu atu ai i si ou uso a sui usufono mai Sagaga 2, ou te iloa o lea ua afio tonu mai le Palemia e fitoitonu i ai le mataupu lea. Ae ou te faamalulu atu ona o le tulaga sa i ai tatou anapo ne i matau mai ua ou faasagatau atu ia te oe. E leai, e faigata leaga o oe o le vagana o tulafale, o oe e vaatele foi i le Atua lau tofa, o oe o le tagata faiupu. Sa ou faapea o le a ou tali atu, a o lea ua ou tulai atu ma avatu le mataupu lena, e tau ina ou faamalulu atu ai i lau Afioga.

Lau Afioga i le Fofoga Fetalai, ou te iloa ua leai nisi mataupu e faasaga i lenei Matagaluega, ae ua maea ai foi i i lau folasaga i lenei itula. E talitonu ua faamalieina foi sui usufono mamalu i se tali foi ua tuuina atu. Atonu a le atoatoa, ia faaatoa ifo e outou i ina, o lena e i ina le tofa ma le faautaga. Ae i se taimi toe avatu foi se isi tala, toe maua sou avanoa, ae mo le taimi nei, tau ia ina ou faafetaia lau Afioga i le Fofoga Fetalai, ia alofagia pea e le Atua lau Afioga, ia foi pea i vaatele o le Alii lau tofa aua le faafoeina o le tatou Palemene nei. Ia, sui usufono mamalu uma filifilia o le Palemene, alofagia outou e le Atua. Ia manuia foi le tapuaiga a Samoa. Soifua.

FOFOGA FETALAI: Ua faamalo faafetai saunoa i lau Afioga i le Sui Palemia po o le Minisita foi lea e fitoitonu i le tatou Ofisa o Tiute aemaise foi o tatou Tupe Maua. Ou te talitonu foi o lea ua maea saunoa i tulaga uma foi na laga e sui usufono mamalu o le Maota, o lea foi ua e talifulaitau. Malo lava faafetai, malo tapena, malo foi le silasila foi i finagalo laga o le Maota aua lava le lufilufiina o le tamaoiga aemaise o le agai i luma o le tatou atunuu, aemaise lava o lau Matagaluega e pei o lea e faalagolago i ai le tatou Malo aua tupe ao aua lava tatou atinae aemaise foi le faatupeina o le tatou Tala o le Tupe. O le mea lea, ia o lea ua faamanuia atu le tatou Maota, o mama na i lau Afioga ma le Matagaluega sagai ane ai o le tai aua foi la outou galuega fita aua le sailia o tatou tupe maua aua galuega fai ma le faatupeina o le tatou Tala o le Tupe. Malo faafetai.

Ia ou te iloa lau Afioga i le Palemia, o lea ua tau mai i fanua, ia, lafo atu ia i lau Afioga mo sau saunoaga.

Afioga Hon FIAME NAOMI MATAAFA: Faafetai i lau Afioga i le Fofoga Fetalai mo le avanoa, ae ou te tulai atu ma le faaaloalo e faapai atu aua le paia o le Maota o Samoa i le Fonousu, i lau Afioga i le Fofoga Fetalai ma le paia o sui usufono o le nofo a itumalo. Ia, o Samoa lava lea i ona tulaga faalupe aua le paia i Aiga, o Aiga ma latou Tama, o Tama foi ma Aiga, le usoga ia Tumua ma Pule, Itua ma Alataua, Aiga i le Tai ma le Vaa o Fonoti.

Faamalo le Fono i lau Afioga i le Fofoga Fetalai. E faafetai atu i le taeao ua mavae ma le faafeiloai o letaunuu mai o lenei faigamalaga. Faafetai i le alofa o le Atua ua toe taliu mai ma le manuia le faigamalaga, a o lo o faapea ona maualuga le aoina o le masina i le afio o sui usufono o le Maota, aemaise o le faagasoloina o le galuega o lo o feagai ma le tatou Maota o le tatou Tala o le Tupe. Faafetai mo le tapuaiga mo lenei faigamalaga, faafetai mo le tauaveina pea o le tatou galuega faifaatasi, aua o lea ua matau atu ua faaiuiu le faagasologa o le tatou Tala o le Tupe. Ma e faamalo atu i lau Afioga i le Fofoga Fetalai i le faatautaiga o le faagasologa, aemaise o le faataatia o le Lipoti a le Taitaifono ma le mamalu o le Komiti o Tupe a le Maota, sa faapena ona folasia ai le fuafuaga a le tatou faigamalo i le faasoa mo le tatou Tala o le Tupe mo le tausaga o le a tatou agai atu iai. Faamalo foi i le aufaigaluega o e sa nafa ma le tapenaina o le tele o vaega o le tatou Tala o le Tupe, aemaise o le Failautusi o le Fono ma lana aufaigaluega e tusa ai ma le lagolagoina o galuega a le tatou Komiti.

Lau Afioga i le Fofoga Fetalai, ua logoina au e le Afioga i le Sui Palemia e i ai nisi o mataupu sa laga e tusa ai ma au Matagaluega. Ia ae le i fai atu se tala i lenei tulaga, ou te liliu mai i lea Itu i le Pulega i lau Afioga i le Sui Palemia ma le nofo a Minisita o le Kapeneta, faamalo foi le faatautaia o tiute ma galuega i lo outou valaauina. Ia alofa le Atua ia faapena ona tului pea le faitofa ma le faiuta e tusa ai ma tiute ma galuega o lo o nafa ma outou Afioga. Atonu foi e tulaga ese pe a vaai foi i le faagasologa mai o faigamalo ua mavae i le toesea o lo outou taitai i le taimi a o lo o faagasolo le Tala o le Tupe, lau Afioga i le Fofoga Fetalai, o le vaaiga lea o le faatuatuaga o lo o ia te au o le taitai i lau aufono, o lo o gafatia ma mafai ona tauave tiute e pei ona faamoemoe i ai le faagasologa o le galuega a le tatou Malo.

E lua ni vaega sa faaalua mai e le Afioga i le Sui Palemia, o le talanoaina o le totogi o le aufaigaluega a le Malo. Atonu lau Afioga i le Fofoga Fetalai, e le faateia foi le faalogo atu i lea mataupu o lo o lagaina mai, aua o lo o feagai pea le lautele o le atunuu ma fita o le tamaoaiga, ma le luitauina foi aemaise i latou e le o maua galuega, po ua afaina foi itu tumaoti, ia sectors sa faapena ona galulue ai. Ae atonu e mafai ona fai atu sau tali i le mataupu lea o le totogi o le aufaigaluega a le Malo. I le nofoaiga talu ai sa faapena foi ona faatulaga ma faagasolo i tausaga Private Sector tuufaasolo le siitia o tatou totogi o le aufaigaluega a le Malo, lea na mulimulitai ai lava le siitaga mo le vasega o tatou sui usufono. Ae i le feagai ai o tatou ma le faamai tele, ia atonu o lea tatou te manatua o le faiga faavae po o le talifuaitau a le faigamalo talu ai i le mataupu lava lea o totogi po o le faamautuina o galuega a le aufaigaluega a le Malo, sa i ai se tuutuuga e faamautinoa ai e faafaigaluegaina pea tagata faigaluega a le Malo, e ui o lo o feagai ma luitauina le atunuu i faafitauli o le tamaoaiga. I le tele o taimi i le feagai ai o se faigamalo ma luitau o le tamaoaiga, o le isi lava lea itu muamua lea e oo i ai se vaaiga o le vaea po o le faaitiitia o le aufaigaluega. Ae peitai i le faiga

faavae foi a le faigamalo talu ai, o lea lava sa maua e faamautuina pea, ona o le isi vaega tele lea o tagata faigaluega a le Malo e lagolagoina o latou aiga ma faapena ona sosolo atu ai faamanuiaga, e le gata i aiga a o nuu foi aemaise foi o tatou Ekalesia, atonu o lea sa fai ai lea mau.

Lau Afioga i le Fofoga Fetalai, e le o i ai se manatu o le faigamalo lea e suia lena tulaga, ona o se fuafuaga e vaai lautele mo le manuia, ae o lea tatou te molimauina lava faafitauli ma luitau o lo o feagai ma vaega tumaoti, private sector ma vaega i tua atu o le Malo, o lo o faigata tele mo latou le mafai, muamua ona faaauau tagata faigaluega po o le gafatia foi o totogi, ae o le itu lava lena o lea o lo o ave pea i ai le faamuamua a le tatou Malo. Atonu a outou tagai foi i le Tala o le Tupe mo Matagaluega taitasi, o lo o faapena ona faamautuina pea seleni e faamautinoa ai le totogi o le aufaigaluega, le suiga o le aufaigaluega, aemaise foi o faamanuiaga masani e maua i le faaiuga o konekarate, ia po o le tulaga foi lea o latou ua umi le latou tautua mo le Malo.

O le vaega muamua lena o le tali atu i le mataupu lea o le siitia o totogi. E le o se tulaga e mafai ona alofia le tulaga o totogi, ma o se mea e tatau pea ona vaai faifaipea i ai so o se faigamalo. Ia ma le itu, o le mafai ona gafatia e le faigamalo. Ia, tatou te mataituina, o le tatou Tala o le Tupe lea o le a faamaea, o se Tala o le Tupe puupuu, ona e i ai ona mafuaaga i le fesuiaga o le faigamalo, ma le tulaga sa faagasolo mai ai le amataga o le Tala o le Tupe lea o lo o faagasolo nei, sa fai i lalo o aiaiga o faalavelave faafuasei, under emergency orders. Ae i le pale atu o le faigamalo a le FAST, sa i ai se manatu, e lelei lava le toe tuu mai o le faagasologa o le tatou Tala o le Tupe i tulaga masani i lona faagasologa, lea la na fai ai le tatou Tala o le Tupe e amata mai ia Aokuso o le tausaga nei. O lea foi la ua tatou oo mai i lenei vaitau, ma o lea lava o le a faapena lava ona faaauau ai le faagasologa ma fuafuaga o le faasoia o le tamaoaiga i tulaga masani i a tatou Tala o le Tupe. Ma ou te manatu, e aoga foi le mataituina e le faigamalo lea ua pale mai tulaga uma ia o le tatou aufaigaluega a le Malo. E le na ma le laina lau Afioga mai le Nofoaiga talu ai sa i ai nisi o fuafuaga o faiga faavae i le fesuiaga o Matagaluega, pe o le faaopoopoina foi o nisi Matagaluega fou.

Lau Afioga i le Fofoga Fetalai, so o se taimi lava e faatulaga ai se Matagaluega fou po o se isi itutino fou i totonu o le Malo, o isi foi ia tupe faaopoopo i le Tala o le Tupe a le Malo. Ua pale mai foi le faigamalo nei, o lea foi ua i ai le vaai i le taatiaga o tatou Matagaluega, ia ma o latou tagata faigaluega, ua i ai nisi o manatu pe tuueseese nisi o Matagaluega, ae pe tuufaatasi nisi. O itu uma ia, e ao lava ona faataatia lelei se auivi, ma o le tulaga lea o lo o faagasolo pea le silasila a le tatou Malo fou i le faataatiaga o le auivi o Matagaluega ma faapena ona faasoia i ai tatou tagata faigaluega. Ma e mafai ai la i totonu o lena fetuunaiga, ona mafai ai lea ona tatou fuafua le ituaiga fesili lea, po o le siitia o totogi ma le tulaga o le gafatia o le faia o lena tulaga, a o le mea lava ia e masani, aemaise lava i le fua o le tau o le

soifuaga. O lea ua tatou matauina ua siisii pea i luga le tau o le soifuaga e ala i oloa, e le gata i taumafa, a o isi, le lautele o oloa, aemaise le tulaga o oloa faufale, oloa mo galuega tetele. O ia mea uma, e faapena foi, e vaai foi le faigamalo ia, aua a fua i a tatou galuega tetele a ua sii le tau, e faapena foi le aafiaga o le faatinoga o a tatou fuafuaga o a tatou galuega faatino. A o le fesili, o le fesili e taua, ma o se mea o lea e vaavaai totoa lelei i ai le tatou faigamalo, aemaise o le toe faatulagaina o a tatou Matagaluega e pei ona tatou i ai nei. Ia atonu e aafia ai foi i i le vaaiga i le tatou Komisi e Pulea le Aufaigaluega a le Malo. Ua tele lava le suiga o le galuega faatino a le tatou Komisi o Galuega. Ma o le isi foi itu lea o lo o vaavaai i ai aemaise faiga faavae sa tatou sau ai mo le tele o tausaga i le tulaga lea e fai ma faataitaiga i le faamatuu atu i tua i Matagaluega le pulega, muamua, o le aufaigaluega, lua, o le Tala o le Tupe. O e faiga faavae lea sa faapena ona faatulaga mai ai le taotu Pulega i tausaga ua mavae. Ae a tatou toe tuliloa le faagasologa o lena faiga faavae, e tuu atu i tua le pulega i Matagaluega, e eseese lona faatinoga. E le o mafai ona faatino i se tulaga ua faapena ona faatino i le aoatetelega ma le aufaigaluega ma le nofo a Matagaluega a le tatou Malo. Pulea o tupe ma le pulea o le aufaigaluega. O le uiga la o lau faamatalaga lau Afioga i le Fofoga Fetalai i le mea lava lena o faiga faavae, a faatu a tatou faiga faavae ae le mafai ona tatou faatinoina, e ono tupu le mea foi lea e alu faasapasui le tatou galuega. A oo i lea taimi fai mai, ia o le faiga faavae, ae a oo i le isi taimi fai mai, e leai ua toe sui.

O le uiga o lau faamatalaga ma se mau ou te fia faasoa mo le mamalu o le Palemene, ma o tatou lava e faia le tonu o mea nei. E leai se aoga o faiga faavae pe a tatou le galulue e faatino. E fai ma faataitaiga lau Afioga i le Fofoga Fetalai, le faiga faavae foi lea na fai mo Matagaluega. E tuueseese le itutino o e faia le faiga faavae ma i latou o e faatinoina auaunaga, separation policy and operations. Ia, ae salasala foi mea na tutupu. E i ai isi vaega tumaoti, e i ai sectors na mafai ona fai. Fai ma faataitaiga o galuega tetele, na mafai ona fai, ua tuu i le Matagaluega le faiga faavae, ae pei ona tatou molimauina, ua tuu atu lava i tua i kamupani le faatinoina o tatou galuega tetele. E faapena i Matagaluega o Fesootaiga. Ia, ae tatou oo mai i le Matagaluega o le Soifua Maloloina, ua le mafai ona tatou faia.

O le uiga la o lau faamatalaga e le o se faamasinoga o le sao po o le sese, ae o le mau, a fai le faiga faavae ae le mulimulitaia ma faamautinoa e faatino i ona itu uma, e maumau le taimi e fai ai le faiga faavae lea, le atoatoa le faamoemoe lea na fau ai se taumafaiga. O itu la ia i lau Afioga i le Fofoga Fetalai, e aoga lava aua o tulaga aoatetele ia, e fusi ai ma fai ma faavaa o le Tala o le Tupe lea tatou te talanoa ai. Po o le a le fausaga o le faavaa lea tatou te o ai a o a ala o mea ma tatou faiga faavae e fai ai lea tulaga. Ia, o se talatalanoaga amata lea lau Afioga i le Fofoga Fetalai i le laga mai o mataupu o totogi, ae le nofo totogi na o totogi e fai fuafua, o a isi mea uma o lo o i

totonu o le faavaa o le faagaoioiga o le tatou Malo i ona Matagaluega aemaise o tatou tagata faigaluega.

Lau Afioga i le Fofoga Fetalai o talanoaga a Samoa e lua, e le fou foi lea faamoemoe. O se taumafaiga ua tausaga. Sa i ai le faamoemoe ma ua fai fesootaiga ma le faigamalo a o tatou uso i Sasae le Afioga i le Kovana ma le Faigamalo e toe fia faaauau. Sa i ai le faamoemoe e amata ona faatino se feiloaiga i le taimi o le faailogaina foi o le Sisigafua a Tutuila ia Aperila o le tausaga lenei. Ua i ai fetusiaiga amata, e avatu e tatou tali mai foi latou. Ae faamoemoe o feiloaiga e fevaaiai e faatino i taimi o le latou sisigafua, ae paga lea, ua tulai mai le faafitauli ua pepesi le faamai ua le mafai ai ona faatino lea faamoemoe. Ona faapea lea o le a taatia mai e tolotolo mai tua i le tatou sisigafua. E le i mamao tele le pepesi i tua o le faamai i Amerika Samoa ae tupu foi le tulaga ia tatou ma faapena ona taofia ai avanoa e femalagaai ai tatou Malo e lua, ia a o lo o fai pea i luga o fetusiaiga ma talanoaga i le va o Taitai ia i maua ma le Afioga i le alii Kovana. E i ai le faamoemoe o lea e tatala tatou va tuaoi i le aso 1 o Aokuso e pei foi ona faasalalau, pe fuafua i ai i lena vaitaimi, po o le faaiuga o Iulai pe fai se isi fuafuaga i le tatou lava va ma Amerika Samoa. Aua o le taimi lenei, o lea ua tatala mo tagata Samoa e mafai ona toe foi mai. Ia atonu e mafai foi ona fai se isi fuafuaga e fua i le tulaga o lo o ai se finagalo foi o le faigamalo a Amerika Samoa ae pe amata loa ona tatala foi o tatou va tuaoi ma Amerika Samoa ma faafaigofie ai le faataunuu o le faamoemoe o feiloaiga a Samoa e lua.

Lau Afioga i le Fofoga Fetalai, e pei o ni mataupu ia e lua sa faamanatu mai e le Afioga i le Sui Palemia. I le tulaga lava ia o talanoaga a Samoa e lua, o lea ua i ai le fesuiaiga o a tatou foi sui i Amerika Samoa, ua i ai le fesuiaiga o tofi, ma o lea ua mafai ona faaauau pea le tatou ofisa, ae ua i ai se manatu ma o lea lava e amata ona faaataata e toe faaopoopo se isi tatou Ofisa i lalo o le tatou Ofisa o lo o i ai nei mo mataupu lava tau fefaatauaiga, se trade position e mafai ona faaopoopoina, aua o le isi faitotoa taua lea o fefaatauaiga, e le gata i le va o Samoa e lua, a o le tatou faitotoa lea e agai atu ai i Amerika.

Lau Afioga i le Fofoga Fetalai a tusa ai ma lou finagalo, e fia fai sina au faamatalaga puupuu i le matou faigamalaga, e i ai foi lona taua i le itu tau va i fafo.

FOFOGA FETALAI: Ia saunoa lau Afioga.

Afioga Hon FIAME NAOMI MATAAFA: Lau Afioga ma le mamalu o le Palemene, e tolu autu o le faigamalaga sa matou malaga atu ai, o au nei ma le faauluuluga o le Ofisa o le Va i Fafo, faauluuluga o le Ofisa o le Palemia ma le Kapeneta, ia ma le sui o le Malu o le Malo, o le tagata e puipuia lou saogalemu. O se faiga faavae fou lea i le femalagaai o Taitai, o

le i ai o se sui ole tatou Ofisa o Leoleo, o le security e faapena ona malaga ma Taitai. Na amatalia le faiga faavae lea ina ua malaga le Taitai o le Itu Agai e saili fofu foi i Niu Sila ma sa aumai ai se talosaga e manaomia le malaga ma le sui o le Ofisa o Leoleo, o e sa faatinoina le puipuiga. O le puipuiga lava lena sa faatino iinei i Samoa ina ua fesui ai le faigamalo, o e lava sa galulue mo le Taitai o le Itu Agai a o tulai mai i le tofi o le Taitai o le Malo, ia ona faapea lea ona see atu i ai ina ua suia foi tulaga. Ae mo le malaga a le Susuga ia Tuilaepa, ia o le tulaga lava ia o le sailiga togafiti sa faapena lava ona faagasolo i tulaga masani i lalo o le polokalame a le soifua maloloina, e pei foi ona malaga ai nisi o le Maota nei ma nisi o le atunuu na faapena ona avatu i Niu Sila o latou gasegase. Ae o le tulaga la e tulaga ese ai, o le talosaga mai i le Kapeneta e fia ave le susuga i le Leoleo e fesoasoani mo ia.

O le finagalo o le Kapeneta, e ui e le i taoto aloaia se faiga faavae muamua mo le malaga o Taitai o le atunuu faatasi ma leoleo, a ua i ai se manatu o le Kapeneta, e tatau ona fai, ona o le tulaga ou te le tau faamatalaina, i ni feeseeseaiga sa tatou sau ai i le faiga palota ma le malolosi o lagona o tagata ma tatou molimauina faaupuga sa fai i luga o upega tafailagi, a tatou tauaveina nisi o faamatalaga, e ono faapea, e i ai lava le avanoa e lamatia ai pe afaina ai le soifua o le Taitai o le Itu Agai. Ona faapena lea ona fai le faaiuga a le Kapeneta, ma ua amata ai loa se faiga faavae mo malaga a Taitai. Masalo lau Afioga i le Fofoga Fetalai, o lea ua muamua le Taitai o le Itu Agai, faatoa faatino atu ai i le Taitai o le Malo i le matou malaga lena, ae pei e tatau foi o lea e maua e malaga lau Afioga i le Fofoga Fetalai. O mea uma lava ia tatou te vaavaai i ai. Ae le natia, sa tupu ane foi se manatu i lena mea o le feoi ma leoleo, po o le a ea le mea ua o oi ai le tatou atunuu ua fai ai nei mea. Ou te manatua o le mea na tupu ai le mea lea, o le faalavelave lea na tupu i le maliu ai o le Minisita o Luagalau. Pei o i ina na amata mai ai loa ona fuafua puipuiga mo Taitai o le Malo. O lea lava la e faagasolo mai ai. E i ai le mea lea na tupu i le malaga atu o le susuga ia Tuilaepa i Ausetalia, o lea foi lava e faaauau lea mataupu. E lelei o le ulupuaa lea na faatino ai, ae tele le afaina pe ana i ai se isi mea maoae atu e faaoga i le tulaga lea. Ia, e le o faia o so outou finagalo po o so matou lotu, a o mea e tutupu ma le tatou fuafua ma le vaai i puipuiga o vasega o taitai. Ae faafesili pea lava i lou mafaufau, talofa e ia tatou ma si o tatou atunuu e faapea o se atunuu filemu, ia a ua ese lava mea ua tutupu. Ia, o lea foi faatoa ou foi mai Aferika, e feoloolo atu usufono i lo leoleo, foi lea e alu atu lava le taitai ia ma avatu nai ana ia leoleo, ae pei o le tulaga lava ua taamilomilo i ai ia le tatou lalolagi. Ia o le matou aumalaga la lena.

E 3 i auga o le matou Malaga. O le vaega (i):

O le matou Malaga i Fiti mo le Fono a Taitai o le Pasefika. Ia ua pei foi Fonotaga a Taitai o le Pasefika e pei o isi Fonotaga a Taitai o le Kelope. Ua faigata ona faatino ni fono vavalalata, fevaai ai lelei ma fai upu ma tala, ia

ona o le vavao o le faamai. A lea la ua mafai ona maua se feiloaiga, e le o le atoatoa o le Fono a Taitai, ae toa 6 Taitai sa mafai ona feiloai i Fiti, e tapenapena mo le Fono atoa a Taitai, e fai i le ogatotonu o le masina fou ia Iulai.

Ao le mataupu ogaoga sa fia tuliloa lava, ia atonu o lo o silafia e le Maota, sa i ai le teva i le vaega foi lea o Mal oi le itu Matu o le Pasefika. O le au Micronesians, ona ua le malilie i le tofiga o le Failautusi o le Fono a Taitai o le Pasefika.

Sa i ai se manatu o motu ia o tatou, o le latou taimi lea. Ia e pei lava o so o se aiga, e le malie loa le isi vaega ua teteva. Ia ua leva lava ona tau fofo mai ia lona manua. Ma i le itu lava lea, aemaise mo tatou o Malo o atumotu laiti, e maua ia le malosiaga o tatou leo, pe a maopoopo ma autasi ia le tatou itulagi. Ae amata loa ona taape, ia ona mou atu lea, o sina malosiaga lava lea e tatou te tautaulia ai, i le maopoopo o le Pasefika. Ma o le naunautaiga lava lona e matou te pale atu foi, o lo o taumafai ia le tatou fonolea, e taufofo manua o le vaega i Matu, ia ma toe tatai mai i le tatou itulagi o le maopoopoga o le Fono a Taitai.

Ia te i ua uma ia se matou faamatalaga, e manuia ia le faamoemoe, ua i ai se ata ua malilie mai ia atumotu i Matu o le a faapena ona toe foi mai. Ia ma ua i ai faamoemoe a usua le Fono lea e fai ia Iulai, ia ona faapena lea ona faamautu ia ona e i ai ala o le Tulafono i le teva. O lea la ua mafai ona taofi ia le teva, i le matou Fono lea na fai, ae o le faamaopoopoga o le toe foi mai, ia e fai i le matou Fono lea o lo o faamoemoe ia Iulai.

Ia o le vaega lona (ii) o le faigamalaga:

O le malaga Faava-o-Malo i Niu Sila. E fai o le pale mai o le tatou faigamalo fou, ae o le isi foi itu taua, o lea e tatou te faailoga ia le 60 tausaga o le tatou Tutoatasi, ao le 60 tausaga foi lea, o le tatou Feagaiga Faauo, Treaty of Friendship ma Niu Sila.

O mea ia e 2 faavae ai ia le valaaulia ia e alu atu ia se malaga Faava-o-Malo, i le Malo o Niu Sila. Ia e vaiaso, o lo o faatino ia se polokalame o feiloaiga ma sui o le Malo, amata mai lava i le Tamaitai Palemia ma Minisita o le Kapeneta. E faafeiloai foi i itutino eseese o le Malo, ia a ua mau avanoa ai foil au afioga i le Fofoga Fetalai, feiloai foi ma le mamalu o le atunuu o lo o afifio ma papaaao i Aotearoa.

Ua matou maua le avanoa, e faailoga ai ia le sisiina o le Fua i luga i Aukilani, maua le matou feiloaiga ma le community, ia faapena foi le avanoa e matou te feiloai ma le atunuu i lalo i Ueligitone, ia ma le matou toe taliu mai i luga i le Hawkes Bay, i le mea o lo o toatele nisi o le tatou aufaigaluega faavaitaimi. Na maua ai le avanoa e feiloai ai ma latou ia e faigaluega faavaitaimi, ma matou feiloai ma tagata e ou galuega, lea e galulue ai ia o tatou tagata, ia a ua maua foi le avanoa e feiloai ai ma tagata Maori. O le isi itutino Iwi lea e lelei ia le tamaoiga lea e i i le vaega lea o Niu Sila sa o

matou i ai, maua le feiloaiga ma le Iwi, ia ae tauluga ma le feiloaiga ma le mamalu o Samoa o lo o affio ma papaaao i lena foi vaega o Niu Sila.

O le vaega mulimuli o le matou faigamalaga, sa auai atu ai ile Konetineta o Aferika i le nuu lea e tau o Rwanda. O se atunuu foi lea a tou silasila i le faafanua, e i ai i le ogatotonu i le Konitineta. Ia e tu maualuga ia le nofoaga o le atunuu lea o Rwanda. Ia o le mea foi lea e mama le ea. High altitude, pe tou te faalogo mai lea e pei ou te tau sela, ia o le mea lena na tupu. E tatou te masani i aafiaga o le tau, ae o le isi vaega lea o aafiaga, ia o le maualuga o le nofoaga o le atunuu.

Lau afioga i le Fofoga Fetalai se i mulimuli lava ona fai atu lau tala i le Fono, ae e fia fai atu lava lau molimau i le nuu lea o Rwanda. O le atunuu lenei i le 1994, na i ai se fasiga tagata, genocide fasioti tagata vaeane le mamalu o le atunuu. E 800,000 tagata na maliliu ai i lea faalavelave, fetauai ia ituaiga tagata. E toetiiti lava 1 miliona 1994. Ae o lea ua o matou o atu i le tausaga lenei, sa ese lava le manatu i le vaaiga i le ituaiga atunuu lea e tusa ai ma le faalavelave na tupu.

Ao o Rwanda e pei o se atunuu ua atinaeina. It looks like a developed country foi lea e mama, e lelei ia fale ma maota, o auuala, o services ma so o se mea e matautia. O le uiga o lau faamatalaga lau afioga i le Fofoga Fetalai, o le faafesili lea na fai uma e matou lea na agai atu i Rwanda, pe faapefea ona fai e le atunuu le mea lea? O le a le tali? Na fai lava e o latou tagata. Na fai e o latou Taitai, i le mea lea na tupu matuia, na mafai ona toe foi mai i lena tulaga foi lea ua teu ia le va o le atunuu, ma fau faatasi ia se latou vaaiga e toe faatulai mai ai se atunuu manuia mo ona tagata.

O le mea la lena ua taunuu i ai, ae e le i atoa se 30 tausaga. E fai le fua foi lea, a fua i tupulaga pe e tai 30 tausaga. As a generation, one generation ae toe liliu atoa le mea na tupu. O le mea lava ia ua tuu efuefu le atunuu i le faalavelave na tupu ae ua toe ola taulaulau, manuia ona tagata.

Ia o le matou Fono la a Taitai o le Taupulega, ia e tasi foi lea faalapotopotoga e le i mafai ona fono ona o le Koviti. Ia e tai 2 tausaga ma fono. Na gata mai i le 2018 ia na le mafai ona fono i le 2020. Ae o lea ua faataunuu i le tausaga lenei. E tai 2 tausaga ma fai fonotaga, ma e o le Sini Autu o le Fono lenei, e faapea e Delivering a Common Future. Connecting, Innovating, Transforming. E pei ua ou Faa-Samoaina e faapea, Momoli atu i se Lumanai Laugatasia, e ala i Fesootaiga, Fausaga fou, ma Suiga mo le Faafouina.

Ia e tele lava ia vaega taua ia ae ou te manatu lau afioga i le Fofoga Fetalai, e tau ia ina ne i ou otona mai ia ni nai ata foi lea e faataua ai foi nisi o faamuamua a lenei Fonotaga o Taitai o le Malo o Taupulega. O le mea muamua lava o le mea e tau o Pulega Lautele, Multilateralism lea e i ai Faalapotopotoga nei e pei o Malo Afaatasi. E talitonuina ma faamautuina le faagaioi pea o le lalolagi i lalo o Pulega nei ma faamaopoopoga tau Pulega

Lautele, aemaise ina ia faamautuina ai Pulega Faale-Tulafono. Ia ma le puipuia o aiatatau a tagata.

E i ai ia le itutino o le Fono lenei, e tau o le CMAG, Commonwealth Ministers Actions Group ma e i ai Samoa i totonu o le Group lea. Ma e o le vaega lea o le itutino, e latou te mataituina, i mea o lo o tutupu i atunuu o le Taupulega aemaise lava le tulaga o Pulega Faale-Tulafono ma le puipuiga o aiatatau a tagata.

Ia o tatou o le sui, o lea o lo o faaauau pea le avea o Samoa ma sui o lea Komiti. Ia ma e le natia sa lagaina ia le mea na tupu ia tatou i le tausaga lea talu ai i le tatou Faiga Palota. Ae o le mea ou te fiafia ai lau afioga i le Fofoga Fetalai, sa mafai ona toe faafoia lava o tatou faafitauli i totonu lava o le tatou lotoifale. Ma e i le talanoaina i totonu o le itutino lea, ia e le faapea e na o Samoa e tutupu ai mea faapea. E tutupu foi i isi atunuu.

Ia ae ou te manatua ia sa faapai mai i le tausaga le la ao faasolo pea ia tatou mataupu o le fesuiaiga o le tatou faigamalo. Sa faapai ia le Failautusi o le Commonwealth aua o ia le tagata e muaau i le faafesootai o atunuu pe a i ai se mea e tulai mai. A faapea e alu alu ae ua gata lana ia taumafai, ona logo loa lea o le itutino lea o le CMAG, e amata loa ona talanoaina ia se tulaga faaletonu ua i ai se sui o le Faalapotopotoga.

O le faapai mai la o le Failautusi i le tausaga le la, lau afioga i le Fofoga Fetalai ma le mamalu o le Fono, o lau tali na fai i ai, e talanoa ia i le Malo lea e saofai ona o le Faalapotopotoga lenei, o le Faalapotopotoga Faava-o-Malo. Ia e taua lava ona faapai mai ona e faapea o au lava le Taitai o le Itu foi lea Faaupufai. Ae o le mau lena sa ou tuuina i ai, o le itutino e feagai ma latou, o le itutino lea e saofai e tauaveina le Malo. Ia pe o i ai lava i se tulaga o lea e faafesiligia ia le tulaga Faale-Tulafono, ae o le Itu lea o le tatou Malo, e tataua ona talanoa mai i ai ia le Faalapotopotoga.

Ia o isi itu e taua ona oto mai mo lo outou silafia, o le tulaga lea o aoaoga na maua mai mo tatou uma i le feagai ai o tatou ma le faamai o le Koviti. O le aafiaga e le gata o le maumau ai o le soifua o tagata, ia ae o aafiaga ogaoga foi ia o le tamaoaga aemaise le tulaga o taumafa.

O le feau lava na sau malosi i le tulaga lea i le tau toe fofo o le aafia o atunuu uma, o le mea lea e tau ia gafatia lava e le Malo ia:

- i. Ona fafaga ia o latou tagata. The basic, food supplies. Self sufficiency in food. E pei o le feau lava na na aumai. Po o le anoanoai o isi mea, a le mafai ona fafaga o tatou tagata ese le tele o le afaina.

Ma e i ai la le mea lea ua tupu i Aferika ona o le taua lea e fai i le va o Lusia ma Ukraine. O le Ukraine o le isi nofoaga lea e maua ai ia le taumafa a ;e toatele o tagata Aferika i le mea lea e tau o le grain foi lea e fai ai ia le falaoamata, ia ma tulaga uma faapena.

Ia e i ai ia le tatou sui usufono lea na saunoa ua le toe fia taumafa Samoa i talo ma fai ae ua fia taumafa i le araisa. Ia o le mea lena e tupu, e motu loa le araisa i le supply lea e sau ai, ia afu loa ma tatou. Ia e 2 lava mea, o le a la

le mea a tatou e fai? E toto le araisa? Pe toe faafoi ia le fofoga taumafa i le atunuu i le talo ua masani ai i taumafa a le atunuu.

Ao le mea lava lena, po o a uma isi faafitauli, ae o le talanoa a Taitai, a le mafai ona fafaga ia o latou tagata, o le faafitauli pito ogaoga lena. E soosoo mai ai la i aafiaga o le Koviti le mau lea, o le a ni gaiioiga e fai e toe faafoi mai ai ia le manuia mo atunuu mai i le mala o le faamai, e le mafai ona alofia, le ave pea o le tatou faamuamua, i tapenaga faale-soifua maloloina ona e fai mai le mau a le Faalapotopotoga o le Soifua Maloloina o le lalolagi, e toe tupu foi ia le isi faamai, ma le isi faamai, ma le isi faamai. Ma ua tatau ona mafaufau ia le lalolagi atoa, pe o le a le tapenaga e tatou te tapena faatasi i ai, o lea ua o tatou iloa le mea na tupu i le Koviti lea, ae po o a tatou mea e tatau ona fai, i le puipui i le toe tupu mai? Po o le tali atu pe a toe tupu mai.

O lea foi e tatou te iloa uma, le le gafatia e a tatou auaunaga faale-soifua maloloina ona tatali le faamai vagana ai ia tatou tui puipuia. O Samoa, ua agiagia le fua a Samoa i le tali atu i le Koviti, e ala ia tatou tui puipuia. Ua tatou ausia le 90% i Vasega eseese o le atunuu.

Ia e ta te faalogologo atu lava ma lota alofa i le Konitineti o Aferika, i le faapea mai o Taitai, e le o laugatasia ia atunuu uma i le faasoia i tui puipuia. Ae o lea foi e fai mai ia tagata o tatou Officials, e i ai le tuufaatasiga a tagata o le lalolagi i le mea lea e tau o le COBEX ua agai uma i ai tagata, Malo e fai i ai fuafuaga mo le tapenaina o tui ma le faasoaina o tui. A lea foi e fai mai le mau, e i ai Malo e i totonu o le aiaiga lea ae i ai foi isi Malo e le i ai i totonu. Ia o le uiga o lau faamatalaga lau afioga i le Fofoga Fetalai, e pei lava o isi foi fesoasoani na faasoasoa. Ia ae a le mafai ona o tatou faaogaina, e pei lva ua o tatou le iloa pe o le le mafai ona... e faigata auala e faaogaina ai, ia ona le aoga lea o na tapenaga uma.

O le isi mau na aumai i le Fono lea, i le tulaga aoaotetele, ua tele le aafiaga o le atunuu ma ua faatupu ai se lagona, po o talafeagai o tatou mafaufauga ma fausaga o lo o faavae ai o tatou mafaufauga i mea tau atinae. Pe o le a tatou o ai lava i le mea sa o tatou sau ai, ae o lea ua o tatou iloa mea na tutupu i taimi o le faamai ma aafiaga o le atunuu. Pe le ua le tatau ea ona o tatou mafaufau i le tulaga lava o le Development Frameworks. Ma e foi lea ua ese le isi lalolagi lea ua o tatou oo atu i ai. E le o se lalolagi na mafaufauina e tagata ae o le mea ua tupu, i Malo o le Taupulega. O le manatu la lea ua faatupu mai, ua tatau ona toe fai se isi fua i mea ua tutupu ma mea ia ua o tatou mananao e faataunuu. Na i ai le fesili pe o talafeagai pea lo tatou auai i lea Faalapotopotoga

Lau afioga i le Fofoga Fetalai e 54 ia Malo e i ai i totonu o le Faalapotopotoga lena. O le Faalapotopotoga na faavae i luga o Pulega Faa-kolone i taimi o Pulega a Peretania tele. Ia ua i ai lava ia sina suiga foi lea, ua i ai foi Malo e le o i lalo o le Pulega a Peretania, e pei foi o tatou. E tatou te le i lalo o se Pulega a Peretania. O i tatou na i lalo o le Pulega a Niu Sila.

Ae o le taua o le tatou auai pea i lea Faalapotopotoga ona o le 2/3 o sui auai o le Faalapotopotoga lenei, o atunuu laiti e pei o tatou. O lona uiga, e i ai le aoga o le Faalapotopotoga mo ituaiga atunuu lea e i ai Samoa. E i ai se vaaiga taulai mo le atinae mo atunuu laiti e pei o tatou. O le Faalapotopotoga o lona faavae i pulega a kolone a Peretania, ia e tasi lava le gagana. O le Gagana Faa-Peretania po o le Gagana Igilisi, ae o lea e tatou te iloa, o Malo Aafaatasi ia masalo pe toetiiti 10 ia Gagana eseese e faagai ai ia lona Faalapotopotoga. O lona uiga, e avea ia le Gagana e tasi, e faafaigofie ai ia le fesootaiga a sui auai.

Ia e tele ia tatou fesoasoani e maua mai i le Faalapotopotoga lenei. O mataupu tau Tulafono, o mataupu tau Palota, o mataupu tau tagata talavou. Ia ma isi lava vaega eseese tau atinae, o lo o maua mai ai ia tatou fesoasoani i le Faalapotopotoga lenei.

Lau afioga i le Fofoga Fetalai, i le tuliloa pea o le tatou auai i le Faalapotopotoga lenei ma le fesili i lona taua e i ai lava isi tulaga i lona alia mai, i le aofaiga o Malo uma o le Taupulega, e 60% o tagata talavou. O tagata talavou o le fua lea e i ai o tagata e 30 ma lalo ifo. E faapena foi la ia tatou i Samoa.

E lilifa lava ia le tele o le faitau aofai o a tatou tagatanuu i tagata talavou. O lona uiga, o Faiga Faavae, i so o se itu o le atinae, e tatau lava ona i ai le vaaiga, i le vaega lea o tagata talavou e i ai le tulaga o le aoaoina, po o talafeagai le aoaoina o tatou tagata talavou.

O avanoa faigaluega, po o fea le mea o agai ai ia le malosi o le nuu pe a faapea e tatou te tuuina faapea ia se faafesili.

O le Malo lea o Rwanda sa o matou le faitau aofai o tagata o le atunuu. O le tuliloa o le vaaiga ia lelei ia le faagasologa o le sosolo atu o manuia, ma le lagolagoina o a latou tagata talavou. O lea la e sau le tali, ua faatupu pea ia le manuia, i le faaogaina o lea vasega tele i le faitau aofai o tagatanuu o le atunuu. I

Ia mulimuli ai lau afioga i le Fofoga Fetalai, i nei lava mea uma, ia o le suiga o le tau. O se mataupu e tauave pea e lo tatou itulagi. E tulituliloa ia le faaitiitia o le vevela, taofia i lalo o le 1.5 % ia le vevela. Ia o le isi tulaga, o le faamautuina i taumafaiga a Malo o lo o tupu ai le mea lea o le faatupulaia pea o kasa leaga o lea ua afaina ai ia le tatou tau, emissions. O lea e i ai targets mo le 2030 ma agai atu i le 2050. Ia o le taumafai lava ia tuliloa ia Malo aua o tatou ia o Samoa ma le Pasefika, o atunuu laiti, e le faitauina ia ni kasa e tupu ia tatou.

Ae o tatou e pito aafia i le suiga o le tai, i le suiga o le tau aemaise o le siisii o le tai lea ua amata ona mou atu ai nisi o laufanua o isi o a tatou uso a motu, i totonu o le Pasefika.

Ia ma le vaega taua lava lea o tupe, o Fonotaga a le lalolagi i mataupu tau suiga o le tau o lea lava e talanoaina ina ia maua le fua o le \$100 piliona Amerika e tali atu ai i aafiaga o le suiga o le tau. Ia ae o lo o tulituliloa pea

ia lena fua o lo o aumai o le ituaiga tupe lea, e manaomia e tali atu ai i faafitauli ia e faafeagai ma tatou.

Lau afioga i le Fofoga Fetalai, o faamatalaga na o le Fono sa o atu ai i Rwanda. Ae faaiu atu ai ia se matou faamatalaga, ia e aoga foi ia le usua o le Fono a le atunuu, ia mo le tatou tausaga lava lenei o le faailogaina o le tatou 60 tausaga, lea na momoli atu ai ia le mau a le tatou faigamalo, ia ia faaoga ia le tausaga atoa, tatou te faailogaina ai ia le tatou 60.

E i ai ia le tatou Kalena mo le tausaga

FOFOGA FETALAI: Malie lau afioga i le Palemia pe maua se avanoa o le Sui Taitai o lea e vaai atu e fou mai lona sa...

Tofa Hon Lauofo Fonotoe Nuafesili Pierre Lauofo: Faafetai, faafetai i lau afioga i le Fofoga Fetalai mo le avanoa, atonu o se taimi talafeagai foi lenei se i fai se malologa puupuu a le afioga i le Palemia.

Ia e malo foi faafetai o lea ua toe foi mai ma le manuia ia le faigamalaga, usugafono sa faapena ona auai atu i Aferika. Ia faamalo saili malo i Fonotaga Faava-o-Malo. O matou lava upu e tau ona faapuupuu atu faapena ia o lea ua toe taunuu mai ma le manuia le faigamalaga.

Ae ua ou tulai ona o nai fesili i Matagaluega ia ona o lea e pei ua tali ia le afioga i le Palemia i nai fesili ia ma nai mataupu sa lagalaga i le... e tusa ai ma ana Matagaluega. E 2 lava nai fesili ia puupuu...

Afioga Hon FIAME NAOMI MATAAFA: Ia se i faauma atu lau folasaga, ona tuu atu lea o le avanoa e fesili mo le Matagaluega, ana e saunoa mai lava i le taimi ua uma ai ia Matagaluega ua ou tali atu. Ae o lea se i faauma lau folasaga faamolemole.

FOFOGA FETALAI: Ia malie ia lau afioga i le Sui Taitai se i faamaea pea ia le saunoaga a le Tamaitai Palemia...

Tofa Hon Lauofo Fonotoe Nuafesili Pierre Lauofo: Ioe, o lea sa ou faapea ai ua maea Matagaluega o lea o le a see i mea foi ia e tau i le tatou Sisigafua o lo o faagasolo nei ae o lea sa ou tapuai, se i saausi ia le saunoaga a le afioga i le Tamaitai Palemia. Ia o lea sa ou faapea o lou avanoa la lenei ae ui i lea o le a ou toe nofo i lalo.

FOFOGA FETALAI: Ia faamaea mai le saunoaga a lau Afioga i le Palemia.

Afioga Hon FIAME NAOMI MATAAFA: Ua aoga le faauilavea a le Sui Taitai, ua galo le mea taua o le matou fono i Rwanda. O lea ua talia le

tatou valaaulia e talimalo Samoa i le 2024, i le fono lea a Taitai o le Malo o le Taupulega.

Ona faaiu atu ai lea o se folasaga i le tatou kalena, o le faailogaina o le tatou Sisigafua. O lea e i ai le faamoemoe, o le faaiuga o Iuni, o le faaiuga o le masina nei, ia o lea lava ua oo i le faaiuga o le masina nei. O le a faamaeaina ai le faamauina o mataupu mo le tatou kalena. Aemaise o nisi o vaega o le atunuu o lo o fia aumai a latou mataupu e faamau i le tatou kalena. A o isi aso taua o le kalena ua faamauina, o le aso muamua o Aokuso, ua ave ai le valaaulia i le Malo o Niu Sila, e afifio mai se latou aumalaga, e tatou te faailogaina iinei le 60 tausaga o le feagaiga o le faigauo. Ona o le aso lea na sainia ai i le 1962. O Setema, o le a faatino ai nisi o tatou faafiafiaga, sa masani ona fai i le fua, o tatou tuugavaa, o siva ma isi lava faaaliga masani. O lea foi ua maua, pe faaauau ai ma le tausala o Samoa. O le aso muamua o Ianuari o le tausaga fou, aua e manatua e lau Afioga ma le mamalu o le Palemene. O le 1962 o le sisiina o le fua, na fai i le aso muamua o Ianuari. Ae ua suia le taimi ia Iuni, ona e lelei le tau ia Iuni, ae faatimutimu ia le amataga o le tausaga. E i ai lava le faamoemoe, e faailo pea le aso muamua. A o le isi itu taua, o le vaiaso foi lena o tatalo ma anapogi o le tatou atunuu.

E mulimuli lau Afioga i le faagasologa pea o nai faaaliga ia, o lea lava o tatou i lalo pea o Tulafono o Faalavelave Faafuasei. E pei sa o gatasi ma a tatou vavao o le faamai. Ae ua i ai se manatu i le Kapeneta, o lea ua tatou agai atu e tatala o tatou tuaoi i le aso muamua o Aokuso. O lona uiga, e ao foi ona tatou solomuli ese mai loa mai lalo o Tulafono o Faalavelave Faafuasei, Emergency Orders. Ma se i mataitu lelei, i le faagasologa o aso ma taimi. Aua o lea o lo o faaauau pea ia le tatou vavao i le lanu samasama. Ae i le tatou agai atu i le aso muamua o Aokuso, ua tatau foi ona fai le fuafuga, i le tatou fasolomuliese mai, mai lalo o Tulafono o Faalavelave Faafuasei. Ona o lea e matau atu, o lo o tutulai mai nisi o afioga i sui usufono, ia se i ou malolo atu.

FOFOGA FETALAI: Malo faafetai malele i lau Afioga i le Tamaitai Palemia.

Tofa Hon Laufo Fonotoe Nuafesili Pierre Laufo: Ia malo le saunoa....

FOFOGA FETALAI: E tau avatu se fesoasoani a le Nofoa i lau Afioga i le Sui Taitai. E a pe a tuu muamua le avanoa i la sui usufono, ona faaiu mai lea e lau afioga.

Tofa Hon Laufo Fonotoe Nuafesili Pierre Laufo: Aua foi e pei o au lea na muamua tulai i luga, ae o lea e mulimuli mai le vaega lea. Ae ua puupuu foi lau mataupu. Ona o le mea lea sa ou tulai ai, lea sa ou laga i lau

lauga faalauaitete, lea ua tali i ai le afioga i le Palemia, lea sa ou fesili i le taligamalo a le CHOGM. O le fonotaga tonu lava lea, ae leaga ou te fesili e le i maua mai le tala ua faamaonia, ma talia o le a tatou talimalo, pe i a o le 2024. Aua o le tatou ofo na ave i le 2018, lea la na avatu loa talia, pei e foliga mai e le i, i ai ni lavelave o le tatou tauofo na ave i ina. Ae o le fonotaga la lena, faatasi ai ma le fonotaga a le ACPU. O lea foi o lo o faapea e talimalo ai foi tatou. E pei la e tasi foi lena fonotaga taua aua e toatele, masalo e maua lava le onoselau pe afe tagata usufono. A o le fesili la lea sa ou fesili ai i le afioga i le Sui Palemia, a o toesea le Palemia. Po o le a se tulaga o i ai le tatou tapenaga i tatou taligamalo i fonotaga ia e lua. Aua manatua foi le fonotaga tele lea a le SIDs na fai mai i inei, e pei lava e \$50 miliona na alu ai i le tatou tapenaga. Aua e tele lava, pei foi ona silasila i le tulaga o lena foi fonotaga, e tele lava galuega, ia o taavale o pasi o faletalimalo. Pe ua...o le a se tulaga ua i ai le tatou tapenaga? O le measili faafetai o lea ua faamaonia, o tatou e talimalo, i le fono lea a Faauluuluga o Taitai o Malo o le Taupulega. Ae i ai la ma le isi fonotaga lea, e pei ona sa ou fesiligia ai faamolemole lau Afioga i le Palemia. Ona o lea e faapea, e sainia ai ma le feagaiga lea o le Samoa Agreement. Aua e taua tele mo le faalauiloaina o le tatou atunuu ia nei fonotaga, ma talaave i fafo ma le faalauiloa atu ai foi, ia latou o le a usufono mai, mai atunuu eseese o le lalolagi. E pei o nai fesili pupuu ia lau Afioga, faafetai mo le avanoa.

FOFOGA FETALAI: Mo le faasaoina o lou taimi. Se i tulai mai le sui usufono o Siumu.

Tofa Hon Tuuu Anasii Leota (Siumu): E faafetai i lau Afioga i le Fofoga Fetalai mo le avanoa. O lou sui usufono e le fiafia i lea mea o le faauilavea. A saunoa manino Minisita o le Kapeneta, ia e le fesiligia foi. Sa tuu lava le saunoaga a le Tamaitai Palemia, saunoaga manino ma le malamalama, ua logo faa-Tutuila le Maota nei, e tusa ma le faigamalaga. E i ai se mataupu sa ou laga, masalo ua galo i le Sui Palemia. E pei ona taua e le Tamaitai Palemia, le tatou faigauo lea ma Niu Sila, Treaty of Friendship. O le tulaga lea o tatou visa malaga i Niu Sila ua faafaigata lava. O lea sa manatu ai o silafia e lau Afioga, a o i ai i Niu Sila ma le Palemia o Niu Sila. O le tulaga ia i visa malaga i Niu Sila, aemaise o maliu. O la ua maua ua online i Niu Sila e faia, ua le toe faia e i. O aso ia e maua mai loa le pepa maliu, avatu i le Ofisa, tasi lava, lua aso maua. O le taimi lenei i le toatuga lea ua faaali mai e le atunuu, ua lua i le tolu vaiaso o faatali. O le manatu la faatumu manatu i lau Afioga i le Taitai, o le va lea o oulua ma... o Ausetalia foi ua faigata foi Ausetalia. A i ai lava se tulaga ia faafaigofie mo le tatou atunuu, ia faafetai. Ia faafetai mo le avanoa lau Afioga i le Fofoga Fetalai.

FOFOGA FETALAI: Ia malie lau Afioga i le Tamaitai Palemia, se i tulai mai le sui usufono o Sagaga 2.

Susuga Maulolo Tavita Aмоса: E pei o le uluai mataupu lava lea sa saunoa i ai le Afioga i le Tamaitai Palemia o totogi. Ia faafetai ua manino lelei le folasaga i faiga faavae. Sa ou manatu foi o le a ou le toe oo i ai. Aepeitai ua aoga foi le faalogologo i se oso manaia ua talii mai ma le faigamalaga. Ua uunaina atili ai le fia faasoa laititi atu lava. Ua uma ona ou folasia nisi vaega e lua na ou laga ai le mataupu lea. Aepeitai, ua toe faaosofia moealuga i le afiafi lenei, avatu pea se faasoa. O le manaia ia o theme o se tasi o fonotaga na i ai le afioga i le Palemia. O lea ua faa-Samoa mai faapea, e momoli atu se lumanai laugatasia, e ala i suiga faafouina. O le faamaite lea ua tulai mai, i tupe ia e ave i tua, tai miliona po o le \$51 miliona. E le o se tamai transformation e manaomia, o le upu moni lava lea. E le se tamai transformation, it's a huge one. Ma e matua manaomia la, le tulaga o le tau fai maua uma e vaega eseese o Samoa le transformation lea, ina ia tau lau o le faamoemoe, o le faamite. Ina ia tatou maua ai le lumanai laugatasia.

I le faasoa atu i le matou galulue ma alii ma faipule i le tele o afioaga, i le ono tausaga sa ou i ai i le Ofisa o Pulenuu. O le mea na matauina, o se tasi o mea e ese le aoga e manuia ai ma taunuu manuia atinae, o le mea lea e tau o le i ai, o le sense of belonging, po o le sense of ownership, is a project. O le ala tonu lava lea na ou laga ai le mataupu lea. Ua taoto faiga faavae, e moni lelei, aepetai e fou lenei mea. A faapea la e faasopolia la outou faamaite lea, e le gata i se taumafaiga i tua i le community, ae faapena foi le public sector. Ina ia tatou tau fai galulue faatasi, ona manuia lea. I lou lava lea vaivaiga o lou nei itumalo. Ae tau ona faasoa atu, o le mea lea, faafetai, e ese le faatupu manatu, o saunoaga foi ma lipoti mai le mea lea. This is a huge paradox shifted e manaomia ai le transformation lapoa lea, tatou galulue faatasi uma ai.

Ma le isi mea lau Afioga, ona faauma atu ai, lau Afioga i le Fofoga Fetalai, sa faapea lava e te lafo mai i lenei Itu, matou te faia se upu faafeiloai, ae faamaepaepa lau Afioga. Ae ui i lea, ua ou iloa le mea lena e te finagalo i ai, alo i lau faimalaga, a foi mai, o le matou taimi lena. Manuia le tatou Fono.

FOFOGA FETALAI: Ia malie lau Afioga i le Tamaitai Palemia, se i tuu atu le avanoa lea i le sui usufono o Vaimuaga 3, ma o le tatou toe avanoa lea, ia saunoa loa le Palemia ma faasolo le tatou galuega.

Afioga Hon Tapunuu Niko Lee Hang: Ia faafetai mo lou avanoa. Ona sa le i afea i le saunoaga a le Sui Palemia le mea sa ou laga i lau lauga. O tatou visa tatou te malaga i Tutuila, ona o lea e loma le fonotaga a le taou Malo ma Tutuila. Ae na ona taatia atu i lau Afioga i le Palemia, se talosaga, se i faafaigofie ai a tatou faigamalaga i Tutuila. A mea lava o le taimi lenei, i

mea e o pasi ia e aumai, po o le a le tauga o ia pasi. O le faigata ia ona apalai ia mea. A o le felataai ia o le taou va...o lau matau, e pei ua faigofie le visa i le alu i Amerika, o le visa lea tatou te malaga ai. Ae a omai latou i inei, e leai lava ma se faigata. E na ona taatia atu i lau Afioga i le Palemia, i se tou fonotaga lata mai, se i toe faaali ai lea tulaga ma lou faaaloalo lava.

FOFOGA FETALAI: Lau Afioga i le Palemia, oi...oi... ua uma ona fai atu le tala a le Nofoa o le lauga mulimuli lea, sosoo loa lea ma le... O le a tuu atu le avanoa i le sui usufono mo Falelatai ma Samatau.

Afioga Lupematasila Galumalemana Tologata Togia Tile Leia: E puupuu lava si manatu. E leaga ua faaosofia lagona fiafia i le tala o le malaga a le Afioga i le Palemia. Ua oso ai lava ma lo ta fia Rwanda ma le mea lea e i ai. Ae o lea ou te vaai atu, e pei e ala ona televave le atinae o le atunuu lea i le tolusefulu tausaga. Ona e toetiiti lava sefuluiva miliona le population. O se tuualalo lava lea e tau avatu, se vaavaai le tatou Malo i se faiga faavae e vave ai ona toatele tagata o le tatou atunuu, ina ia ai pisinisi, ma le faaaloalo.

FOFOGA FETALAI: Lau Afioga i le Tamaitai Palemia.

Afioga Hon FIAME NAOMI MATAAFA: O le mea foi lea, e fua lava le gaioi i le malosi o lo o i ai. A o le mea taua, o lea e tau mai pe faapefea ona fai? Ae na fai lava e tagata o le atunuu. E le i o atu nisi tagata e fai, ae le i laititi foi le faafitauli na feagai. O le isi foi mea taua, e ui lava e lei faia se taua a lo tatou atunuu, ae pei o se taua le mea lea na tupu i le tausaga lea, ma o la e faaauau mai nei lava. O le uiga foi lea, o fea le mea e tuufaatasi ai finagalo ina ia maua le manuia lautele.

O le a amata atu ia le tali i mataupu sa toe laga mai, e Afioga i sui usufono mamalu. O le sainiga a le tatou polokalame lea o Aferika, le Pasefika ma le Karepeane, faatasi ma Malo o Europa. O lea lava sa i ai le faamoemoe o le faafouina o le maliega lea, e fai mai i inei ia tatou, ona e le i faia muamua i le Pasefika. O le taimi nei, ou te faasilasila atu i lau Afioga ma le mamalu o le Maota, ua tonu lava le itu a tatou ia Aferika, Pasefika ma le Karipiane, a o la lava e fai talanoaga a le isi vaega le EU. Na i ai le faamoemoe po o le amataga o le tausaga nei, ae na faapea foi ona o le le mafai ona femalagaai. O le a fai se sainiga foi lea i luga o upega tafailagi. Ae o lea lava e le i taunuu, ma o lea ua tatala tatou va tuaoi. E le iloa pe oo i le taimi ua mautu lelei mai ai, le itu a Europa ua mafai ona femalagaai, maua mai ai ma nisi tatou turisi faaopoopo, mo lena foi faamoemoe. Ia talosia ia lenei tausaga pe maua avanoa, ae o le logo mai, pe toatasi lava le isi malo Europa o le vaega lea o Hungary. O lea o lo o fai pea le faasologa i nai a latou mataupu i le maliega lea.

O le mataupu lea ia tatou visas, e fai o Niu Sila a o Tutuila foi. O mea uma lava ia o lo o taatia i le faatalanoaga o va o Malo e lua. E sao lelei le sui usufono o Siumu, i le faafaigata lea ua i ai nei. O le matauina o le faiga a Niu Sila, o lea lava e talatalavaega mai le o atu, e faamuamua lava le aufaigaluega faavaitaimi. Tatala mai tatou tamaiti aoga, tatala mai a tatou gasegase, a o le tulaga lautele la, o lea ua i luga o le laina foi lea, o lea e faapea mai Niu Sila ua tatala fea ma fea, o lea la e faatali tatou, po o le a le tali a Niu Sila ia tatou. O le tulaga ia Amerika Samoa, e pei o le mea lava lena e fia tulituliloa ia tatou talanoaga ia o Malo e lua, ina ia faafaigofie. E sao lava le sui usufono mamalu, i le faafaigata, ae o le mea moni lava o tatou o Samoa. Ou te le iloa o Samoa la e i ai i o, po o latou pito Amerika lea e i ai uiga ia e faaali mai ia tatou. Ae a faapea lava e faafaigofie ma mafai ona fai e malo e lua, ia o se mea e tatau ona fai. Ae le o se mea fou foi, na faapena lava le tatou sau ai, e faigofie lava le omai a latou. Ona o le tatou lava faiga faavae e so o se isi lava e sau, e tolusefulu aso, po o le tolu ea masina lea e okomeki le mafai ona nofo ai iinei o tagata. E tasi lava le mea o le i ai o lona pepa malaga e toe foi ese atu ai ma le atunuu.

Ou te faafetai i le toe saunoa mai o le sui usufono o Sagaga 2, i suiga mo le faafouina. E sao lele, o lou taofi ana sau le sui usufono o Sagaga e faamatala le \$51 miliona. E le iloa pe ua vave le talia ma le faasolo a le tatou mataupu.

Lau Afioga i le Fofoga Fetalai, o le uiga lena o le aotelega o se vaaiiga a le Faigamalo o lo o faatino i lana Tala o le Tupe. O le tuuina atu o le tupe, faigaluega i vaega eseese o le atunuu. Ona o le a? Ina ia tatou galulue faatasi e faatupu le suiga mo le faafouina, lea tatou te manaomia. E le faigofie, toetoe a gasegase le Minisita o lo o gafa ma le \$51 miliona, ona o le a? E matuai fou lava i le Ofisa o le tupe le ituaiga faiga e fai ai le mea lea. E gagau faapea, gagau faapea, lau mai lea tulafono. A o le mea foi lea, ia malamalama ma manino le faaogaina o le tupe. Ia iloa le ituaiga atinae e tatau ona faaalu i ai. O le mea lava ia, o lea ua tau seese mai le Ofisa o le tupe, e tusa ai ma ana ala o galuega ma le tulafono, aua e tatau ona tausia le faaogaina o tupe. Ma aumai le auala e mafai ona fai ai. A o le luitau mo tatou uma, o le tatou faasoa, e fai i nuu ma itumalo, ina ia liliu mai o latou finagalo, e tatou te faatino faatasi le galuega lea. E le o se tufagatupe, o le tupe faafaigaluega e lalaga ai le atinae, ia maua ai se suiga faafouina mo le atunuu. Na saunoa le sui usufono o Falelatai, e sefuluiva miliona le population o Rwanda. O le fesili, e toafia tagata ia e galueaina le atinae ma le tamaoaiga o Samoa? E luaselau afe le tatou faitau aofai o tatou tagata. Ae a le pasene o tagata na e faagaioia le tatou tamaoaiga. Lau Afioga i le Fofoga Fetalai, o le tatala atu i tua, ma faasoa atu le tupe faafaigaluega i le lautele o le atunuu. E siitia ai le fuainumera o tagata, o le a galulue i le faamoemoe lea. E le na o le Malo ma le aufaigaluega a le Malo, e le na o tagata fai konekarate e faamoemoe i ai. E tatou te faamoemoe, o ai le tagata malosia, o ai le tagata e i ai le tomai,

o ai le tagata e i ai le mafai. Ia tatou limalima faatasi e fai le tatou galuega. O le aoatetele lena o le faamoemoe o le Tala o le tupe.
Lau Afioga i le Fofoga Fetalai.

FOFOGA FETALAI: Ua malo faafetai, malo saunoa malele i lau Afioga i le Tamaitai Palemia, o le Taitai foi o le tatou Malo... ma faamanino faiga faavae aua lava le uiga ma le autu o le tatou Tala o le Tupe. Ia faafetai foi i manatu faaalua o lea foi Itu o le Maota, o lea ua atili malamalama ai le tatou Maota, i le saunoaga a le Taitai o le Malo. E le gata foi o le tamaoaiga foi i fonotaga foi faava-o-Malo sa i ai le Palemia, o lea ua sasaa faautu mai i totonu o le Maota. O lea ua tatou faafofoga i le taua foi o nei talanoaga, aua lava le agai i luma, o le taou atunuu, i le va foi o malo tetele o le lalolagi.

O le mea lea, malo malele, malo saunoa i lau Afioga i le Palemia.

O lea ua maea ona talifuaitau le Malo e tusa o mataupu na laga e sui usufono i saunoaga faalauaitale i tulaga tau tupe ma le tamaoaiga o Samoa ma faiga faavae tau tupe a le Malo. Ua maea foi ona faatu le lafo mo le faitauga faalua o Tulafono Tau Faaofi i le aso 31 Me 2022, ma ua faapea ona faaluaina. O lea o le a tuuina atu le fesili.

Na tuuina atu le fesili ma faamaonia ai le lafo na faatuina i le aso 31 o Me 2022 ma faitau faalua ai le Tulafono Tau Faaofi o le Faatatauina o Tupe Faaopoopo (Nu.2) 2021/2022 ma le Tulafono Tau Faaofi o le Faatatauina o Tupe 2022/2023.

FOFOGA FETALAI: A o le i alo atu i le iloiloga auiliili o le Tulafono Tau Faaofi, ou te fia faailoa atu faasaoga ua maea ona faia, i le:

1. Lomiga Samoa i le Tala Faatatau Faaopoopo (Nu.2) 2021/2022, itulau e 7.
2. Lomiga Samoa o le Tala Faatatau Autu o Tupe 2022/2023, i le itulau e 3, 44, 64, 124, 170, 171, 212 ma le;
3. Lomiga Peretania o le Tala Faatatau Autu o Tupe 2022/2023, itulau e 3, 205, 275.

O lo o faailoa atu faasaoga i totonu o le Lipoti a Komiti o Tupe Maua ma Tupe Totogi i le Tala Faatatau Faaopoopo (Nu.2) o le Tupe 2021/2022, ma le Tala Faatatau Autu o le Tupe 2022/2023.

O lena foi ua tuuina atu i le Pepa Faaopoopo o Galuega Nu 2, ma ua tufatufaina atu i luga o a outou laulau.

**TULAFONO TAU FAAOFI O LE FAATATAUINA O TUPE
FAAOPOOPO (NU 2) 2021/2022 – iloiloga auiliili.**

FOFOGA FETALAI: O le a sagai atu loa le Fono Aoa o le Iloiloga Auiliili o le Tulafono Tau Faaofi o le Faatatauina o Tupe Faaopoopo (Nu 2) 2021/2022.

I le faagasologa o le Iloiloga Auiliili o le Tulafono Tau Faaofi, e mafai ona saunoa faatepa sui usufono i mataupu o lo o tusia i le Tala Faatatau o Tupe Faaopoopo (Nu 2) o Tupe Maua ma Tupe Totogi a le Malo o Samoa mo le tausaga faaletupe, faaiuina aso 30 Iuni 2023, faapea le Lipoti a le Komiti o Tupe Maua ma Tupe Totogi i le Tala Faatatau Faaopoopo (Nu 2), o Tupe 2021/2022, P.P. 2022/2023 Nu 24.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i ona faamatalaga.

FAAMATALAGA MUAMUA

FAAOPOOPOGA I TUPE FAATATAUINA

MATAGALUEGA	FAAMATALAGA	AOFAI TUPE ALU
--------------------	--------------------	-----------------------

TUPE:		\$4,600,000
--------------	--	--------------------

Faamaonia.

SOIFUA MALOLOINA		\$5,000,000
-------------------------	--	--------------------

Faamaonia.

LEOLEO & FALEPUIPUI MA LE TOEFUATAIGA		\$2,000,000
--	--	--------------------

Faamaonia.

AOFAI FAAOPOOPOGA I TUPE ALU AOA 2021/2022		\$11,600,000
---	--	---------------------

Faamaonia.

FAAMATALAGA LONA LUA

FAAITITIGA I TUPE FAATATAUINA

FAATOAGA MA FAIGA FAIVA **\$(200,000)**

Faamaonia.

PULE MA SUETUSI AOAQ: **\$(94,120)**

Faamaonia.

AOFAI FAAITITIAGA AOAQ **\$(294,129)**
I TUPE ALU 2021/2022:

Faamaonia.

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$11,600,000 mai le Faaputugatupe a le Matgaluega o Tupe.

Faamaonia.

FUAIUPU 3: Faaititiga o aofaiga na uluai faatatauina ma toe faasoasoa atu i isi galuega faatino ma galuega faatino laiti.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Faatatauina o Tupe Faaopoopo (Nu.2) 2021/2022.

Faamaonia.

Na faagasolo le Tulafono Tau Faaofi o le Faatatauina o Tupe Faaopoopo (Nu.2) 2021/2022 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2021/2022 – faitauga faatolu**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2021/2022 i lona faitauga faatolu.*

Faaluaina e le Minisita o Faatoaga ma Faiga Faiva ma le Minisita o le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O LE FAATATAUINA O TUPE
2022/2023 – iloiloga auiliili**

FOFOGA FETALAI: O le a sagai atu le Fono Aoao i le iloiloga auiliili o le Tulafono Tau Faaofi o le Faatatauina o Tupe 2022/2023.

E mafai ona saunoa faatepa sui usufono i mataupu o lo o tusia i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2023 faapea le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le Tausaga Faaletupe Faaiuina aso 30 Iuni 2023, P.P.2022/2023 Nu.25.

E tusa ai ma Tulafono Tumau 134, e amata le iloiloga auiliili o le Tulafono Tau Faaofi i ona Faamatalaga.

**FAAMATALAGA MUAMUA
VAEGATUPE MA TALA FAATATAU**

MATAGALUEGA	TUPE FAATATAUINA	ALU
--------------------	-----------------------------	------------

FAATOAGA MA FAIGA FAIVA:		\$19,628,783.
---------------------------------	--	----------------------

Faamaonia.

PISINISI, ALAMANUIA MA LEIPA:		\$20,764,302.
--------------------------------------	--	----------------------

Faamaonia.

FESOOTAIGA & FAAMATALAGA TEKONOLOSI:		\$9,389,050.
---	--	---------------------

Faamaonia.

AOGA, TAALOGA MA AGANUU		\$132,589,186.
--------------------------------	--	-----------------------

Faamaonia.

TUPE:		\$104,950,475/
--------------	--	-----------------------

Faamaonia.

MATAUPU TAU LE: VA I FAFO MA FEFAATAUAIGA		\$25,808,267.
--	--	----------------------

Faamaonia.

SOIFUA MALOLOINA: **\$140,443,598.**

Faamaonia.

**FAAMASINOGA &
PULEGA TAU
FAAMASINOGA** **\$14,259,855.**

Faamaonia.

**PUNAOA FAALENATURA
MA SIOSIOMAGA** **\$26,621,187.**

Faamaonia.

**LEOLEO, FALEPUIPUI
MA LE TOEFUATAIGA** **\$51,640,543.**

Faamaonia.

PALEMIA: **\$10,086,514.**

Faamaonia.

TUPE MAUA: **\$12,962,866.**

Faamaonia.

**TINA MA TAMAITAI
ATINAE O NUU MA
AFIOAGA MA** **\$63,679,430.**

AGAFESOOTAI

Faamaonia.

**GALUEGA
FELAUAIIGA &
ATINAE ESEESE**

\$47,541,804.

Faamaonia.

**OFISA O LE
LOIA SILI**

\$5,469,502.

Faamaonia.

**PULE MA
SUETUSI AOA**

\$4,006,672.

Faamaonia.

**KOMISI O
FAIGA PALOTA**

\$2,929,812.

Faamaonia.

**FONO AOA
FAITULAFONO**

\$7,355,133.

Faamaonia.

KOMESINA O SULUFAIGA

\$1,653,695.

Faamaonia.

**KOMISI O LE
AUFALUEGA O
GALUEGA A LE MALO**

\$8,788,431.

Faamaonia.

**GALUEGA TAU
ALAMANUIA MA
ATINAE A LE MALO**

\$9,114,490.

Faamaonia.

**OFISA O FUAINUMERA
FAAMAUINA**

\$5,887,995.

Faamaonia.

**KOMISI O LE
TOEFUATAIGA O
TULAFONO A
SAMOA**

\$1,410,985.

Faamaonia.

**AOFAI TUPE ALU AOA
FAATATAUINA A
MATAGALUEGA 2022/2023**

\$726,982,573.

Faamaonia.

FAAMATALAGA:

Faamaonia.

FUAIUPU 2: Faamatuu atu ma le Faatatauina o le \$726,982,573.

Faamaonia.

FUAIUPU 3: Faamatuu atu ma le Faatatauina o le \$522,043 mai le Teugatupe a le Tausi Mavaega a le Malo.

Faamaonia.

FUAIUPU 4: Faamatuu atu ma le Faatatauina o le \$21,809,477 mai le Faaputugatupe a le Matagaluega o Tupe.

Faamaonia.

FUAIUPU 1 MA LE IGOA

FUAIUPU: Igoa puupuu ma le amataga.

IGOA: Faatatauina o Tupe 2022/2023.

Faamaonia.

Na faagasolo le Tulafono Tau Faaofi o le Faatatauina o Tupe 2022/2023 e aunoa ma se Teuteuga.

**TULAFONO TAU FAAOFI O LE FAATATAUINA O TUPE
2022/2023 – faitauga faatolu**

FOFOGA FETALAI: Tulai mai lau Afioaga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2022/2023 i lona faitauga faatolu.*

Faaluaina e le Minisita mo Faatoaga ma Faiga Faiva ma le Minisita o Leoleo, Falepuipui ma le Toefuataiga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

Na faaalua le agaga fiafia o le Maota i le patipati o latou aao i le maea ai ona pasia o le Tala o le Tupe.

TOLOPOINA

FOFOGA FETALAI: Ia, o lea ua pale le aleiga nai aau mamao ina ua tau le malaga a le fetu sopolagi. E le toe tele foi se gagana a le Fofoga Fetalai, aua o lea ua taoto i le Maota le saunoaga a le Taitai o le Malo. Ae tau ia o se laolao e momoli atu ai le faafetai a le Fofoga Fetalai i lo outou onosai ma le faapalepale, i lo tatou galulue faatasi e tausoa ma tauamo le tatou galuega faaumiumi. Faamalo le onosai, faamalo foi le saunoa. Faafetai i lo outou logosaia ma le amanaia o se naunau atu o le Nofoa. Lau Afioga i le Tamaitai Palemia ma le Kapeneta ma lena Itu, faamalo faafetai mo le tapenaina ma le tuufaatasia o le Tala o le Tupe. Faafetai mo fuafuaga tuutumamao mo se manuia auiluma o le atunuu. Talosia ia i le alofa o le Atua la outou faatonufofola.

Lau Afioga i le Sui Taitai o le Itu Agai ma lena Itu o le Maota, faamalo faafetai mo le faaso, faafetai timai ua faafofoga le tatou Maota ma le atunuu i lo outou faiva alofilima. Lalafo laia i le tatou Malo lo tatou faatuatuaga ae faamoemoe mea uma i le Atua. Ou te faamalulu atu foi i le tatou Maota, afai ua i ai se gagana a le Nofoa ua le tautamalii i le taitaiga o le tatou Fono, e potu lava le tautai ae le atoa atu i le liu o lona vaa, alolofa faamagalalo se aleu o le Nofoa.

Samoa i ou tulaga faalupelupeina ma lau tapuaiga, faamalo fai o le faiva, o lea ua iu ma le manuia le fonotaga a lau Palemene. Faafetai tatalo. Afai ua sala se upu ma se gagana a lau Palemene, ia alofa ma lafoai i nuu le aina. Tau ina ia leoleo le Alii i le alo atu o le tatou atunuu i faiga malologa o lenei po.

Ofisa Sili o Pulega o Matagaluega ma Faalapotopotoga Tumaoti a le tatou Malo, malo faafetai le onosai.

Ou te fia momoli foi se faafetai i auunaga eseese o lo o tautuaina le tatou Maota. Le Matagaluega o Leoleo, le Matagaluega o le Soifua Maloloina, le

Matagaluega o le Tinei Mu, le 2AP ma le TV ma le Cooline, malo faafetai. Faamuli ma le ai se faafetai i le tautua a le tatou Ofisa o le Fono, faafetai, faamalo tautua. Pe a o tatou taumavae i leni afiafi, alofagia e le Atua lo outou afifio atu.

Ae tatou te le i tolopo, ou te talosaga atu i le Afioga i le Minisita o Tupe se i e saunia se tatou tatalo e faaiu ai le tatou Fono.

Susuga Hon Laauli Leuatea Polataivao Fosi: Lau Afioga i le Fofoga Fetalai, e faamalulu atu lava ina ne i avea ma ou sala le le faailoaina atu o le mataupu leni ae le i tolopo le tatou Fono. O le po anapo na tuuina mai ai se faaaloalo i le nuu o Leauvaa. Ua outou silafia o lo o i ai le faaaliga faale-Ekalesia a le Ekalesia Katoliko, na omai ai tamaitai e momoli mai le suauu o lo o taua i le talitonuga o le Ekalesia Katoliko, o le suauu paia. Sa faafesootai mai le Afioga i le Saofetalai ia Sala Pinati a ua tatou le mafuta, na faaooina mai ai suauu uma nei mo le Palemene o Samoa. Ina ne i meaane ua ou le faaaliga ona avea lea ma ou sala, o ai lava le paia maualuga o le Maota e manaomia, o lea ua i ou luma nei le apa lea o lo o i ai uma suauu paia na faaoo mai e le Ekalesia mo le tatou Palemene. Ma lou agaga faaaloalo.

FOFOGA FETALAI: Malo faafetai i le faaaliga foi i lau Afioga i le Minisita o Faatoaga ma Faiga Faiva, faafetai foi i le mamalu o le Ekalesia o lea ua manatu ane i le Palemene aua lava lea foi tulaga paia lea pei ona agia i totonu o le tatou Maota. Malo faafetai. Ae tulai maia lau Afioga i le Minisita o Tupe i se tatou tatalo.

Na tolopo Taulumaga a le Fono Aoao Faitulafono i le itula e 6:45 i le afiafi seia aulia le Aso Lua, 23 Aokuso 2022 i le itula e 9:30 i le taeao.